

ВИЛЬЯМ ШЕКСПИР

ТАНЛАНГАН АСАРЛАР

Беш жилдлик

Бешинчи жилд

Тошкент

Фафур Фулом номидаги Адабиёт ва санъат нашриёти

1985



ҚИРОЛ ГЕНРИХ IV
ТАРИХИЙ ХРОНИКА
Биринчи қисм

ЖАМОЛ ҚАМОЛ

тарж имаси

ИШТИРОК ЭТУВЧИЛАР:

Кирол Генрих Тўртинчи.
 Генрих — Уэльс шаҳдозаси,
 Жон — Ланкастер шаҳзодаси. } Киролнинг ўғиллари.
 Граф Уэстморленд.
 Сэр Уолтер Блент.
 Томас Перси, граф Вустер.
 Генри Перси, граф Нортумберленд.
 Генри Перси, лақаби Хотспер, унинг ўғли.
 Эдмунд Мортимер, граф Марч.
 Ричард Скруп — Йорк архиепископи.
 Арчибалд, граф Дуглас.
 Оуэн Глендаур.
 Сэр Ричард Вернон.
 Сэр Жон Фальстаф.
 Сэр Майкл — Йорк архиепископининг дўсти.
 Пойнс.
 Гедсхиль.
 Пето.
 Бардорльф.
 Леди Перси — Хотспернинг хотини, Мортимернинг синглиси.
 Леди Мортимер — Мортимернинг хотини, Глендаурнинг қизи.
 Мистрис Куикли — Истичипдаги майхона бекаси.
 Лордлар, офицерлар, шериф, буфетчи, майхона малайлари, хизматкорлар, аравакашлар, йўловчилар ва хос маҳрамлар.

Воқеа ўн бешинчи асрнинг бошида Англияда кечади.

БИРИНЧИ ПАРДА

БИРИНЧИ САҲНА

Лондон. Саройда таҳт ўрнатилган хона. Қирол Генрих таҳтда ўтирибди. Атрофида тикка турган ҳолда шаҳзода Жон Ланкастер, граф Уэстморленд, сэр Ричард Вернон, сэр Уолтер Блент ва хос маҳрамлар.

Қирол

Гарчанд ҳали исёнларнинг чеки кўринмас,
 Лекин пайтимасми энди тинчиб бир қадар,
 Қелгуси зўр юришларга кўрсак тараддуд,
 Юришларки — юртимииздан йироқда кечар.
 Ватанимиз этиб энди ўз-ўзига қасд,
 Фарзандлари қони билан оғзиң бўяmas.
 Уруш-суриш далаларни айламас пайҳон.
 Хазон бўлмас туёқлардан топталиб гуллар.
 Машъум вабо юлдузидек ёниқ кўз билан
 Бир-бирига ўқрайишмас оға-инилар.
 Бундан буён бир қавмнинг асли-наслини.
 Бир-биридан жудо этмас хунрезлик ва қон.
 Ватандошлар, тамом хешу ақрабо — бари
 Битта сафда туриб, бўлгай дўсту қадрдон.
 Уруш тифи қини йиритиқ, ханжар сингари
 Санчилмагай соҳибнинг ўз қуймичига.
 Бундан буён мақсадимиз — Исо мақбари,

Ҳамма бирдек отланамиз салиб юришга!
 Англия лашкарларин сафга тизамиз,
 Улар она қорнидаёқ ҳаққа етишган.
 Қўлларини кўкраклари узра хоч қўйиб,
 Ўн тўрт аср бурун хочга михланган зотнинг
 Қутлуғ қадамгоҳи, азиз хоки покини
 Озод айламоққа гўё паймон этишган.
 Биз йил бўйи бу тўғрида сўзладик, аммо
 Иш юришмас, бир қадам ҳам жилмас жойидан.
 Шу масала юзасидан кечаги мажлис
 Қандай қарор қабул қилди, Уэстморленд?

Уэстморленд

Биз бу ишнинг эҳтиёжи-сарфи деб худди
 Олиқ-солиқ тайин этдик кеча, ҳукмдор.
 Лекин шунда Уэльсдан хабар етишди,
 Глендаур галалари ғавро солди деб.
 Сардор Мортимерни жангда асир олди деб.
 Ҳалок бўлмиш унинг мингга яқин аскари.
 Ўэльснинг хотинлари ўлик танларни
 Шундоқ таҳқир этмишларки, сўзламоқ уят.

К и р о л

Наҳотки шу ур-ийқитнинг хабари энди
 Ортга сурар мўлжалдаги юришимизни?

Уэстморленд

Фақат бумас ташвишларга ўраган бизни.
 Гольмдон этагида майдон талашмиш яктан
 Жасур Перси, ўша шону шуҳратли Хотспер
 Шотландия баҳодири Арчибалд билан.
 Отишманинг бизга етган овозасидан
 Жанг бошдаёқ ғоят қонли, қиронли бўлган,

Аммо қандай якун топди — бизга қоронғу,
Зеро, чопар биз томонга от сурганида
Хали тугамаган, ҳали қизиб турган у.

Қирол

Ҳозиргина келди бизниң Уолтер Блент.
Устидаги чанг-чунгини қоққани ҳам йўқ.
Ҳаммангизни табриклайман: Дуглас енгилган,
Жанг майдони эса минглаб аскар жасади,
Офицерлар мурдасига қалашиб, тўлган.
Асир олинмишлар Дуглас вориси — Мордейк,
Граф Этол билан Меррей, Энгус ва Ментейс.
Хўш, биз учун буюк ўлжа, шоили бир зафар —
Эмасми бу ўзинг айт-чи, азиз биродар?

Уэстморленд

Шод бўларди шаҳзода ҳам бундоқ зафарга.

Қирол

Эвоҳ, сўзинг ханжар бўлиб қадалур менга.
Ота Нортумберленд менинг ҳавасим қўзғар,
Ки ягона ўғли унинг шундоқ азамат.
Үрмондаги адл қомат чинорга ўхшаб,
Мағрур боши бошқалардан бир карра баланд.
Қисмат арзандаси, аср ифтихори у.
Унинг қаршисида менинг Гаррим — лапашанг.
Қандай севинардим, агар фаришта руҳлар
Нажот бериб, ўғилларни алмаштирасалар,
Ва менинг ўғлимнинг оти Перси бўлсайди,
Унинг ўғлини аташсади Плантагенет!
Йўқ, яхшиси ярага қўл урмаган маъқул.
Ҳа, дарвоқе, янгиликдан хабаринг борми?
Перси бермас эмиш менга асирларини,

Ундан чопар келиб, менга хабар қилдимки,
Топширмоқчи эмиш фақат Файф графини.

Уэстморленд

Унга амакиси Вустер ўргатмиш буни,
Қайда имкон топса, сизга қилмиши — зиён.
Хотспер ёшмасми, кибру ҳаво кўрсатар,
Одоб билан андишани тарк этиб тамом

Кирол

Чақиртиридим, қилмишига жавоб беради.
Ва бу ишлар яна маълум муддатга қадар
Қуддус сари юришимиз ортга суради.

(Тахтдан қўзғалиб)

Сиз лордларга айтиб, дарров орқага қайтинг:
Чоршанба кун Унидзорда мажлис-машварат.
Олдимизда яна талай муаммолар бор,
Босиқ бўлиб, муҳокама этмоғимиз шарт.

Уэстморленд

Бош устига, шоҳим.

Карнайлар чалинади.

Чиқишади.

ИККИНЧИ САҲНА

Лондон. Шаҳзода Генрихнинг хонаси.
Бир ёқдан шаҳзода Генрих, иккинчи ёқдан Фаль-
ст аф киради.

Фальстраф

Соат неча бўлди, Гарри?

Шаҳзода

Шароб ичавериб, қорин қўявериб, кундузлари бурчак-бурчаклардаги скамейкаларда ағанайвериб, миянг айниб қолибди, ўзингта алоқаси бўлмаган нарсаларни сўраб юрасан. Агар соат дегани — шароб тўла жом, дақиқалари — қовурилган жўжахўролар, чиқ-чиқи — чўри қизларнинг гурунги, рақамлари — майхона эшигидаги ёзувлар, саховатли қуёшнинг ўзи эса — қипқизил тўшакка чўзилган мунис ва қайноқ бир жонон бўлгандаям, бошқа гап эди, тушунардим, қизиқсанг бўларди. Аммо ҳозир у билан неча пуллик ишинг бор?

Фальстад

Нақ нишонга урдинг, Гарри. Дарвоқе, бизга ўхшаш ашаддий киссавурларни кўпроқ кун қушларимас, тун қушлари деб ғаташса, ярашади. Кейин биласанми, жоним, сен қирол бўлганингда, худойим марҳаматингни омон сақласин... Узр, «аъло ҳазратингни» дейишим керак эди, негаки, худодан сенга марҳамат бўлмайди...

Шаҳзода

Наҳотки бўлмайди?

Фальстад

Бўлмайди, дедим, вассалом, ҳаттоки, оддий бир нонуштага етгудек ҳам бўлмайди.

Шаҳзода

Майли, шундоқ бўла қолсин. Хўш, кейин-чи? Қисқароқ қил, қисқароқ!

Ф альст а ф

Хўш, десанг, жоним, сен соҳиби таҳт бўлганингда шундоқ қилким, биздақа тун баҳодирларини кундузги талончилар, деб аташмасин. Биз учун ой ўрмончиларими ёки зулмат қоровулларими, деган рутбаи уйвонлар жорий қил. Токи одамлар худди бизни денгизга ўхшаб, осмондаги ой паноҳида, унинг вазиятига қараб иш тутишади, деб иззат-эҳтиром қилишсин.

Шаҳзода

Зап топиб гапирдинг. Талончилик қисматида ҳам денигизга ўхшаб кўтарилиш— пасайиш ҳолатлари бўлади. Масалан, душанба куни талончиликдан кейин тилла дегани кўпириб-тошади, лекин сешанба куни базми жамшиддан сўнг, у пасайиб қолади. Майхона зинасидан пасга думалатган саёзликдан кейин эса, шундоқ тўфон қўзғоладики, сени худди дор баландлигига олиб чиқади.

Ф альст а ф

Худо ҳаққи, айтганларинг рост, бўталоғим. Ҳа, дарвоқе, менинг майхона бекачим ширингина бир ойимча, шундоқ эмасми?

Шаҳзода

Ҳақиқий асал, ошнам. Ҳа, айтмоқчи буқа терисидан тикилган нимча ширингина бир матоҳ, шундоқ эмасми?*

* Ўша даврда Англияда маҳбусларга буқа терисидан тикилган нимча қийгизишган. (Тарж.)

Ф альст аф

Бу қанақа майнавозчилик, сэр. Жин ўрсин, ұнақа нимча билан менинг нима ишим бор?

Шаҳзода

Хўш, сёнинг майхона бекачинг билан менинг нима ишим бор?

Ф альст аф

Ахир, сен у билан неча бор ҳисоблашгансан.

Шаҳзода

Ҳаққингни сўрамовдим шекилли?

Ф альст аф

Тан бераман: унда ўзинг тўлагансан.

Шаҳзода

Унда ҳам, бошқа гал ҳам нақд пулим бўлганда, ўзим тўлаганман. Чўнтағим қуриб қолганда эса, қарз олганман.

Ф альст аф

Тўғри, сенда тортиниб туриш йўқ, сен тож-тахтнинг ҳақиқий ворисидек ҳаракат қиласан. Дарвоқе, менга айт-чи, сенинг подшолик даврингда Англияда кишиларни дорга осишдек ваҳшиёна одат наҳот бекор қилинмаса. Наҳотки, қонун деган нарса ёш ташаббускорликни аввалгидек бўғиб ётаверса? Менга қара, подшоликка чиққанингда ўғриларни осмай қўя қол.

Шаҳзода

Бўпти. Бу ишни сен бажарасан.

Фальстаф

Ростдан-а? Ҳимматингга балли. Кўрасан, мен ҳамиша тўғри ҳукм чиқазаман.

Шаҳзода

Сен ҳалитдан нотўғри ҳукм чиқаздинг. Мен сени, судья эмас, жаллод қилиб тайинлайман.

Фальстаф

Шуницига ҳам шукур, Гарри. Сен нима дессанг — шу бажонудил қабул қиласераман: турмага ясовул десанг ҳам майли, кийим-кечакларингга қоровул десанг ҳам — хўп.

Шаҳзода

Эгнимдан кўйлагимни ўмаршишингга қулай бўларди-а?

Фальстаф

Менга қатл этилганлар эгнидан ўмарганим ҳам етиб ортарди. Кел бошқа нарсалар ҳақида гаплашмайлик. Бугун мен алланечук паришонман, юмдаланган мушукдай ёки қантариб қўйилган айиқдекман.

Шаҳзода

Ёки кемшик арслондек, ёки ошиқнинг дўмбирасидек.

Ф а л ь с т а ф

Ҳа. Ёки Линкольншир сурнайининг пишиллашидек.

Ш а ҳ з о д а

Ёки айнаган қүён кабобидек, ёки Мурфильд бот-қоғининг билчиллашидек.

Ф а л ь с т а ф

Үхшатишларинг бекиёс, аммо мен билган шаҳзодалар ичида энг беқиёси — ўзингсан. Лекин менга қулоқ сол, Гарри. Мени айнитишини бас қил. Ўйлаб қара, иккимизга ҳам яхши ном деган матоҳ қауҷалар зарур. Аммо уни қайдан оласан? Яқинда сени деб кўчада қирол маслаҳатчиларининг биридан эшитадиганимни эшитдим. У шундоқ тузлади, шундоқ тузладики, мен эсам қулоқ ҳам солмадим. Лекин у гапнинг сирасини айтди. Яна халойиқ олдида.

Ш а ҳ з о д а

Худди китобларда айтилганидек. Ақлу дониш кўчада дод-фарёд солади, аммо уни ҳеч ким эшитмайди.

Ф а л ь с т а ф

Бемаъни одатинг бор: китобларни нотўғри талқин қиласан, эшитган одам авлиё бўлса ҳам, йўлдан озади. Худо ўзи кечирсину менинг хулқ-авторимният роса булғаладинг. Ҷен билан танишмасимдан аввал мусичадек бегуноҳ эдим. Эндай гапнинг рости, энг беномусдан ҳам сал бундайроқман. Мен бунақа яшашни тарк этишим керак, худо ҳаққи, тарк этаман ҳам, агар тарк

этмасам, майли, мени аблаҳ деб атайвер. Дунёдаги бирор шаҳзода мени имонимдан ажрашга мажбур этолмайди.

Шаҳзода

Эртага зарур ақчани қайдан оламиз, Жек?

Фальстраф

Ихтиёр сенда, бўталоғим, биласан-ку, мендан иш қочиб қутулмайди. Ишончингни оқламасам, мени аблаҳ деб атаб, рицарлик шавкатидан маҳрум қиласавер.

Шаҳзода

Хулқ-авторингни тузалиши ёмон кетмаяпти! Тақ-водорлик жазавасидан ўғриликка қараб!

Фальстраф

Ростданми, Гарри? Хўш, нима қилай, истеъодим шунаقا. Ҳар ким ўз майдонида жавлон уради.

Пойнс киради.

Ана, Пойнс ҳам келиб қолди. Кўрайлик-чи, Гедсхиль бирор янги нарсанинг изига тушганмикин. О, дунёдаadolat бўлганда, билмадим, дўзахнинг қайси алангали бурчаги бунга муносиб бўларди? Бу катта йўл бўйидаги қароқчиларнинг энг тасқараси.

Шаҳзода

Салом, Нед!

Пойнс

Салом, Гарри! Хўш, қилмишига пушаймон осий бандамиз нималар деб жавраяпти? Қанд қўшилган мусалласнинг аҳволи нечук? Жек, иблис билан имонинг устидаги музокараларинг нима бўлди? Сен уни муқаддас жума куни бир қадаҳ май билан битта яхна хўроз оёғига алмаштирувдинг шекилли?

Шаҳзода

Сэр Жон сўзи устидан чиқади. Шайтон ҳақини олади. Жек ақидага содиқ қолади. Иблисники — иблісга.

Пойнс

Ҳа, эсимда борида айта қолай. Жаноблар, жаноблар! Эртага эрталаб соат тўртда Гедс тепалигида йингин. Худди шу ердан художўлар Кентерберига, савдо-гарлар пул-ақча билан Лондонга ўтишади. Мен сизларга ниқоб келтирдим. Ӯз отларингиз бор. Гедсхиль бизни кутиб, Рочестерда тунаиди. Эртага Истчипда базм қиласиз. Иш ўнгай, қийинчиликсиз битади. Бош қўшганларга — ҳамён тўла муллажиринг тайин, бош тортганларга — дор билан сиртмоқ ёр бўлсин.

Фальстраф

Борамизми, Гарри?

Шаҳзода

Ким? Менми? Үғриликка-я? Талончилик қилишга-я?
Сирайм бормайман.

Фальстад

Демак, ўн шиллингни деб таваккал қилишга юрагинг бетламас экан да? Биласанми, сенда номус деган нарса йўқ. Йигит ҳам, оғайни ҳам эмассан, шаҳзода бўлишингга йўл бўлсин.

Шаҳзода

Ҳа, майли, таваккал, бир марта тентаклик қилсан—
қилибман да.

Фальстад

Мана бу бошқа гап!

Шаҳзода

Таваккал, мен уйда қоламан.

Фальстад

Қасам ичиб айтаманки, қирол бўлганингда шу қилишингга мен давлатга хиёнат қилиш билан жавоб бераман.

Шаҳзода

Вой-бўй, қўрқиб кетдик!

Пойнс

Сэр Жон, бизни шаҳзода билан холи қўй. Шундай далилларим борки, у, албатта, боради.

Ф альст а ф

Хўп. Сенга қувват, унга тавфиқ ато қилгай. Токи у ҳам чинакам шаҳзода деган ҳазил-мазах йўлида умрида бир марта ўғрилик қилиши мумкинилигини тушунсин, Хайр. Мени Истчипда топасизлар.

Шаҳзода

Хайр, адо бўлган ёшлик! Алвидо, саратонда ёққан қор!

Ф альст а ф кетади.

Пойнс

Ана шунаقا. Азиз, жондан азиз шаҳзодам, эртага биз билан юра қолинг. Мен бир ғалати ўйин қилмоқчи-ман, аммо ёлғиз ўзим эплашм гумон. Фальст аф, Бардольф, Пето ва Гедсхиль ҳалиги мўлжалдаги ишни ба-жаришади. Биз улар билан бормаймиз. Улар ўлжани қўлга киритишгаç, биз ҳужум қилиб, улардан тортиб оламиз. Худо ҳаққи, бу аломат иш бўлди.

Шаҳзода

Бўпти. Аммо биз улардан йўлда қандай қилиб ажраб қоламиз?

Пойнс

Биз улардан эртароқ ёки кечроқ йўлга тушамиз. Учрашув жойини тайинлаймиз. Кейин ўша жойга боришибормаслик ихтиёrimизда. Шунда улар ўzlари бошлашга мажбур бўлишади, ишни охирига етказишди дегунча, биз тикка ҳужум қилаверамиз.

Шаҳзода

Хўп, лекин улар бизни кийимларимиз, қурол-аслаҳаларимиз, отларимиздан таниб қолишади-ку.

Пойнс

Отларимизни кўришмайди. Мен уларни ўрмонга яшириб қўяман. Ниқобларни ўзгартирамиз. Кўйлакларни чакмонлар билан бекитамиз. Мен уларни тайёрлаб қўйганман.

Шаҳзода

Бас келиб бўлармикин? Улар тўрт киши.

Пойнс

Қўйсангиз-чи. Иккитаси ўлгудек қўрқоқ, дарров жуфтакни ростлашади. Учинчиси хавф-хатар туғилмагунча, ўзини ҳимоя қилишга бир уннаб кўради. Биз бир зумда уларни тумтарақай қиласиз. Аммо гап бунда эмас. Ҳамма гап зиёфат устида анави муттаҳам, мечкайнинг валақлаб гап сотишида. Қўрасиз, у, роса ўттизиши ҳужум қилди, биз анақа-манақа жанг қилдик, деб айюҳаниос солади. Шунда авра-астарини очамиз—қанақа томоша бўлишини бир тасаввур қилинг-а!

Шаҳзода

Бўпти. Мен бораман. Ҳамма нарсани шайлаб, эртага Истчипга* келинг. Мен кечликни ўша ерда қиласман. Хайр.

* Истчип — Лондон қўчаларидан бирининг иоми, у ерда кўплаб майхоналар, ошхоналар, қассоблик дўконлари жойлашган эди. (Тарж.)

Пойнс.

Хайр, милорд. (*Кетади.*)

Шаҳзода

Мен биламан баҳойингиз, аммо ҳозирча
 Бир бепарво улфат бўлиб қараб тураман.
 Қуёш, ҳар кун кўкда ибрат кўрсатур менга,
 У индамай тураверар, босса ҳам туман.
 Кейин бирдан тунни ҳайдаб, шуъласин тарап.
 Аввалгидан неча карра яшнаб-ярқирар.
 Биз ҳар куни байрам қилиб, очсайдик кўнгил,
 Ҳордиқ деган туюларди меҳнатдан мушкул.
 Лекин байрам деган бўлур аҳён-аҳёнда,
 Нодирлиги билан севинч қўзғатар қонда.
 Бас, бир куни мен ҳам нажот йўлини тутиб,
 Шу бетийиқ бебошликка бераман барҳам.
 Гарчанд ҳеч қимсага ваъда бермадим, лекин
 Үзгаарман одамларни ҳанг манг этиб,
 Эътибор топарман элнинг наздига чиндан,
 Кечмишимда бўлган айбу қусурлар сабаб —
 Кўринарман кўэга яна равшан, мунаавар,
 Ахир, қора ёстиқ узра бир парча олтин
 Қандай жило берар, қандай кўз қамаштирас,
 Ҳозир неки совураман эрмак-ўйинда,
 Битта қўймай йигиб-териб оламан унда.

(*Кетади.*)

УЧИНЧИ САҲНА

Лондон. Саройда мажлислар зали.
 Карнайлар чалинади. Қирол Генрих таҳтда ўлтирибди, атро-
 фида — шаҳзода Жон, Нортумберленд, Вустер, Хотспер, сэр
 Уолтер Блент, рицарлар, соқчилар ва хос маҳрамлар.

Қирол

Шунча тоқат қилдим, шунча кўндинг, чидадим,
 Балки қатъяntsиз бўлиб кўриндим баъзан.
 Аммоқи сиз поймол этиб сабрим, чидамим,
 Тарқ этдингиз одобни ҳам, андишани ҳам.
 Аммо ҳозир бўлинг, бирдан оловланаман!
 Гарчи пардек юмшоқ эдим, мойдек мулойим,
 Не бўлмасин, маъзур тутдим ювош, кўнгилчан.
 Оқибатда иззатимдан айрилиб қолдим.
 Сизга лутфи-назокатлар не эмиш... Ҳа-да,
 Қўполдирсиз, қўпол кучга қилурсиз сажда.

Вустер

Шоҳим, бизга сиздек қудрат, соҳиби даврон
 Қўпол кучдан сўз очмоғи жоизми әди.
 Сизнинг ўша қудрат учун бизнинг хонадан
 Қанча заҳмат чекди, қанча суюнчиқ бўлди.

Нортумберленд

Ҳукмдорим...

Қирол

Вустер, бундан қорангни ўчир,
 Кўнглингдаги адоватинг кўзингда зоҳир.
 Ҳа-ҳа, қўп дағалсиз, тақсир. Ахир подшолар
 Қовоқ уйиб, боққанларни хушламайдилар.
 Ҳой, мен нима дедим сизга? Қаққайманг, боринг,
 Лоэм бўлса чақиравмиз ўзимиз кейин.

Вустер чиқади.

(Нортумберлендга)

Сиз бир нима демоқсиз, шекилли?

Нортумберленд

Шоҳим,

Асиrlарни беришдан бош тортди деб сизга
Етказишган хабарлари — ғалат ва мубҳам.
Ўғлим ундоқ деган эмас ва демайди ҳам,
Хуллас, сизга етиб келган ўша маълумот —
Янглиш ёки хатодирким, бўлак гап эмас.

Хотспер

Асиrlарни беришдан мен бош тортганим йўқ,
Не бўлганин айтай. Жангни саранжом этиб,
Қиличимга суюнганча, ҳорғин, bemador:
Фазаб, шиддат, ташналиқдан бир ёққа этиб,
Ултирадим, келиб қолди қошимга бир лорд,
Худди куёвтўралардек ясаниб олган.
Соқоллари қиртишланган, юзлари силлиқ,
Узини нақ олифта бир сувратга солган.
Бир қўлида мўъжаз атир шишаси ҳам бор,
Ўйнарди у, ҳидлаб-ҳидлаб акса уради,
Бир нималар дерди, ҳиринг-ҳиринг куларди.
Аскарларим шаҳидларни жанг майдонидан
Олиб чиқишаркан, танбех-эътироz этди:
Хув, наридан олиб ўтинг, токи мурданинг
Қўлансаси димоғимга урмасин, деди.
Худди шундай йўл-йўлакай сайраб-бидирлаб,
Асиrlарни беришимни талаб этди у.
Биламан, бу қиролларнинг ҳуқуқи, ҳаққи,
Лекин жаҳлим қўзғатмишиди сайроқи тўти.
Кейин, жароҳатларим ҳам ёниб туради.
Худо ҳақи, эслолмайман, мен беҳуд эдим:
Асиrlарни бераман ё бермайман, дедим.
Лекин жаҳлим қўзиб, жуда қутуриб кетдим.
У ясанган эди, атир сочиб туради,
Замбараклар, талафотлар хусусида у

Бир беозор ойимчадек суҳбат қуарди.
 Жа қулай деб тузатмоқча кантузияни,
 Мақтар эди спермацет деган доруни.
 Кейин афсус чекди, нечун жирканч, ярамас
 Селитрани ердан қазиб олишади деб,
 Ундан тирик жонга қирон солишади деб,
 Ахир, соғлик учун кони зиёндир ўша.
 Бир пайт, агар отиш-тутиш бўлмагандайди,
 Аскарликка кирадим, деб бидирлаб қолди.
 Иўқ, мен ҳазм этолмасдим бу машмашани,
 Жиддий жавоб айтишим ҳам унга маҳолди.
 Токи сунмагайсиз шунга мени гуноҳкор.
 Токи анув жаноб билан айтишганларим
 Ўтинаман, ўртамизда бўлмагай девор.

Б л е н т

Хукмдорим, унутайлик бу мажорони,
 Қаранг, далил-изоҳлар ҳам юмшатар уни!
 Гарри Перси сўз қотмасин қанчалар оғир,
 Не боисдан, қаердадир, яна кимгадир,
 Аммо айтганларин қайтиб олар экан, бас,
 Ўша айтганлари ортиқ ҳеч нарса эмас.

Қ и р о л

У ҳозир ҳам асиirlарни бермоқчи эмас.
 Бунинг учун олдимизга шарт қўймоқда у,
 Қайноғаси Мортимерни сотиб олинг деб.
 Ўша телба Мортимерни. Ахир маълум-ку,
 Лашкаримни атайлабдан маҳв этиб, ўзи
 Асиrl тушди қайнотаси — Глендаурга.
 Ўша қўрқоқ, қочоқ энди менга не даркор?
 Ҳайф эмасми хазинани совурмоқ унга?

Ўз-ўзига чуқур қазди у хиёнаткор,
 Энди очдан ўлиб; тоғда кўмилсик қорга.
 Онт ичаман, мен ўзимга душман санайман —
 Кимки мендан бир чақалик ёрдам сўраркан
 Уша хоин Мортимерга, ўша ғаддорга.

Ҳотспер

Хоин! Хоин эса, кимга хиёнат этмиш?
 Хиёнатми магар жангда келмаса омад?
 Лекин бундоқ гап-сўзларга чекмоқ учун сад
 Кифоядир, шоҳим, бир зум эсга олинса
 Глендаур билан жангда яkkама-якка
 Солишаркан, ортиргани неча жароҳат!
 Бир соатча давом этмиш қизғин солишув,
 Туриб берган иккиёқ ҳам мардона, хунхор!
 Бу орада нафас ростлаб жангчилар худди
 Севёридан сув ичишган уч карра тақрор.
 Дарё тўлқини ҳам ҳатто қалтираб турган,
 Ўзини нақ қамишзорнинг қўйнига урган.
 Ким ҳам шунча собит туриб чопарди шамшир,
 Қонга ботиб жанг қиласарди айёрлик учун.
 Йўқ-йўқ, ўйин кўрсатмаган унда Мортимер.
 Таити туриб, машаққатни бўйнига олган.
 Унга бўҳтон-ёэририқлар этиш не даркор,
 Кейин буни хиёнат деб аташ ҳам бекор.

Қирол

Айтганларинг бошдан-оёқ уйдирма, бўҳтон,
 Глендаур билан сира солишмаган у.

(Урнидан қўзғолиб.)

Гар истаса, майдон аро яkkама-якка
 Ҳатто иблисни ҳам мағлуб этар эди-ку,
 Шунча ёлгонладинг, уят эмасмий сенга?
 Мортимердан сўз очишинг энди қатағон!

Менга асиirlарни жўнат, пайсалга солма.
Нақ бошқача гаплашаман, иш бўлар ёмон.
Ҳазиллашаётганим йўқ... Ҳа, Нортумберленд,
Сизга рухсат, кетаверинг ўғлингиз билан.

(Кетаётib.)

Асиirlарни жўнат, қейин пушаймон бўлма.

Карнайлар чалинади. Нортумберленд ва Хотспердан бўлак
ҳамма кетади.

Хотспер

Йўқ, мен жўнатмасман энди тилло берса ҳам.
Орқасидан бораман, ҳа, не бўлса бўлар.
Юрагимда борини шарт тўкиб соламан,
Майли, олар бўлса, қейин бошимни олар.

Нортумберленд

Хой, сен жинни бўлдингми-а? Ўзингни босгил,
Бундоқ қила кўрма. Ана, келар амакинг.

Хотспер

«Мортимердан сўз очишинг энди қатафон».
Мен истайман, сўз очаман, сурон соламан.
Чириб кетай, гар у билан бирга бўлмасам.
Йўқ-йўқ, унга қоним, ҳатто жоним бераман,
Тинчимасман, Мортимерни тахтда кўрмасам.
Шу тахтдаким, савлат тўкиб ўлтирас ҳозир
У лаънати Болинброк, нодон, тошбагир.

Нортумберленд

(Вустерга)

Кирол уни не аҳволга солибди, қара.

Вустер

Мен чиққанда не тўғрида сўз борди бунда?

Хотспер

Асиrlарни битта қўймай берасан, деди.
Мортимерни сотиб олиш шартини қўйдим:
У бўлса-чи, Мортимернинг эшитиб отин,
Сескандию ғазабидан кўкариб кетди.

Вустер

Бўлмаса-чи, Мортимер у марҳум Ричарднинг
Валиаҳди қилиб тайин этилган эди.

Нортумберленд

Мен ҳам унда ҳозир эдим, эшитган эдим
Ричард ворис этиб уни, бергандা фармон.
Кейин ўзи Ирландия устига юрди,
Кейин ортга қайтди — бунда қўзғолди исён.
Сўнгра тахтдан ағдарилди ва ўлдирилди.

Вустер

Шу қабоқат юкини биз олдик бўйинга
Ва бутун дунё олдида шарманда бўлдик.

Хотспер

Эшитганим ростми? Қирол Ричард чинданам
Мортимерни ворис қилиб тайинлаганми?
Сиз ҳам унда бормидингиз?

Нортумберленд

Ҳа, ҳозир эдим.

Хотспер

Үндоқ бўлса, таажжубга асло ўрии йўқ,
 Энди менга аён, нима сабабдан қирол
 Мортимерни худди очдан ўлдирмоқ бўлар.
 Аммо сиз-чи, сиз қаёқда эдингиз? Нега,
 Нега унга таҳт бердингиз, тож кийдирдингиз,
 Яхшиликни билмовчи бир лани кимсага?
 Нега шундоқ жиноятга бош қўшдингиз, бош?
 Магар эл наздида дор ё болтага ўхшаб,
 Е жаллод кундаси, ёки арқонга монанд
 Қабоҳат малайи, қатл қуроли деган
 Шуҳрат қозонмоқлик сизга мақсад эдими?
 Ахир кўряпсиз, сиздек зотларни ҳатто
 Ярим чақага олмас бу эпчил ҳукмдор!
 Бу номусга чидармисиз маҳшаргача то?
 Ахир қилмишингиз ўқиб келажак авлод
 Бунга ишонмайди, бунга ишонмоқ маҳол:
 Шундоқ ишни қилмиш шундоқ аслзодадар.
 (Худо шоҳид, гуноҳкорсиз бунда қанчалар),
 Узиб ташлаб Ричард каби бир гули покни,
 Утқазгансиз тиканакдек Болинброкни*.
 Хўш, атиги шуми? Ахир, номус нақадар,
 Сизни қанча маломатга қўйган ўша зот
 Бугун ёд айламас, бугун қалака этар,
 Ҳатто даргоҳидан қувиб ҳайдайди, ҳайҳот.
 Аммо ҳали номусингиз тикламоққа ҳам
 Номингизни оқламоққа кеч эмас зинҳор.
 Қилмишлари учун ўша безбет қиролдан
 Қасос олмоққа ҳам ҳали фурсатингиз бор.

* Болинброк — Геирих Тўртичнин у тақтга ўлтирмас-
 дан олдин шундоқ деб аташган. (Тарж.)

Сизни ҳалок этиб, тамом қутулмоқчи у,
Кечасиям, кундузиям — ўйлагани шу.
Шунинг учун...

Вустер

Бас қил, жиян, бир нафас тўхта.
Мен китобга боқсан каби кўнглим қаърига
Кўз ташлайман ҳозир, сен ҳам кўрасан аён,
Унда қўлдан ўйлаб юрган ўйларим пинҳон.
У бир қўрқинч қадам бўлур, ғоят серхатар,
Бир хатарким, жаҳаннамдек жарлик устидан
Ингичка бир наиза қўйиб, ўтишга ўхшар.

Хотспер

Майли, мен ўтаман. Агар йиқилиб тушсам,
Шунда чўкиншимни демак буюрмиш азал.
Қўрқинч, хавфу хатар менинг қонимни ёқар.
Қуён қуваламоқ эмас йигитлик расми,
Мен арслон овламоқни севаман асли.

Нортумберленд

Хатарли бир вазифани эшийтдими, бас,
Хаёллари чарх уради, тўхтатиб бўлмас.

Хотспер

Биласизми, довруқ учун, шараф-шон учун
Мен тирмашиб, ҳатто ойга чиқишим мумкин.
Мен ўзимни гирдобларга отарман ҳатто
Ва етарман ўқонларнинг тубига ҳам то,
То бўлмагай майдон аро мендек мардона,
Фақат ўзим бўлсан дейман — танҳо, ягона.

Вустер

Худо шоҳид, осмонларда парвоз этар у,
Аммо ерга тушишни ҳеч хаёл айламас.
Диққатингни бир дақиқа сўрайман, жиян.

Хотспер

Амакижон, изн беринг...

Вустер

Мен сенга айтсам,
Шотланд асиirlарини...

Хотспер

Мен унга бермайман.
Ҳа, бермайман, ҳатто унинг жони — имони
Уша шотланд асиirlарга боғлиқ бўлса ҳам,
У битта ҳам мендан асиirl ололмас.

Вустер**Шошма.**

Оғиз очишга ҳам ҳатто қўймайсан, жиян.
Майли, ўша шотландларни берма,

Хотспер

Бермайман.
Кўнглингиз тўқ бўлсин. Ахир истамади у
Товон тўлаб, Мортимерни озод этишни.
Ҳатто номини ҳам тилга олмангиз, деди
Мен-чи, ҳузурига кириб, ухлаган пайти
Қичқираман Мортимернинг номини айтиб.

Иўқ!

Бу сўзни чугурчуққа ёдлаттираман,
Кейин уни нобакорга тақдим этаман.

В уст ер

Жиян, тингла. Сўз айтишга бер менга имкон.

Ҳ о т с п е р

Воз кечаман барча хоҳиш-тилакларимдан,
Фақат Болинброкнинг мен ғашига тегиб,
Ундан даҳшатли бир қасос ола билсам, бас,
Бир стакан пиво бериб заҳарлар эдим
Мен ҳаттоқи ўша Уэльс шаҳзодасини
Аммо қирол у ўғлини хушламас унча,
Ўлар бўлса, қутулдим,/деб қувонар шунча.

В уст ер

Хайр, жиян. Сен баҳарҳол ўзингни босиб,
Тинчид олгин. Гаплашармиз кейин бафуржা.

Н о р т у м б е р л е н д

Нима, кар бўлдингми, қандай жин урди сени?
Хотинчалиш ўжарликни қаёқдан олдинг?
Истамайсан бошқаларни эшитишни ҳам.

Ҳ о т с п е р

Болинброк хусусида сўз кетган маҳал
Уртнаман, тутикаман, чидайлмайман.
Ногаҳонда кимдир қамчи солгандай бўлар,
Еки куйган каби таним азобга тўлар,
Еки бир газанда чақиб олгандай бўлар.

Шошманг, эсингизда бордир, Ричард даврида
 Қаср бор эди-ку, оти нимайди ҳали,
 Эҳ, жин урсин, бор-ку анув Глостерширда,
 Қирол амакиси, ўша мажнуннамо Йорк
 Ўз саройи билан унда турганди, хуллас,
 Ўша ерда биринчи бор тизза букканман
 Шу масхара қирол — Болинброк олдида.
 Эҳ, лаънати! Номи тилим учиди худди,
 Сиз ўша кун Ревенспергдан келгандингиз-ку.

Нортумберленд

Бэркли қасри эмасми?

Хотспер

Ҳа, ўшанинг ўзи.
 Хушомадлар қилган эди менга ўшандай
 Худди итдек оёғимга суйкалган эди!
 «Мен ҳам қайтарарман магар тахтга ўлтурсан».«Менинг Гарри Персим», «Менинг туғишган иним».Шайтон шарафласин сени, алдоқчи золим!
 Ҳа, шошмай тур ҳали, мени кечир, худойим!
 Мен гапимни тамом қилдим. Амаки, сўзланг.

Вустер

Йўқ, сен давом этавер.

Хотспер

Мен гапириб бўлдим.

Вустер

Ўша шотланд асиirlари ҳақида, ошна.
 Товоң олмай, сен уларнинг барин озод қил.

Дуглас ўғли бу бебаҳо ҳимматинг учун
Сенга лашкар йигиб берар Шотландияда.
Лашкар нега зарур, буни бир оз кейинроқ
Баён этажакман сенга бир мактуб ила.

(Нортумберленга)

Сиз бўлса-чи, милорд, сиз ҳам қармоқ соласиз
Хотспер банд бўлар экан Шотландияда,
Ҳазрат руҳонийни роса қўлга оласиз.

Хотспер

Йорк епископини кўзда тутмоқдасиз?

Вустер

Ҳа.

Ахир Бристолда унинг туққан укасин
Қатл этишганди, буни нечук унугтай.
Лорд Скруп учун қасос олмоққа у шай.
Бу бир тахмин эмас, сизга аниқ айтаман.
Ҳаммаёқда қалашгандир ўтин, хору хас,
Гурра ёниб кетар, фақат учқуқ бўлса, бас.

Хотспер

Тутун ҳиди анқиялти. Сезиб турибман.

Нортумберленд

Аммо сен қушчани эрта чўчитиб қўйма.

Хотспер

Биз енгамиз. Бунга менинг ишончим комил.
Шотландияликлар, Йорк ва сўнгра — Мортимер?
Хўш, амаки, пайқадимми?

В у с т е р

Балли, пайқадинг.

Ҳ о т с п е р

Ажойиб бир режа.

В у с т е р

Энди қараб туриш йўқ.

Фақат исёндадир иажот, қутулиш йўли.
 Энди не қилмайлик, қирол бизнинг сиймода
 Кўрар ёлғиз мухолифлар, норозиларни.
 Хуллас, барчамизга барҳам бермагунча то
 У хотиржам тура олмас, тинчимас асло.
 Кўрдингиз-ку ҳозир, қандоқ ҷеҳраси хуфтон,
 Бу — бўлажак савдолардан аниқ бир нишон.

Ҳ о т с п е р

Ҳа, ҳа. Аммо биз бу учун қасос оламиз.

В у с т е р

Хайр, жиян. Лекин сира ҳаддингдан ошма.
 Мен ёзаман, ёзганимга қатъий амал қил.
 Пайти келиб, топишаман Мортимер ила,
 Яна Глендаур бўлур биз билан бирга.
 Дуглас лашкарию сенинг аскарларингни
 Битта жойга йириб, кўрик ясармиз унда.
 Қўлга олингиз, деб фурсат қистайди бизни
 Қўлдан бериб қўйган ўша қисматимиэни,

Нортумберленд

Соф бўл. Фалабага менинг ишончим комил.

Хотспер

Хайр, соф бўлинглар. Мен-чи, ором билмасман,
То жанговар лашкарларим жангга тизмасам.

Кетишади.

ИККИНЧИ ПАРДА

БИРИНЧИ САҲНА

Рончестер. Мусофирихона.
Аравакаш фонус кўтариб киради.

Аравакаш

(Эснаб)

Эҳ-ҳе-ҳе! Тонг ёришиб қолибди-ку, соат ҳам тўртдан каммас, ўлай агар. Етти оғайнин мўрининг устига етибди-ю, юклари ҳали ортилмаган. Ҳой, отбоқар!

Отбоқар

(саҳна ортидан)

Ҳозир, ҳозир!

Аравакаш

Том дейман, эгарнинг остига теллик босиб юбор. Байтал шўрликнинг елкаси яғир бўлиб кетибди.

Иккинчи аравакаш

Иккинчи аравакаш киради.

Берганлари чириган нўхат билан ясмиқ, отнинг силласини қуритишдан бўлак гапмас. Лаънати мусофирихона! Робин ўлди-ю, шу-шу бу ердан барака кўтарилиди.

Биринчи аравакаш

Сули қимматлашгандан сўнг бечоранинг бир марта ҳам очилиб кулганини кўрмадим. Марҳум учун бу балой ногаҳон бўлди.

Иккинчи аравакаш

Бутун Лондон йўлидаги мусофирихоналар ичидагунача расвоси йўқ: ҳаммаёқ фиж-фиж бурга. Баданимни моматалоқ қилиб ташлашди, ҳозир илондек олачипорман.

Биринчи аравакаш

Улар биринчи хўроз қичқириғи билан менга ташланниб, шу-шу тонг отаргача қўйиб юборишмади.

Иккинчи аравакаш

Бу ерда тувак деган нарсанинг уруғи ҳам йўқ — қистаса, печкага қараб чоптиравер, бурга деган савил шундан кўпаяди-да.

Биринчи аравакаш

Отбоқар! Қаёққа йўқолди экан бу лаънати, ер ютгур! Ҳой, бошингни чиқара қол энди!

Иккинчи аравакаш

Мен Черинг-Кросста дудланган чўчқа гўшти билан икки той занжавил олиб кетяпман.

Биринчи аравакаш

Ана холос, куркалар саватда хўраксиз, қопти-ку, эслатганинг учун раҳмат, оғайни! Отбоқар, кар бўлиб

қолдингми? Қачон турасан, жин ургуб! Ҳозир бошингни ёрамиз, кейин мазза қилиб ётаверасан!

Гедсхиль киради.

Гедсхиль

Салом, аравакашлар! Соат неча бўлди?

Биринчи аравакаш

Чамаси икки бўлгандир.

Гедсхиль

Фонусингни бериб тур, отхонага бориб, бедовдан ҳабар олай.

Биринчи аравакаш

Гапингни қара-ю, «бериб тур» эмиш! Вой, хумпар-е! Кўрганимиз сендақаларни!

Гедсхиль

(Иккинчи аравакашга)

Бўлмаса, сен бера қол.

Иккинчи аравакаш

Фонусни-я! Тушингни сувга айт. Аввал сени қандоқ осишларини бир томоша қилай, кейин бераман.

Гедсхиль

Хой, жин ургурлар, Лондонга қачон етиб бормоқчи-
сиз?

Иккинчи аравакаш

Керак соатда. Ушандада муккасидан тушиб ухлаш-
нинг айни палласи бўлади, хотиржам бўлавер. Қани,
қудагайим Мегс, бориб хўжайниларни ўйғотайлик.
Улар йўлда йўлдош борлигига хурсанд бўлишади, юк-
лари кўп.

Аравакашлар кетнишади.

Тедсхиль

Коровул!

Коровул

(саҳна ортидан)

Киссавурлар айтганидек, тап-тайёрман, тақсир!

Гедсхиль

Янада яхшироғи, қоровуллар айтганидек. Улар бирин
иккинчисидан қолишмайди.

Коровул киради.

Коровул

Эртангиз хайрли бўлгай, мистер Гедсхиль. Қечаги
такминларим тўғри чиқди. Кентдан келаётган ўрмон
эгаси ўзи билан икки юз фунт-стерлинг тилла олиб
кетяпти. У бу ҳақда кеча ҳамроҳига ўзи иқор 'бўлиб
айтди. Ҳамроҳи бўлса, бож-хирож йиғувчига ўхшайди,

юки зил-замбил. Унда нималар борлигини ёлғиз худонинг ўзи билади.

Гедсхиль

Бошимни гаровга қўйиб айтаманки, улар йўлда бир балога учрашади.

Қоровул

Бошингизни бошимга ураманми? Яхшиси, уни сиртмоққа деб асраб қўя қолинг. Гапнинг сираси шуки, йўлда улар учрайдиган биринчи бало ўзингиз. Лекин дордан қочиб қутулиб бўпсиз.

Гедсхиль

Намунча дор, сиртмоқ, деб валақлайверасан, ажмоқ? Осиладиган бўлсан, ёлғиз ўзим осилармидим. Ёнма-ён қўйиб, қари сэр Жонни ҳам осишади, у бир нима эмаски, кўзга чалинмай қолса. Шунаقا шерикларим борки, эшитсанг, анграйиб қоласан! Улар бизнинг ҳунарни эрмак-ўйин учун қилишади, сиримиз очилгудек бўлса, ўшаларга доғ тушмасин учун шартта бекитишиди. Йўқ, оғайни, мен ишимни билиб қиласман. Майдачуда ўғривачалар билан борди-келдим йўқ. Жулдуровқи, ялангоёқ, бурни шишиқ, мўйлови ўсиқ, каллаке-сар, ҳар хил қалангি-қасангилар бизнинг тенгимиз эмас. Бизда десанг нуқул олий аслзодалар, қароқчиликда мену сенга сабоқ берадиган шаҳар ҳокимлари, хуллас, тош девор ортида юргандек ишни бемалол дўндираверасан. Биласанми, биз қирққулоқ гулларни узамизу кўринмас бўлиб юраверамиз.

Қоровул

Менимча, сизни кўринмас қилган қирққулоқ гуллар мас, тун қоронғиси бўлса керак.

Гедсхиль

Бўпти, Қўлингни бер! Оғиз очмайсан. Ҳалол кишининг сўзи: ўлжадан улушингни оласан.

Коровул

Ҳалол кишининг дейсиэми? Иўқ, унда алдайсиз. Яхиси, чинакамига, яъни муттаҳам-қаллоб бўлиб қасам ичаверинг.

Гедсхиль

Бўпти. Бор, отбоқарга айт, отимни олиб чиқсин. Хайр, эй ярамас!

Кетадилар.

ИККИНЧИ САҲНА

Гед тепаликлари ёнидан ўтадиган катта йўл.
Бошқача кийиниб олишган шаҳзода Генрих билав
Пойнс киради.

Пойнс

Бутазорга, бутазорга! Отини яшириб қўйганим учун
Фальстаф қутуриб юрибди.

Шаҳзода

Бекинсанг-чи.

Саҳнанинг ичкарисига ўтадилар.
Бошқача кийиниб олган Фальстраф киради.

Фальстраф

Пойис! Ер юттур Пойис! Пойис, деймай!

Шаҳзода

(олдинга чиқиб)

Эй, секироқ. Намунча бақирасан, бақалоқ?

Фальстраф

Пойис қани, Гарри?

Шаҳзода

У тепада. Мен ҳам кетдим.

(Яна саҳна ичкарисига юради.)

Фальстраф

Уша муттаҳам билан тағин топишганим учун шундоқ кунга қолиб ўлтирибман. Лаънати отимни етаклаб кетди-ю, аллақаёққа яшириб қўйди. Яна бир қадам яёв юрсам, йиқиламан. Унда ҳар қалай анави ярамасни ўлдирганим учун дордамас, шу ерда ўз ажалим билан ўламан. Йигирма икки йилдирким, ҳар соат шу ғаламис билан юз кўришмайман, деб қасам ичаману лекин у мени илондек аврайди-қўяди. Худо ҳаққи, ёлғон айтсам, бўғилиб ўлай, у менга қандайдир муҳаббат доруси ичирган шекилли. Бўлмаса, бу нимаси ахир. Пойис! Гарри! Илоё, гумдан бўлларинг! Бардольф! Пето! Яна бир қадам юрсам, илоё, очимдан ўлай. Эс

борида этакни йиғиб, уларга тупуриш керак, вассалом. Агар шундоқ құлмасам, дүнә яралгандан бери овқатни тиши билан чайнаң ютган махлуқлар ичидә энг тасқа-раси үзимман. Менга саккыз газ нотекис йўл юриш ет-миш чақирим текис йўл босишдан машаққат. Фаламислар буни яхши билишади. Борди-ю, ўғрилар ораси-да ҳам виждон қолмаса, ҳолимиз не кечади? (Хуштак чуриллайди, Фальстаф ҳуштак чалиб жавоб беради) Хуу-ху-шт! Вабо кўтарсан сенларни! Отим қани, ит-ваччалар? Отим қани деяпман, ўлаксалар?

Шаҳзода

(олдинга чиқиб)

Жим, бақалоқ! Ерга ётиб қулоқ сол-чи, бирор кел-маяптимикин?

Фальстаф

Кейин мени кўтариш учун пашанг борми сенда? Ке-йин бутун Англия қироллигини берсанг ҳам ўз кучим билан ўрнимдан қўзғалмайман. Шаҳзода, жоним, отимни топиб бер.

Шаҳзода

Эсингни йиғ, аҳмоқ! Мен сенга отбоқармидим!

Фальстаф

Бўлмаса, илоё ўз орденинг ипига ўзинг ўралиб ўл! Мени қўлга туширсалар, сенларни айтиб бераман. Сенларга атаб беҳаё бир қўшиқ тўқиб, истаган чорраҳада айттирумасам, мени шароб урсин! Ҳазил ҳам шунақа зил бўладими, яна пиёда юрганда.

Бир томондан Пойнс, иккинчи томондан Гедсхиль, Бардольф ва Пето киришади. Улар бошқача кийиниб олишган.

Гедсхиль

Тұхта!

Фальстад

Афсуски, ҳали ўтирганимча йүқ.

Пойнс

Бу бизнинг айғоқчимиз. Үшанинг овози.

Бардольф

Хүш, не янгиликлар?

Гедсхиль

Белни боғланг. Ниқобларни шайланг. Тоғдан подшолик пуллари оқиб келяпти. У подшолик хазинасига гушади.

Фальстад

Бекор гап, у подшолик шаробхонасига тушади.

Гедсхиль

Ҳаммамизга етади.

Фальстад

Дор тагига ҳам элтади.

Шаҳзода

Сиз, тўртталангиз йўл торайган жойда уларни тўхтатасиз. Мен билан Нед пастликка тушиб турдимиз. Борди-ю, сиздан қутулишса, бизга тутулишади.

Пето

Улар неча киши?

Федсхиль

Саккиз ёки ўнтача.

Фальстад

Улар ҳужумга ўтиб, биз ҳимоячи бўлиб қолмасак, гўрга эди.

Шаҳзода

Жаноб Жон Бақалоқ, қўрқяпсизми?

Фальстад

Ҳа, албатта, бобонгиз Жон Қилтириққа етишга бизга йўл бўлсин! Шундоқ бўлса ҳам қўрқаётганимиз йўқ.

Шаҳзода

Биз буни синаб қўрамиз.

Пойнс

Айтмоқчи, Жек, отинг қўрадан нарида бойловда турибди. Керак бўлса, шундоқ ечасану миниб кетаверасан. Хўп, саломат бўл, уялтириб қўйма тагин.

Ф альстраф

Ана, айтмадимми, яна эридим-қўйдим, ўлдирсаям унга бармоғимни тегизмайман.

Шаҳзода

(*Пойнсга секин*)

Нед, плащларимиз қаёқда?

Пойнс

(*Шаҳзодага секин*)

Шу орада. Қани, юринг.

Шаҳзода ва Пойнс кетадилар.

Ф альстраф

Хўп жаноблар, омад ёр бўлсин! Ҳамма жой-жойига!

Бекинишади. Иўловчилар пайдо бўлади.

Биринчи йўловчи

Яна бир оз юрайлик. Отларимизни болакай етаклаб тушаверади, унгача биз оёқнинг чигилини ёзамиз.

Үрилар**Тўхта!****Иккинчи йўловчи**

Е Исо, ўзинг асрагайсан!

Фальстад

Бос уларни, оғиздан қонини оқиз! Ҳу, очкўз чигирткалар! Еганларингни едингми, текинхўрлар? Энди бошқалар есин! Бос уларни, терисини шил!

Биринчи йўловчи

Вой, талон-торож қилишди! Вой, ўлдиришди! Вой, бола-чақамиз билан адо бўлдик!

Йўловчилар қочишади, Бардольф; Гедсхиль, Пето уларни қувади.

Фальстад

(Қиличини яланғочлаб, саҳнада у ёқдан-бу ёққа югурб.) Талон-торож қилишдими, гушналар! Сандиқларинг, хумчаларингда қолгани-чи, иркитлар? Қани, қимирланглар, тилла саночлар! Навқирон асрни еб-ямлашни кўрсатиб қўямиз сенларга! Балки ораларингда мўътабар зотлар, суд ҳайъати аъзолари ҳам бордир! Суд ҳайъатини кўрсатиб қўямиз сенларга! (Кетади.)

Плаш кийиб олган шаҳзода Генрих билан Пойнс қайтиб киришади.

Шаҳзода

Үргилар ҳалол кишиларнинг дилларини доғлаб, қўлларини боғлашди. Энди ўз навбатида биз уларни шиламиш ва тақводорлик заҳматидан кўнгил ёзиш учун Лондонга жўнаймиз. Бир ҳафтагача гап-сўз, бир ойгача кулгу мазах, то ўлғунча ҳазил-ҳузулга баҳона топилди.

Пойнс

Яширинайлик, Улар келишяпти.

Бекинишади, Фальстраф ва Пето қоп елкалаб қайтиб киришади.

Фальстраф

Қани, йигитлар, бўлишиб оламиз-да, тонг отмасдан отларга мишиб, жўнаб қоламиз. Шаҳзода билан Пойнснинг қўрқоқлигига энди ҳам ишонмасаларинг, бу дунёдаadolat йўқ экан, вассалом. Пойнса ёввойи ўрдакча ҳам юрак йўқ.

Улжани бўлишаётганда шаҳзода билан Пойнс уларга хужум килади.

Шаҳзода

Пулни ташла!

Пойнс

Ярамаслар!

Гедсхиль, Бардорльф. Пето дархол, сўнг жиндак қаршилик кўрсатиб, Фальстраф ҳам ўлжани ташлаб қочади.

Шаҳзода

Қулайгина қўлга тушди. Йўлга тушайлик.

Тумтарақай қочишиди-ку, тарқаб кетишар.

Нега десанг, бир-биридан олишар ҳадик,

Бир-бирини қоровул деб гумон этишар.

Энди йўлга тушайлик, Нед. Шўрлик Фальстраф

Роса терлаб-пишиб, этар, тупроқларни нам.

Ўнга менинг кулгим қистар ва ачинаман.

Пойнс

Қандай бўкирди у! Зотли буқами дейсан!

Кетадилар.

УЧИНЧИ САҲНА

Уоркуорт. Қасрда бир хона.
Қўлида мактуб билан Ҳотспер киради.

Ҳотспер

(ўқийди)

«Ўз тарафимдан шуни маълум қилмоқчиманки, милорд, хонадонингизга бўлган муҳаббатим нуқтаи назаридан сиз билан бирга бўлишни ўзимга қувонч деб билардим*. Қувонч деб билармиш! Нега бўлмасам, ўша қувончга ўзини мушарраф этмайди? Хонадонимизга бўлган муҳаббати нуқтаи назаридан! Аммо афтидан у ўз омборларини бундан ҳам кўпроқ севади. Хўш, яна ўқийлик-чи. «Сиз қўл урмоқчи бўлган иш—хатарли». Шубҳасиз. Дунёда ҳамма нарса хатарли. Тоза ҳавога чиқиш ҳам, ичкилик ичиш ҳам, ётиб ухлаш ҳам. Ҳа, аммо тушунсангиз-чи, аҳмоқзода милорд, биз хавф-хатар деб аталган ўша тиканакзорда роҳат-фароғат ғунчасини узамиз. «Сиз қўл урмоқчи бўлган иш—хатарли, сиз таъриф-тавсиф қилиб ёзган дўстларингиз ишончли эмас, вақт ҳам ноқулай, фитна-хуружингиз замирида шу қадар кучли бир душман билан курашмоққа етарли асос ҳам йўқ». Сиз шундоқ деб ўйлайсизми? Шундоқ деб ўйлайсизми? Бўлмаса, эшитинг: фирт қўрқоқ, қип-қизил

* Ҳотспер ўз иттифоқчиси, граф Денбар Мрачнинг мактубини ўқийди. (Тарж.)

аҳмоқ ва бунинг устига, пихини ёрган алдоқчисиз. Вой, тентак! Тангрига қасам ичиб айтаманки, бунақа пухта-пишиқ хуруж бўлмаган. Дўстлар садоқатли ва синаш-та. Ажойиб фитна, ажойиб дўстлар, катта орзу-умидлар. Ҳа, ҳа. Аломат бир фитна, аломат, дўстлар! Вой, сен тошюрак ҳайвон! Агар фитна маъқул бўлмаса, нега уни архиепископ ҳазратлари қувватлайди? Вой, сен шайтон, шалпайган товуқ, қани энди, хотинининг елпу-ғичи билан бошини уриб ёрсанг! Отам-чи, амаким-чи, ўзим-чи? Ҳўш, биз исёнда қатнашмаяпмизми? Магар лорд Эдмунд Мортимер, архиепископ Йорк ва Оуэн Глендаур биз билан бирга эмасми? Нима, Дугласни унутиб қўйдингизми? Улар келаси ойнинг нақ тўққизин-чи куни бизга қўшилишлари ҳақида ёзма ваъда бериш-мадими? Ҳатто айримлари ҳалитдан юриш бошламади-ми? Ҳўш, бу беимон мажусий нималар деяпти ўзи? Энди у қўрқоқ қиролга бориб, ҳаммасини оқизмай-то-мизмай етказади! О, шундоқ бир ажойиб режани анави латтачайнарга ошкор этганим учун ўзимга шапалоқ тор-тишга ҳам тайёрман. Падарига лаънат! Чақса чақавер-майдими. Биз тайёрмиз. Мен бугуноқ йўлга чиқаман.

Леди Перси киради.

Салом, Кет. Мен икки соатдан сўнг жўнаб кетаман.

Леди Перси

Жоним, нима бўлди, нега қовоғинг солиқ?
 Нима гуноҳ қилдим, мана, икки ҳафтаким,
 Бир қайрилиб қарамайсан чеҳрангни очиб?
 Айт, нимадир сени бундоқ хаёлга солган,
 Хаёлларга солиб, тамом тинчингни олган?
 Сабаб нима — ўй сурасан ер боқиб оғир,

Ва ногаҳон сесканасан — сабаб нимадир?
 Ёноқдаги қизилликни қаён йўқотдинг?
 Менинг жону жаҳонимсан, ахир, сўйлагил,
 Нега бундоқ машаққатли ўйларга ботдинг?
 Кечак ҳузурингга кирдим. Ухлаб ётардинг.
 Гудурлардинг, сўзингда: жанг, қурол-аслаҳа.
 Отинг юлқинарди гўё «жилов тоартардинг»
 Ва уйқунгда қичқирардинг: «Йигитлар, олға!»
 Айқаш-уйқаш сўзларингни тингладим. Нуқул
 Ҳужумлару пистирмалар, тўсиқ-деворлар,
 Асиrlар, ўликлар, хуллас, ғарқ айламиши
 Даҳшатли жанг майдонида нима бўлса — шул!
 Манглайнингдан маржон-маржон тер қўйиларди,
 Тўлқинли сув юзидағи кўпиклар каби,
 Юзларингда ифодалар юз товланарди,
 Гоҳ оқариб кетар эдинг, гоҳи қорайиб.
 Булар бари нима демак? Нималар пинҳон
 Бу безабон белгилар-да? Билайн уни.
 Эрим менга юрагини айласин аён,
 Айламаса, демакки у сёвмайди мени.

Ҳотспер

Ҳой, эшикда ким бор? Кирсин!

Ҳизматкор киради.

Мактубни олиб,

Жўнадими Жильямс?

Ҳизматкор

Ҳа, бир соат бурун.

Ҳотспер

Батлер судьялардан менга от келтирдими?

Хизматкор

Ха, келтирди. Биттасидан.

Ҳотспер

Саманми, жийрон?

Хизматкор

Жийрон, тақсир.

Ҳотспер

Жийрон бизни давлатга әлтар.
Айт ҳозироқ эгарлашсин. О, Esperance*
Батлер отни шайлаб, мени эшикда кутсин.

Хизматкор кетади.

Леди Перси

Хўш, жонгинам?

Ҳотспер

Нима, жоним?

Леди Перси

Сени бу ердан
Элтаётган нима?

* Esperance — французча «умид», Перси хонадонининг гербидаги битилгац шиор. (Тарж.)

Ҳотспер

Мени элтар тулпорим.

Леди Перси

Вой, сен, маймун — масхаравоз, ўйинни бас қил!
 Чегара йўқ сенинг турфа найрангларингта,
 Гарри, ишларингни мен ҳам билмоқ истайман,
 Менга туюларки, яна акам Мортимер
 Писта пўчогидан кема қурмоқчи бўлар,
 Сендан мадад кутар, сенга умид боғлаган?
 Агар шунга кўниб, унинг измини тутсанг
 Ва шу йўлдан кетсанг...

Ҳотспер

Иўғ-ей? Яёвми? Қандоқ?

Леди Перси

Кўп товланаверма бундоқ, тўти қақилдоқ!
 Қани, менинг саволимга жавоб айлагин,
 Бармогингни чиқазаман бандидан лекин.

Ҳотспер

Қўй, қўйвор, дейман! Мендан нима истайсан?
 Сени севаманми? Аён, севишим гумон.
 Ушишлару қучишларнинг мавсуми ўтди,
 Қўғирчоқ ўйиашга энди йўқ менда имкон.
 Бугун, билсанг, синдирилган тилла тож билан
 Пачоқланган бурунларга эҳтиёж баланд...
 Қачон от беришар менга, ўзинг инсоф эт,
 Ҳой, кет, нима бўлди сенга? Нима дейсан. Кет?

Леди Перси

Шунақами? Демак, мени севишинг гумон?
 Деганларинг чинми? Майли, севмай қўя қол.
 Худди сенга ўҳшаб жавоб берурман мен ҳам.
 Йўқ, ростдан ҳам севмайсанми, совудинг, ёху?
 Очик гапир, чинингми ё ҳазилингми бу?

Хотспер

Юр, ҳовлига чиқайлик. Мен жўнаш олдидан
 От устида туриб, сенга ичайин қасам,
 Сеникиман, ўлгунимча сенга содиқман,—
 Аммо сен ҳам ваъда бергин, сўрамагайсан —
 Мендан, яна қаёққа, деб. Аёндир бешак,
 Баски, кетяпман — демак кетишим керак.
 Мен кетарман бугун сени бунда қолдириб.
 Оқиласан, аммо ақлинг ўзингга лойиқ,
 Садоқатли рафиқамсан, аёлсан лекин,
 Фақат билмаганингни сир тутишинг мумкин.
 Мен ҳам шундоқ чегарага риоя қилдим.

Леди Перси

Шундоқ чегарага?

Хотспер

Ҳа, бу муқаррар бир ҳол.
 Бирғи кун менга етиб оласан, шунда —
 Барча сирдан хабардор ҳам бўласан унда.
 Розимисан?

Леди Перси

Рози бўлмай, не иложим бор.

Кетадилар.

ТУРТИНЧИ САҲНА

«Тўнғиз бош» майхонасида бир хона. Шаҳзода Генрих киради.

Шаҳзода

Вой, ортиқ чидаёлмайман, Нед, қарашвор! Димиқ-кан хонадан чиқ энди. Кулдиравериб, тинка-мадоримни қуритишиди.

Пойис киради.

Пойис

Қаёққа йўқолиб қолдинг, Гарри?

Шаҳзода

Тўрт нафар заранг бош билан, тўрт нафар заранг бочканинг даврасида эдим. Мен жамиятнинг туб-тубигача тушиб, майхонанинг ҳамма малайлари билан ағанаб ичишдим. Биласанми, исмлари қанақа? Том, Дик ва Френсис. Гарчи мен ҳозирча Англия қиролимас, бор-йўғи Уэльс шаҳзодаси бўлсан-да, улар учун лутуфу назокатлар подшосиман, негаки Фальстафга ўхшаб бурнимни жийирмайман. Аксинча, оддий хокисорман, яъни кўнглим очиқ. Тож кийганимдан сўнг менга бутун Истчип гумашталари ҳомийлигини таъминлаймиз, деб ваъда қилишди. Айтмоқчи, уларнинг сўзларини эшит. «Ичайлик» ўрнига «қизаришайлик» дейишади. Кружкани бир кўтаришда қуритиш керак, кимда-ким орада нафасини ростлаеа, «бошқатдан ўйнасин» деб ҳар ёқдан қичқиришади ва қайта қуйишни талаб қилишади. Хуллас, чорак соат ичидаги улар билан шу қадар элакишиб кетдимки, энди истаган фуқаро билан истаганча ичишиб, отамлаша өламан. Афсус, Нед, бўлмаганинг.

Менга қара, шакарим... ҳа, айтмоқчи. Мана сенга бир чақмоқ қанд, буни кенжә малай қўлимга зўрлаб тутқазди. У шунақаларданки, инглиз тили бўйича билгани икки-уч калима, холос, масалан: «саккиз шиллингу олти пенс», «марҳамат», «ҳозир, ҳозир», «ярим ой кабинетига ширин мусаллас» ва ҳоказолар. Хуллас, шунақа гаплар, энди нега чақирганимни эшишт. Фальстаф келгунча бирор эрмак топиб турайлик. Сен қўшини хонага чиқ. Мен кенжә малай билан бояги чақмоқ қанд хусусида гап бошлайман. Сен «Френсис» деб уни тўхтовсиз чиқираверасан, токи якки ўргада қолиб, менинг барча саволларимга «ҳозир, ҳозир» дейишдан бўлақ чораси қолмасин. Эшикка чиқ. Машқ қилиб кўрамиз.

Пойнс чиқади.

Пойнс

(саҳна ортидан)

Френсис!

Шаҳзода

Аъло!

Пойнс

(Саҳна ортидан)

Френсис!

Френсис киради.

Френсис

Ҳозир, ҳозир, сэр! Ральф, қирмизи хонага қарай қол.

Шаҳзода

Бу ёққа кел-чи, Френсис!

Френсис

Нима истайдилар, милорд?

Шаҳзода

Френсис, яна югурдак бўлиб қанча хизмат қиласан?

Френсис

Беш йил, худо ҳаққи, сўзим чин, агар ҳисоблайдиган бўлсак...

Пойнс

(Саҳна ортидан.)

Френсис!

Френсис

Хозир, ҳозир, сэр!

Шаҳзода

Беш йил! Ё тангриим, шунча муддат ичида идиштовоқ жонга тегса керак. Менга айт-чи, Френсис, хўжанинингга қараб тураверасанми? Муддатидан олдин жуфтакни ростласанг, нима қиласан?

Френсис

О сэр, мен Англиядаги жамики инжили шарифларга қасам ичаманки...

Пойнс

(саҳна ортидан.)

Френсис!

Френсис

(кетмоқчи бўлиб.)

Ҳозир, сэр.

Шаҳзода

Ешинг нечада, Френсис?

Френсис

Ҳозир ҳисоблайман. Майрамазонда...

Пойнс

(саҳна ортидан.)

Френсис!

Френсис

Ҳозир, сэр. (Кетмоқчи бўлиб.) Бирпас сабр қилинг, милорд.

Шаҳзода

Фақат бир дақиқа, Френсис. Мен ҳалиги, ўзинг менга берган чақмоқ қанд хусусида. У бир тийинлик қанд эди шекилли, шунақами?

Френсис

(изига қайтиб.)

Афсуски, икки тийинлик эмасди.

Шаҳзода

Мен ўшани деб сенга истаган пайтингда нақд минг фунт бераман.

Пойнс

(саҳна ортидан.)

Френсис!

Френсис

Ҳозир, ҳозир.

Шаҳзода

Ҳозир дейсанми, Френсис? Иўқ, бесабр бўлма. Ҳозирмас. Аммо эртага ёки келаси пайшанба куни, марҳамат. Лекин Френсис...

Френсис

Лаббай, милорд.

Шаҳзода

Лекин бир шартим бор. Анави чарм камзул кийиб, шиша тугмалар қадаб, сочини хўрзанинг тожидек диккайтириб олган, қизил узук тақиб, боғичли қора пайпоқ кийган, испан терисидан сумкаси бор, ширинсухан жанобни боплаб шилишинг керак.

Френсис

Ё худойим, кимга шама қиляпсиз, сэр?

Шаҳзода

Демак, сизларда ичиш учун қизил мусалласдан бошқаси йўқ экан-да. Эҳтиёт бўл, Френсис, нимчангни суркаб олма. Йўқ, аъло ҳазратим, Барбаристонда бу рўй бермас эди.

Френсис

Маъзур тутинг, милорд, тушумаяпман.

Пойнс

(саҳна ортидан.)

Френсис!

Шаҳзода

Марш, алвасти! Сени чақиришяпти. Эшитмаяпсанми? (Шаҳзода ва Пойнс уни дамба-дам чақира бошлийдилар. У гоҳ у ёққа, гоҳ бу ёққа югуради.)

Бу фетчи киради.

Бу фетчи

Бу қанақаси? «Френсис» деб чақиришсаю сен бунда қаққайиб турсанг? Қани тезроқ, анави хонага, меҳмонлар ёнига югар!

Френсис кетади.

Милорд, кекса сэр Жон билан беш-олти киши келди. Киришсинми?

Шаҳзода

Ҳа, бирпас туриб.

Буфетчи кетади.

Пойнс!

Пойнс киради.

Пойнс

Ҳозир, ҳозир, сэр!

Шаҳзода

Фальстаф бошқалар билан эшикда кутиб турибди.
Ҳозир қанақа томоша бўлишини тасаввур қиласанми?

Пойнс

Бир мазза қиларканимиз-да. Хўш, малай билан ҳазилингиз қандай тугади?

Шаҳзода

Ҳозир калламга шунаقا бир қулгили фикр келдики,
дунё дунё бўлиб бунақасини кўрмаган.

Френсис · шароб кўтариб киради.

Соат неча бўлди, Френсис?

Френсис

Ҳозир, ҳозир.

(Кетади.)

Шаҳзода

Ажабо, сўзни бир тўтича ҳам билмайдиган мана шу болани аёл киши туққанми ўзи? Туриш-турмуши—зинапоя бўйлаб у ёқдан-бу ёққа югуришу айтар сўзи—майхона ҳисоб-китоблари, холос. Ана, қўряпсанми, мен ҳали ўзимни босиб олганимча йўқ. Менга Перси Ҳотсперга, шимолнинг ўша «олов товони»га етишишга йўл бўлсин. У эрталабданоқ юзтacha шотландни чўзилтириб, нонушта олдидан қўл юваркан, хотинига ҳасрат қилади: «Бу осойишта ҳаёт жонимга тегиб кетди, чинакам ишга чанқовман». Хотини сўрайди: «Азизим Гарри, бугун неча кишини ўлдирдинг?» «Саманни суғоринглар»,—дейди у ва бир соатдан сўнг жавоб беради. «Қўпмас, ўн тўрттасини. Э, шу ҳам иш бўптию». Энди Фальстафни чақириш мумкин. Мен Гарри Перси бўламан, анави маҳлуқ эса Мортимер хоним, яъни, менинг хотиним бўла қолсин. Ароқхўрлар қичқиргандек: «Pivo!» Қани, бу ёққа судранглар ўша қийма дўлмани, мой тепани тортинглар бу ёққа!

Фальстаф, Гедсхиль, Бардольф, Пето ва

Фрэнсис кирадилар.

Пойнс

Салом, Жек. Қаёқларда юрибсан?

Фальстаф

Қўрқоқларга қирон ва лаънатлар! Омин, илоҳи шундоқ бўлсин. Бир стакан шароб, йигитчал! Мен энди сенларга ўртоқ эмасман. Тўқийман, пайпоқ ямайман, кашта тикаман—мана, менинг машғулотим. Ҳа, ҳа.

Мен сенга айтдим шекилли бир стакан шароб деб, галварс? Дунёда мардоалик қолмабди.

Френсис шароб тутади. Фальстаф ичади.

Шаҳзода

Сен сира ёз қүёшида билқиллаб эриган бир товоқ сариёғни кўрганмисан? Манави терга ботган харсанг тошга бир қараб қўй.

Фальстаф

Шаробга оҳак қўшибсан, муттаҳамлар!*

(Сепиб юборади.)

Френсис кетади.

Ҳаммаёқда иуқул қаллоблик. Аммо қўрқоқлар галаси оҳак қўшилган шаробдан ҳам баттар. Лаънати қўрқоқлар! Қари Жек, сен собит туравер! Ўлсанг, имоннинг бутун кетади. Агар дунёда мардлик, ҳақиқий мардоаликдан асар қолган бўлса, мени шўрбалик, деб атай қолинг. Бутун Англияда дорга осилмаган учта ҳам ботир қолмаган. Биттаси тўлишиб, қариб боряпти, худо, уни паноҳингда асра. Нимасини айтасан, дунё расво бўлди-қўйди. Нега мен бўзчи бўлмадим? Бўзимни тўқиб, оятларни ўқиб юраверардим. Илоё, қўрқоқларга қирон келсин.

Шаҳзода

(Фальстафга яқинлашиб.)

Нималар деб жавраяпсан, жун халта?

* Майхона эгалари нордонлигини камайтириш учун ёмон шаробга оҳак қўшишган. (Тарж.)

Ф альст а ф

Қиролзода эмиш, сени қараю! Битта ўқлоги билан ўзингни ҳам, ўзингга қўшиб фуқаролариңгни ҳам бир гала ғоздек қийқиратиб, мамлакатингдан қувмасам, мен ҳам юрган эканман. Уэльс шаҳзодаси эмиш, сени қараю!

Шаҳзода

Вой, қари тўнка-ей, бу нима деганинг тарин?

Ф альст а ф

Хўш, сенлар қўрқоқлик қилмадиларингми, сен билан Пойнс?

Пойнс

Мени яна бир бор қўрқоқ, деб кўр-чи, қорнингни ёраман, сен текинхўрни!

Ф альст а ф

Сени қўрқоқ дейишми? Улсам ўламанки, унақа демайман. Бунинг ҳожати ҳам йўқ. Сенга ўхшаб қочишини ўрганиб олишим учун мен минг фунт беришга ҳам тайёрман. Жаноблар, белларингиз роса хипча экан. Эҳтимол ўшунинг учундир, одамларга орқа ўғирганда, уялиб-нетиб турмайсиз. Шу ҳам мададкорлик бўлдию. Жин урсин бунақа мададкорликни! Менга хавф-хатарга тикка қарайдиган йигитлар керак. Бир стакан шароб, йигитча. Эрталабдан бери бир қатра ҳам тотганим йўқ, ўлай агар.

Шаҳзода

Ҳозиргина ичдинг, ҳатто лабингни ҳам артганингча йўқ.

Френсис бошқа стакан кўтариб киради.

Фальстад

Аҳамиятсан. (*Ичади.*) Илоё, қўрқоқларга қирон келсин!

Френсис кетади.

Шаҳзода

Хўш, нима демоқчи бўласан?

Фальстад

Демоқчиманки, биз тўртовлон кеча кечқурун нақд минг фунт ақчани қўлга киритдик.

Шаҳзода

Қани ўша ақчалар, Жек? Чўз бу ёққа.

Фальстад

Қани ўша ақчалар эмиш! Биздан тортиб олишди. Тўртталадамизга юз киши ҳамла қилди.

Шаҳзода

Наҳотки юз киши?

Фальстад

Үнтаси билан юзма-юз туриб икки соат олишган бўлмасам, мени аблажи, лани деб атайнер. Бир бало

қилиб, қутулиб қолдим. Найза билан нимчамнинг саккиз еридан, иштонимнинг тўрт жойидан илма-тешик қилишди. Қалқонимни ғалвир қилиб ташлашди, қиличим дастарраға ўхшаб қолди. Мана, кўриб қўйинг! (*Қиличини кўрсатади.*) Мен қўлимга қурол олганимдан буён бунаقا жанг қилмаганман. Лекин бари бекор кетди. Илоё, қўрқоқларга қирон келсин! Сўранг, бошқалар ҳам айтиб беришсан. Ҳақиқатдан зарра тойишса борми, улар — жаҳолат болалари, касофат бандалари, вассадом.

Шаҳзода

Хўш, жаноблар? Нима бўлди ўзи?

Гедсхиль

Биз тўрттовлашиб ўн кишига ҳужум қилдик.

Фальстраф

Йўқ, ками билан ўн олти киши эди, милорд.

Гедсхиль

Тутиб, қўлларини боғладик.

Пето

Йўқ, йўқ, боғламадик.

Фальстраф

Бекорларни айтибсиз, биз уларни боғладик, биттабитталаб боғладик. Ёлғон айтсан, майли, мен яҳудий, энг қадимий яҳудий бўла қолай.

Г е д с х и л ь

Улжани бўлишаётганимиэда олти ёки етти киши етиб келиб, бизга тикка ҳўжум қилишди.

Ф а л ь с т а ф

Улар ҳалигиларнинг қўлларини ечишди. Уларга яна янгилари келиб қўшилаверди.

Ш а ҳ з о д а

Сиз ҳаммаси билан солишдингиэмий?

Ф а л ь с т а ф

Балли, ҳаммаси билан! Бу ёғи қандоқ тушунишга боғлиқ. Агар элликтаси билан солишмаган бўлсан, мени бир бойлам сабзи, деб атайвер. Бордию бечора кекса Жекка ташлангани эллик икки ёки эллик учдан кам бўлса, майли, мен икки оёқли маҳлуқ эмасман.

Ш а ҳ з о д а

Ҳайтовур, улардан бирортасини ўлдириб-нетмагандирсан, худо асрасин.

Ф а л ь с т а ф

Ҳа, бундоқ пайтда тангри таоллога илтижоларинг фойдасиз. Иккитаси шундоқ кўз ўнгимда тузланди-қолди. Яна иккитаси, плаш кийган икки аблаки мендан таъзирини еди. Гарри, маҳобат қилаётган бўлсан, кўзимга тупур-да, мени қари-қирчанғи, деб атай қол. Менинг мудофаа усулимни биласан-ку. Қара, ҳимояга мана бундоқ қилиб турдим, қиличимни мана бундоқ

қилиб кўтардим. Шу пайт плаш кийган яна тўртта хум-пари аллақайси гўрдан пайдо бўлиб қолди.

Шаҳзода

Тўртта! Ҳозиргина иккита, дединг шекилли.

Фальстад

Тўртта, Гарри. Мен тўртта, дедим.

Поинс

Ҳа, ҳа, у тўртта, деди.

Фальстад

Тўртталаси қаторлашиб меяга ҳамла қилди. Мен ҳам ўйлаб-нетиб ўтирумадим, шундоқ қилдимки, еттовининг ҳам қиличи қалқонимга шундоқ санчилди-қолди.

Шаҳзода

Еттовининг? Боя тўртта эди-ку.

Фальстад

Плаш кийганми?

Поинс

Ҳа, плаш кийган тўртталови.

Фальстад

Қиличим сопига қасамёд қиласманки, улар еттига эди. Наҳот мени шу қадар алдоқчи, деб ўйласанг?

Шаҳзода

Сўзини бўлма. Уларнинг сони энди ошаверади.

Фальстраф

Мени эшитяпсанми, Гарри?

Шаҳзода

Бутун жисмим қулоқ.

Фальстраф

Эшит, ҳа, эшитиб қол, армонда қолиб юрма тарин.
Хуллас, ҳалиги плаш кийган тўққизтаси...

Шаҳзода

Айтмадимми? Яна иккита қўшилди.

Фальстраф

Улар чекина бошлишди. Қараб турармидим, етиб бордиму ўн биридан еттитасини гумдон қилдим.

Шаҳзода

Ажабо! Плаш кийган ўн икки киши ўн биттага етса-я!

Фальстраф

Шунда яшил кийим кийган учта ҳаромиси етиб келса бўладими! Қоронғиликни паноҳ тутиб, орқадан ташланишди. Шундоқ зим-зиёки, кўзингни йириб боқсанг

ҳам, ҳеч балони кўрмайсан. Сен бўлсанг, Гарри, ҳатто ўз қўлингни ҳам таниёлмасдинг...

Шаҳзода

Бу сафсаталар худди эгасига ўхшайди. Шу қадар аҳмоқона ва шу қадар ошириб-тоширилганки, сохта авра-астари шундоқ кўриниб турибди. Эҳ, сен, сули солинган емхалта, беномус текинхўр, эҳ, сен, итвачча, ифлос ёғмунди...

Фальстраф

Хой, эсингни йиф, оғзингга қараб гапир! Ислот қилинган нарсани нега инкор қиласан?

Шаҳзода

Ҳатто ўз қўлингни ҳам танимайдиган қоронғу зимзиёда қандоқ қилиб яшил кийганларни пайқадинг? Қани, тушунтириб бер-чи. Хўш, бунга нима дейсан?

Пойнс

Ҳа, ҳа, бизга тушунтириб бера қол, Жек.

Фальстраф

Шунақами — ҳамманг бир кишига ёпишасанми? Бунақа зўрлайдиган бўлсаclarинг, оғиз очмайман. Жин урсин, мен ҳатто энг даҳшатли қийноқ остида ҳам гапирмасдим. Зўрлаб гапиртириш осон бўптими! Балки жавобим супургидан ҳам арzonдир, лекин зўрлик остида уни айтиб бўман.

Шаҳзода

Мен сени бошқа зўрлаб ўтирумайман. Жаноблар, эшиитмадим, деманглар. Манави ашаддий қўрқоқ, отларнинг белию каравотлар кушандаси, мана шу бир халта гўшт...

Фальстраф

Ҳай-ҳай, секинроқ, қилтириқ, ўлакса, бузоқ тили, балиқ териси! Ўз нимжонлигинг билан нималарга ўхшашлигингни санашга товуш ҳам етмайди. Яххиси, дамингни юта қол, газчўп, ўқсиа садоқ, чархланавериб, адo бўлган кемтик шашпар! (*Нафасини ростлайди.*)

Шаҳзода

Балли, нафасингни ростлаб, давом эттиравер. Бемаъни ташбиҳларингни айтиб адo қилгину кейин марҳамат қилиб, мени тингла.

Поинс

Ҳа, ҳа, сен уни тинглай қол, Жек.

Шаҳзода

Тўрттовлашиб тўрт кишига ҳужум қилганларингни, уларни боғлаб, бор-будини тортиб олганларингни кўриб турдик. Энди мен яна бир нималар дейман, шунда сендан ҳеч вақо қолмайди. Биз икковлашиб сенларга ҳужум қилдик, сенлар халта-хултани ташлаб, тирақайлаб қочдиларинг. Үлжалар шу ерда, истасаларинг, кўрсатишимиz мумкин. Лекин сен, Фальстраф, лаш-лушингни кўтариб, чунонам қочдингки, қочаётib, зотдор буқага ўхшаб бўкириб ҳам бердинг. Хўш, шунча шарманга

далиқдан сўнг қиличингни атай тўмтоқлаб, жангда шундоқ бўлди, деб бизни ишонтиришга уринишинг—ўта бир пасткашлик эмасми? Қизиқ, шунча расволикдан сўнг ўзингни оқлаш учун тагин нималар тўқий оласан?

Фальстаф юзини қалқон билан яширади.

Пойнс

Ростданам қизиқ, Жек, тагин нималар тўқий оласан?

Фальстаф

(қалқонни итқитиб ташлаб.)

Ўшанда мен сизни бир қарашдаёқ танидим. Худо ҳаққи, худди ўз отамни танигандек. Хўш, ўзингиз инсоф билан айтинг-чи, мен қўлда қурол билан тоҷ-тахт ворисига ташланармидим? Тўсатдан ўлдириб қўйсам, нима бўлади? Биласан, Гарри, мен Геркулесдек баҳодирман. Бир бошласам, мени ҳеч нарса тўхтатолмайди. Савқи табиийдан бошқа... Арслон ҳам ҳақиқий шаҳзоғдани бир қарашда таниб олади ва ҳеч қачон унга даф қилмайди, ҳа, ҳа, ўйлаб қаранг! О, савқи табиий — буюк куч. Бугун чўчиридим, негаким, савқи табиий тўхтатиб қолди. Мен бу билан икки карра фахрланаман. Арслон сезгиси мени алдамагани учун — бир, подшозода эканлигинг дарров аён бўла қолганлиги учун — яна бир карра. Биз вақтни нимага сарфляпмиз, йигитлар! Худо ҳаққи, ақчалар ёнингизда шай эканлигидан хурсандман. Бекам эшикларни бекит. Тунда айш қилиб, тонгда тавба қиласиз. Айшингни сур, азаматлар! Болаларим, ботирларим, сизга садоқатимни қандай изҳор этай? Қани, базмни бошла! Яхшиси, бирорта комедия ўйнаймиз!

Шаҳзода

Айни муддао. Мавзу — сенинг қочишинг.

Фальстад

Бас қил энди, Гарри! Мени яхши кўрсанг, бу ҳақда оғиз очмайсан.

Майхона бекаси киради.

Бека

Е қудрати Исо, милорд шаҳзодам!

Шаҳзода

Хўш, милоди бекам, нима гап?

Бека

Оҳ, милорд, саройдан бир аъён келиб, сизни йўқлаяпти. Отангиз юборганмишлар.

Шаҳзода

Унда ўша аъённи саройга, ойимнинг ҳузурига жўнат.

Фальстад

Ўзи қанақа: ёшми, қарими?

Бека

Чол.

Ф альст а ф

Нега бўлмасам, шу маҳалда тўшакда ётмай, санди-
рақлаб юрибди? Мен гапиришиб кўрсаммикин?

Шаҳзода

Шундоқ қила қол, Жек.

Ф альст а ф

Бўлти. Мен уни шайтоннинг ҳузурига жўнатаман.

(Кетади.)

Шаҳзода

Хўш, жаноблар, худо шоҳид, мардона жанг қил-
дингиз. Сизни айтяпман, Пето, Бардольф, сизни. Шер
экансиз, савқи табиий дегани ҳам сизда чаккимас, ҳа-
қиқий шаҳзодани кўрибоқ, ура қочиб қолдингиз.

Бардольф

Қарасам, бошқалар қочяпти, мен ҳам қочавердим.

Шаҳзода

Ростини айтинг, нега Фальстраф қиличининг дами
қайтиб, арпа-арпа бўлиб кетган?

Пет о

Бу ёғи маълум. У қиличини ҳанжар билан арралаб,
ҳарна бўлганда ҳам шу жангда бўлган, деб ишонтира-
санлар, лея қулогимизга қўйди. Кейин, шундоқ қилинг-
лар, деб бизга ҳам ташвиқот қилди.

Бардольф

Бурунларни чақириканак билан қонатиб, кўйлакларга суркашни, кейин уни шаҳидларнинг қони деб аташни маслаҳат берди. Буларни эшитиб, кейинги ўн йил ичидаги биринчи марта худди болаликдагидек қип-қизариб кетдим.

Шаҳзода

Ростданам-а? Бир стакан шароб ўмарид, қўлга тушганингдан буён юзинг шолғомдай-ку. Ўн саккиз йилдан буён бурнинг лов-лов ёнади. Худди замбаракнинг пилигидек! Шундоқ замбарак пилиги билан жуфтакни ростладинг! Қандай савқи табиий сени бу аҳволга солди?

Бардольф

(бурнини кўрсатиб)

Сиз манави шафақ ва шимол шуъласини айтаяпсиз шекилли?

Шаҳзода

Ҳа, ўшаларни.

Бардольф

Сизнинг-ча, бу қизилликнинг маъноси нима?

Шаҳзода

Ичкилик ва фақирлик.

Бардорльф

Йўқ, таг-тубидан олиб айтганда, бунинг маъноси жizzакилик.

Шаҳзода

Э, йўқ, таг-тубидан олиб айтадиган бўлсак, унинг маъноси — дор.

Бардорльф ранжиб, кетиб қолади.
Фальстраф қайтиб киради.

Мана қоқ-суяк, қилтириқ Жек ҳам келиб қолди.
Хўш, парёстигим, нима гап? Менга айт-чи, Жек, тиззалингни кўрмаганингга неча йил бўлди?

Фальстраф

Тиззаларимни? Сенинг ёшингда, Гарри, ажаб мўрчамиён эдим ва бош бармоқда тақиладиган эркак узукка бемалол сиғаверардим. Мени дилсиёҳликлар шу кўйга солди. Ҳадеб «уф» торта бериш кишини ачиған хамирдек кўпчитиб юборади. Нима гап, дейсанми? Иш чатоқ, оғайни. Отангнинг буйруғи билан сени йўқлаб келган сэр Жон Бреси экан. Сени эрталаб саройга чақиришяпти. Анави шимолдан чиққан бебош Перси бор-ку, ўша, кейин Уэльсдан чиққан анави, иблиснинг қорнини ёриб, азроилнинг бурнини қонатган, шайтонни эшшак қилиб миниб олган анави бор-ку, сен биласан у жин ургурни...

Пойнс

Ҳа, Глендаурми?

Фальстад

Ҳа, Оуэн, худди ўзи. Ҳўш, ўша Оуэн, унинг күёви Мортимер, кекса Нортумберленд ва ашаддий шотланд Дуглас, ўша тоқقا ҳам тикка от қўйиб чиқадиган...

Шаҳзода

От қўйиб бораркан, тўппончасидан ўқ узиб, учиб кетаётган чумчуқни урадиган, шундоқми?

Фальстад

Ҳа. У ботирликни бирордан қарз олмайди. Қочадиганлардан эмас.

Шаҳзода

Ҳозиргина қочишини таърифладинг шекилли?

Фальстад

От мингандаги деяпман, нодон, Пиёда пайтида у чекинмайди.

Шаҳзода

Савқи табиий буюрса-чи?

Фальстад

Савқи табиий буюрса — бошқа гап. Хуллас, ўша шотланд, кейин қандайдир Мордейк, яна минглаб кўк қалпоқлилар хуруж қилишибди. Тунда Вустер қочиб кетибди. Буни эшитиб, отангнинг соқоли оппоқ оқариб

қолибди. Ҳозир ернинг баҳоси бир сават сасиган балиқ эмиш.

Шаҳзода

Ёзгача бу ғала-ғовур тинчимас экан, одамзод уруғи тағин ҳам арzonлашиб қолади. Одамларни худди михга ўхшаб ҳовуч-ҳовучлаб сотишаверади.

Фальстраф

Рост айтасан, дўстим. Саноатнинг бу тармоғи роса гуллайди. Лекин ичингда қанчалар қўрқиб кетганингни сезиб турибман, Гарри! Сен ҳақсан, тож-таҳт йўлида сенга анави алвости Дуглас, анави жодугар Перси ва анави иблис Глендаурдан қўрқинчлироқ хавф-хатар йўқ. Бу сени даҳшатга солади, шундоқ эмасми? Ҳозир қонларинг ҳам музлаб кетгандир?

Шаҳзода

Сирайм-да. Афтидан сендаги савқи табиий менда йўқ шекилли.

Фальстраф

Хўп, яхши. Аммо эртага отанг ҳузурида сени роса исканжага олишади. Мени оғайни десанг, шунга шайланиб тур.

Шаҳзода

Бўпти, Фараз қилайлик, сен менинг отамсан. Юриш туришим ҳақида мени сўроқ қил, мен жавоб бераман.

Ф альст аф

Жуда соз. Манави курси — менинг тахтим, манави пичоқ — давлат нишоним, манави ёстиқ — бошимдаги тожим бўлсин.

Шаҳзода

Демак, тахт — бор-йўғи бир курси, давлат нишони — қалайи пичоқ, олмос қадалган тож — сенинг ялтираган, тап-тақир бошинг экан-да!

Ф альст аф

Агар сенда олижанобликдан зиричча асар қолган бўлса, мен сенга таъсир эта оламан. Бир стакан шароб беринг, кўзларим қизарсан, гўё йиглаган бўлай. Мен «Подшо Қамбиз»да ўйнагандек, астойдил, берилиб ўйнайман. (Ичади.)

Шаҳзода

Мана, қаршингда тиз чўкаман.

Ф альст аф

Бўлмаса, эшиит. Йўл беринг, баҳодирларим.

Б ека

Е қудрати Исо, қандай ажойиб-al

Ф альст аф

Йиглама, маликам. Кўзёши — бекор.

Бека

Шўрлик отанг қанчалар хафа бўляпти.

Фальстад

Лордлар, ўтинаман сиздан, олиб чиқингиз
Аччиқ-аччиқ йифлаётган маликамизни.

Бека

Е қудратингдан, қандай устамон-а! Аnavи ярамас
комендиантларнинг худди ўзи!

Фальстад

Жим бўл, пиво кружка! Халал бермай тур, ачиган ароқ! Гарри, мен вақтингни қандоқ ўтказишингнимас, кимлар даврасида ўтказишингни ҳам эшитиб, аросатдаман. Нега десанг, мойчечак қанча қуюқ ўсса, уни шунча кўп пайхон қилишади, ёшликтинг йўриги бошқа. Уни қанча кўп совурсанг, шунча тез адо бўлади. Ўғлим, бир ёқдан онангнинг айтганлари, иккинчи ёқдан — ўзимнинг мушоҳадаларим, ҳаммадан ҳам — кўзингни бундоқ чақчайтириб, пастки жагингни жоҳилларча осилтириб туришинг шундан далолат бериб турибди. Хўш, сен менинг ўғлимсан, хўш, мумкинмидирким, ҳалойиққа кулги-масхара бўлиб юрсанг? Мумкинмидирким, қўёш, ёнбошлаб ётсаю ялқовлик қилиб, ишдан бўйин товласа? Бундоқ савол бериш бемаъни ва у ҳеч кимни қизиқтирмайди. Хуш, мумкинмидирким, Англия тожу тахтининг вориси ўғирлик йўлига кирсаю киссавурлик қилса? Бундоқ савол бериш ўринли ва буни муҳокама этса арзийди. Шундоқ нарсалар борки, Гарри, эҳтимол эшитгандирсан, бизнинг давримизда уни қора-

мой, деб аташади. Қорамой суркалади, деб таълим беради, қадим ҳукамолар. Сен орасида юрган оломон ҳам сенга шундоқ суркалади, сени булғайди. Шунинг учун ҳам, Гарри, сен билан ичмасимданоқ кўзлаrim ёшга тўлиб, эрмак учунмас, алам-изтироб билай гаплашяпман, гапларим калималаргамас, оҳу надомат, фифону фарёдлар билан тўлиб-тошган. Аммо ораларингда баҳарҳол чинакам бир инсон бор, неча бор кўрганман, лекин афсуским, отини билмайман.

Шаҳзода

У қандоқ одам экан, ҳазрати олийлари?

Фальстаф

У кўркам, басавлат бир зот, ҳа, жуссаси ича тўлароқ. Кўриниши ҳамиша ҳушчақчақ, кўзлари ёқимтой ва ҳаракатлари бағоят мутаносиб. Ёшини элликларда ёки олтмишларга яқин тахмин қилса бўлади. Дарвоқе, эсладим, уни Фальстаф дейишади. Уни хотинбоз дейишса, бундоқ уйдирмага мен ишона қолардим, негаким, Гарри, унинг кўзларида олижаноблик мъянолари чақнайди. Даражатни мевасидан, мевани даражатидан танигандек, ўша Фальстаф дегани менимча, ниҳоятда олижаноб бир киши. Ўша билан дўст тутинавер, аммо бошқаларни ҳайда. Хўш, энди менга айт-чи, сен ярамас саёқ, бир ой қаёқларда гумдон бўлдинг?

Шаҳзода

Ҳой, жинни-пинни бўлдингми? Подшо деган шунақа дейдими? Яхшиси, сен мени ўйна, мен отамни ўйнайман.

Ф альст а ф

Ана холос! Мени қулатмоқчимисан! Ташаккур. Агар келиштириб, мен ўйнаганнинг ярмича ўйнай олсанг, майли, мени гўшт дўконида қуёндек қилиб, оёғимдан осавер.

Шаҳзода

Келишдик. Мана, мен ўтиридим.

Ф альст а ф

Мен эса тикка турибман. Жаноблар, ҳукм қилинглар.

Шаҳзода

Хўш, Гарри, қаёқларда юрибсан?

Ф альст а ф

Истчипда эдим, подшоҳим.

Шаҳзода

Үғлим, устингдан арз-дод бениҳоя бисёр.

Ф альст а ф

Жин урсин, милорд, ҳаммаси бўғтон. (*Атрофдаги-ларга.*) Мен шаҳзодани шундоқ ўйнайки, оғизларинг ланг очилиб қолсин!

Шаҳзода

Сен ҳали сўкинняпсанми, тирмизак? Йўқол кўзимдан! Сени йўлдан оздиришяпти. Шайтон қари бақалоқ

қиёфасида изингдан изғиб юрибди. Ўша тавия сен билан дўст тутинибди. Хўш, нега ўша тўнка билан ошначилик қиласан, а? Ахир у одаммас, разолатнинг уяси-ку, шаробдан шишиб кетган меш, бозор қозонида бўтқада бус-бутун қовурилган ҳўкиз-ку. Ичкилик ичишдан бўлак қўлидан нима келади? Ахталаниб боқилган хўрозни бурда-бурдалаб, паққос туширишдан бошқа нимани билади? Алдоқчилик ва пасткашликтан бўлак бирор ҳунари бормикан? Бирор фазилати борми? Иўқ. Қасофати-чи? Бижғиб ётибди.

Ф альст а ф

Жаноби олийлари, марҳамат қилиб айтсалар, кимни кўзда тутяпсиз?

Ш аҳ з о д а

Мен ўша ёшларни йўлдан оздираётган, лаънати ҳароми, қари иблис Фальстафи кўзда тутяпман.

Ф альст а ф

Милорд, мен у зотни танийман.

Ш аҳ з о д а

Мен ҳам шундоқ деб ўйлайман!

Ф альст а ф

Лекин бирор жиҳатдан уни ўзимдан паст дейишга ботинолмайман. Афсуски, қарилиги рост, оппоқ соч-соқоли бундан шаҳодат бериб турибди. Аммо ижозатнингиз билан, уни бузуқи деб аташни қатъян рад этаман. Ширин мусаллас ичиш жиноят саналса, унда

менга таниш бўлган барча майхона эгалари ўлим жа-
зосига мустаҳиқ бўлишлари лозим. Агар семизлик, тў-
лалик нафрат уйғотса, фиръавилярнинг қоқ-суяқ сигир-
лари муҳаббат қўзғотармикин? Йўқ, марҳаматли шо-
ҳим! Майли, Петони қувинг, Бардольфни ҳайданг,
Пойинснинг қорасини ўчиринг. Лекин олижаноб Жек
Фальстафга, жасур ва оқкўнгил Жек Фальстафга ға-
йир кўз билан боқманг, ахир қари бўлса ҳам нақадар
довюрак у. Уни Гарридан айирманг, Гаррингизни етим
қилиб қўйманг. Ёнида семиз Жек бўлмас экан, ундан
бутун дунё юз ўгиради.

Шаҳзода

Энди фойдаси йўқ. Мен уни ҳайдайман.

Эшик қоқилади. Майхона бекаси чиқади.
Юрганича Бардольф киради.

Бардольф

Шаҳзодам, шаҳзодам, шериф бир тўда соқчилар
 билан эшикда турибди.

Фальстаф

Даф бўл, қасанғи! Томошанинг белига тепма. Ҳали
Фальстаф фойдасига келтирадиган далилларим кўп.

Майхона бекаси шошилинч киради.

Бека

Ё қудрати Исо! О милорд, милорд!

Шаҳзода

Сёкинроқ, нима гап ўзи? Гўё камонга миниб олган шайтонни кўргандайсизлар.

Бека

Шериф соқчилар билан эшикда турибди. Улар уйни тинтуб қилишмоқчи. Нима қиласай, қўяйми?

Фальстад

ЭсингдА тут, Гарри, асл олтиннинг қадрига ет, уни сариқ чақа билан аралаштирма. Гарчи ақли-ҳуши бутун кўринсанг ҳам аслида қип-қизил жиннисан.

Шаҳзода

Сен бўлсанг, қип-қизил қўрқоқсан, ҳар қандай савқи табиийдан маҳрум бир қўрқоқ.

Фальстад

Дашномингга тупурдим, сен эса шерифга тупур. Сен мени сотмайсан, деб умид қиласан. Агар шерифдан мени ҳимоя қилмасанг, болалигимга қасамёд қиласанки, дор остида тихирлик қилиб ўтирамайман, арқон бошқаларни бўққандек, мени ҳам хиспа бўғади-қўяди.

Шаҳзода

Сен парда ортига ўтиб тур, жаноблар, сиз чердакка чиқинг. Ҳой, ўзингизни қарчигайдек тикка тутинг, виждони пок, номусли кишиларга ўхшаб.

Фальстад

У деганинг бир замонлар менда ҳам бор эди, қадим

замонларда. Яхшиси, бекиниб олай. (Парда ортига яширинади.)

Бардольф, Гедсхиль ва Пето кётадилар.

Шаҳзода

Шерифни чақиринг!

Майхона бекаси кетади. Шериф аравакаш билан киради.

Хизмат, жаноб судья?

Шериф

Гуноҳимни маъзур тутинг, милорд. Бу уйга Яшириниб олмиш неча қингир кимсалар.

Шаҳзода

Масалан, ким?

Шериф

Ушалардан биттаси маълум.

Дум-думалоқ семиз.

Аравакаш

Худди мойтела дейсиз.

Шаҳзода

У ҳозир йўқ. Жўнатганман уни бир ёқقا.

Аммо, судья, амин бўлинг, худди эртага

Ҳузурингизга бориб, у ҳозир бўлади.

Нима айби бўлса, шунда жаъоб беради.

Хўш, шу билан кетиш учун сизга ижозат.

Шериф

Хўп, ҳозир кетаман, милорд. Икки жанобнинг Йўлда икки юз фунтини ўғирламишлар.

Шаҳзода

Эҳтимол. У ўғирлаган бўлса мабодо,

Бунинг учун жавоб берар. Хайр бўлмасам.

Шериф

Хайрли тун бўлсин сизга, азиз шаҳзодам.

Шаҳзода

Тўғри бўлур, хайрли тонг, дейилса балки.

Шериф

Сўзингиз ҳақ, милорд. Соат эрталаб икки.

Шериф ва аравакаш кетадилар.

Шаҳзода

Бу мойтумшуқ авлиё Павел ибодатхонасида ҳам машҳур. Қани, торт бу ёққа!

Пойнс

Фальстаф! (*Пардани юлқиб очади.*) Үликдек ухлабди, отдек пишқиради.

Шаҳзода

Ҳа, чиндан ҳам нафас олиши оғир! Чўнтакларини ағдар.

Пойнс унинг чўнтакларини титкилайди.

Хўш, нима топдинг?

Пойнс

Қандайдир бир қоғоз, милорд.

Шаҳзода

Кўрайлик-чи, нималар ёзилган экан. Ўқи.

Пойнс

(*Ўқийди*)

«Яна, ахталанган хўрз—икки шиллинг'у икки пенс, яна, бир товоқ соус—тўрт пенс, яна, икки қўза шароб—беш шиллингу саккиз пенс яна, қўшимча шароб, қовурилган балиқ билан—икки шиллингу олти пенс, яна, ярим тийинлик нон».

Шаҳзода

Буни қара-я, бир хум шаробга ярим тийинлик нон! Бошқа қоғозларни бекит, бафуржа ўқиймиз. Уни уйғотма, мириқиб ухласин. Сал туриб саройга бораман. Ҳаммамизнинг жангта жўнашимизга тўғри келади. Сенга бир яхши вазифа олиб бераман. Манави қароқчини пиёда қўшинларга жойлайман. Чопишни ўрганиб олсин. Таланган ақчаларни ошиғи билан қайтарамиз. Эрталаб вақтлироқ ҳузуримга кир, хўп энди, хайр, Пойнс!

Пойнс

Хайр, милорд.

Кетадилар.

Парда

УЧИНЧИ ПАРДА

БИРИНЧИ САҲНА

Бангор, Архидъякон уйида бир хона,
 Хотспер, Вустер, Мортимер ва Глендуар ки-
 радилар.

Мортимер

Ҳамма яқдил. Ва бу ишга дўстлар ҳам рози.—
 Ишнинг бошланиши учун ёмон эмас бу.

Хотспер

Лорд Мортимер, Глендаур, қани, амаки,
 Ўтириңгиз, эҳ, картани унубтиман-ку!

Глендаур

Йўқ, мана у. Уэингиз ҳам ўтириңг, Перси
 Ўтириңг, Хотспер, Сизни шу лақаб ила
 Аташаркан ҳар гал қирол Генрих олдида
 У макон деб сизга самовотни тилайди.

Хотспер

Сизга эса жаҳаннамни.

Глендаур

Бу равшан — аён.

Хўш, нега десангиз, ахир мен туғилганда
Осмон лов-лов ёниб, замин дир-дир титраган.

Ҳотспер

Сиз туғилмай, ойингизнинг мушуги болалаганда ҳам
шундоқ бўлиши турган гап эди.

Глендаур

Сизга яна айтаманки, мен туғилганда
Замин дир-дир титраган деб.

Ҳотспер

Мен ҳам айтаман,
Балки замин сиздан чўчиб қолгандир, аммо
Тан олмайман, истамайман эшлишини ҳам.

Глендаур

Ер чайқалиб турган, осмон ловуллаб ёнган.

Ҳотспер

Эҳтимолки ерни бундоқ қўрқувга соглан
Кўкнинг оловидир, сизнинг таваллуд эмас.
Ахир заминнинг ҳам оғриқ-азоблари бор,
Қорни шишиб, дўппаяркан шўрлик ҳар сафар,
Қалтироққа тушиб, оғир тўлғаниб қолар,
Үйлар ва бутхоналарни оёқдан чалар.
Эҳтимолки, сиз таваллуд топганда замин
Шундоқ тўлғоқ тутиб, оғир тўлғаниб турган.

Глендаур

Мен ҳаётда эътиrozга ўрганмаганман.
 Такрор-такрор айтдим, яна такрор айтаман:
 Мен онадан туғилганда ловуллаб осмон,
 Қўй-эчкilar тоғдан қочиб тушган, подалар —
 Даҳшат ичра бўкиришиб, солишган сурон.
 Хўш, нима бу ва ниманинг каромати бу —
 Қисмат илоҳийнинг ажиб аломати бу.
 Ҳаёт, истиқбол ҳам буни кўрсатди ошкор,
 Ки мен оддий одамлардан эмасман зинҳор.
 Шотландия, Уэльс ва Англияда
 Менга ўргатувчи, сабоқ бергувчи ким бор?
 Йўқ, оламда менга сира баробари йўқ,
 Ки ботиний билимларга дадил йўл солган,
 Сехри — амал ҳунарини эгаллаб олган.
 Мендек соҳиб салоҳият, соҳиб иқтидор.

Хотспер

Балки, ҳақиқатан ҳам уэльсчалаб гапиришда сизга
 тенг желадигани йўқдир. Аммо менга ижозат этинг, бо-
 риб овқатланай.

Мортимер

Баҳслашманг. У ғазабга минади чиндан.

Глендаур

Мен ҳаттоқи арвоҳларни чорлай олурман.

Хотспер

Чорлашга-ку мен ҳам чорлай оламан, лекин
 Ҳамма гап шундаки, улар келишармикин.

Глендаур

Мен ўргатгум шайтонни нақ миниб олишни.

Хотспер

Мен ўргатгум уни қандай мазах қилишни.
 Ҳақиқатни эъзозланг. Бу — шайтонга ўлим.
 Сиз шайтонни жоду билан чақиринг бу дам
 Мен бир қошиқ сувда уни ҳалок этурман,
 Ёлғон айтманг — шайтондац ҳам келасиз устун.

Мортимер

Бу беҳуда тортишувни бас қилинг энди.

Глендаур

Болинброк солишимоқчи бўлиб мен билан
 Ҳузуримга майдон тортиб келди уч карра.
 Уч карра ҳам таъзирини еди.

Хотспер

Афтидан,
 Кўпроқ таъзирини еган ўзингизмасми?

Глендаур

Мана карта. Солавермай пайсалга энди,
 Келишганимиздек, учга бўлайлик ерни.

Мортимер

Ҳа, дарвоҷе, уни бизнинг архидъякон
 Учта тенг бўлакка бўлиб, белгилаб берди.
 Англия,— Северн ва Трентдан бошлиб
 То жануб, то шарққа довур менга тегади.

Уэльс ўлкаси — гарбдан шимолга қадар
Бор бўйича, Глендаур, сенга тегади.
Трентдан то шимолгача қолган тамом ер
Бари сизга тегиши бўлур, сизга, Хотспер.
Мен буюрдим, ёзилмоқда аҳднома-битим,
Уч нусхада бўлур, имзо чекармиз бугун.
Эртага-чи, Вустер, икков елкама-елка
Иўл оламиз Шрусбери — шотландлар сари.
Отангизга ошиқамиз. Қайнотам ҳали
Ултурмаган лашкарини жамулжам этиб,
Биз бир-икки ҳафта уни кутамиз балки.

(Глендаурга)

Сиз унгача битта қўймай сафга тизасиз
Кўни-қўшни, мулоzиму дехқонингизни.

Глендаур

Мен эртароқ балки қувиб етарман сизни.
Хотинларингизни ўзим билан элтаман.
Сиз ҳозирча улар билан хайрлашмангиз.
Йўқ, десангиз, фарёд-фифон бўлур бегумон
Ва бир зумда кўз ёшлардан яралур уммон.

Хотспер

Улушимга қарайпман. Мана Бертондан —
Шимолгача, сизникидир кичик бир қадар.
Ўзи-ку каттамас, лекин неча жойидан
Кесиб ўтар уни қингир-қийшиқ дарёлар,
Улар улушимни тағин кичрайтиб қўяр.
Шунинг учун дарёга мен тўғон соламан.
Унда сокин Трент ҳадеб бурилавермай,
Тўлқин уриб оқар янги, равон ўзандан.
Иланг-биланг оқишига йўл қўймайман — шу,
Токи гул водийни бошқа бузолмасин у.

Глендаур

Иўл қўймайман? Бу сўзингиз кимга ёқади?
Қандоқ оқаётган бўлса, шундоқ оқади.

Мортимер

Яна унутмангким, янги бурилишда у
Менинг улушимни ямлаб-емириб ҳайдот,
Менга зиён келтиради, сизга мукофот.

Вустер

Бу ерда-чи, кўп ҳам ташвиш, харажат қилмай,
Дарё учун янги ўзан қазимоқ мумкин,
Бизга фойда бўлиб қолар манави бурун.

Хотспер

Мен бу ишга меҳнат — маблағ аямам зарра.

Глендаур

Мен қаршиман бунга.

Хотспер

Нима, қаршимисиз?

Глендаур

Ха.

Хотспер

Аммо менинг йўлимни ким тўса олади?

Глендаур

Ким тўса олади? Мана, тўсадиган мен.

Хотспер

Сиз яххиси, айтинг буни уэльсчалаб,
Тушунмайман, истамайман тушунишни ҳам.

Глендаур

Инглизча муомалам сиздан кам эмас,
Англия саройида униб-ўсганман.
Унда арфа жўрлигида куйламоқ учун
Тўқиганман ёшлигимда талай тарона.
Тилингизни бойитишга берганман кучим,—
Биламанки, бу истеъдод сизга бегона.

Хотспер

Беҳад шодман, таҳсин дейман ҳимматингизга.
Қофияли қилиб ёлғон сўқиб-сотгандан
Мушук бўлиб миёвлашни афзал кўраман.
Шамдон қулаб тушар экан ногоҳ жағанглаб,
Ё фидирак гичирласа ёғсираб, ноchor —
Барчасига чидаб, сабру таҳаммул айлаб,
Тинглар эдим, тиш оғриққа бўлмасдим дучор.
Аммоқи шеър қироати — мен учун ўлим,
Оқсоқ байтал юришидек айнитар кўнглим.

Глендаур

Ҳай, майлига, қазий қолинг ўша Трентни.

Хотспер

Арзимайди. Ён-веримга қарамай зарра,
Инъом айлаганман бундан уч карра зиёд.

Аммо лекин одатий иш—муомалада
 Құрсатаман савдолашиб сабр ва сабот,
 Ҳа, аҳднома битилдими? Жүнасак бўлар?

Гленда ур

Кеча ойдин, кундузгидек йўл босиш мумкин.
 Бориб, мирзоларни бир оз шошилтирай-да,
 Хотинларингизни шайлай хайр-маъзурга.
 Бунга қандоқ чидар экан қизим, билмадим,
 Мортимерсиз яшаш беҳад азобдир унга.

(Кетади.)

Мортимер

Қайнотамни қон қиласиз намунча, Персий?

Хотспер

Ахир унинг сўзи жуда жонга тегади.
 Тўйиб бўлдим ўша турфа сафсалардан.
 Кароматли чумолилар ва каламушлар,
 Мерлин жодугарларидан қулогим батанг.
 Қанотсиз қарталлар, ажабтовур балиқлар
 Ва гербларда нақш этилган сирли арслонлар,
 Қандоқ қилиб ҳазм қилай шунча нарсани!
 Кеча ярим оқшомгача мени қийнади
 Санайвериб измидаги шайтонларини.
 Мен-чи, унинг сўзларига қулоқ осмадим,
 Фақат ора-сира «балли», «дуруст» деб турдим.
 У жанжалкаш хотин, қари байталдан баттар,
 У қоп-қора тутун тўлган уйдан ҳам ёмон.
 Мен бу сўқиб-сотишлардан қочардим бадар,
 Майли, жойим сарой эмас, бўлсин тегирмон,
 Емишим май, сомса эмас, сув ва қуруқ нон.

Мортимер

Айтганларинг бехуда. У ажойиб инсон,
 Алломадир, билимларга хазинадир — то,
 Оқ кўнгилдир, марди майдон, хулласи калом,
 Меҳрибонлик, меҳмондўстлик бобида танҳо.
 У севади сизни, иззат-икром қиласди.
 Совуқ жавобларингизни тутади маъзур.
 У бошқани кечирмасди, ҳамма билади,
 Уни бундоқ кулгу-мазах этмаган маъқул.

Вустер

Рости, унга сўз қотасан қўполлик билан
 Айтишгандан айтишасан келгандан буён.
 Иўқ, тўғримас, такаллуфсиз, совуқ бир оҳанг
 Самимият ва қудратдан бўлмагай нишон.
 Бу аслида одобсизлик намойишидир,
 Манманлигу мақтанчоқлик деганлари, бас,
 Шу чоққача ҳеч кимсани безаган эмас.

Хотспер

Раҳмат. Ўзни тутгум энди киборлар каби.
 Хайрлашмоқ учун келди хотинларимиз.

Глендуар қайтиб киради, изидан — леди Мортимер
 билан леди Перси.

Мортимер

Тушунмайман уэльсча бир калима ҳам,
 Инглизча тушунмайди хотиним, Алам!

Глендаур

Қизим, Мортимерни қандоқ қўяман, дейди.
 Дада, аскарликка ўзим бораман, дейди.

Мортимер

Тез орада борасиз, деб айтингиз унга,
Леди Перси билан бизнинг ҳузуримизга.

Глендаур леди Мортимер билан уэльсча гаплашади.

Глендаур

Тош-метин. Эшитишни ҳам истамас нодон.

Леди Мортимер эрига қараб ҳэльччалаб гаг қотади.

Мортимер

Тушунаман. Маржон-маржон күз ёшинг тили
Таржимасиз, изоҳсиз ҳам аёндир менга.

Мен ҳам шу лаҗжада жавоб берардим, лёкин
Ииглаб, күз ёш оқизмоқлик — уятдир менга.

Леди Мортимер эрига қараб яна уэльсчалаб бир нималар
дейди.

Мен туйғулар суҳбатини англай оламан
Бўсаларнинг жарангидан. Қийнасин мени
Машаққатлар—тинчимайман, тинчий олмасман,
То ўрганиб олмагунича уэльсчани.
Сен сўзлар экансан — унда сеҳр ва жило.
У — бир ўрмон ичидаги қасрда маҳбус—
Маликанинг қўшиғидек тараалар гўё.

Глендаур

Узни босинг, оғир бўлинг. Бояқиш ахир
Ақлдан озиши мумкин.

Леди Мортимер эрига яна уэльсчалаб бир нималар дейди.

Мортимер

Авомман, авом —

Рӯпарангда.

Глендаур

Қизим дерки, қамишга бир дам
Ястанинг ва бошингизни тиззамга қўйинг.
Истасангиз, куйлаб берай сиз севган куйни.
Киприкларингизга уйқу илашар дарҳол,
Бир оз енгил тортиб қолар бошингиз унда.
Тингларкансиз, ора йўлда қоласиз гўё,
Уйғоқ — мудроқликда, кечакундуз қўйнида.

Мортимер

Ташаккурлар бўлсин. Уни тинглагум жон деб,
Унга қадар битими ҳам бўлишар ёзиб.

Глендаур

Хўп, бўлмаса ёнбошлангиз. Бу ердан расо
Ун минг чақирим нарида турган машифоқлар
Худди бир сониядан сўнг жўр бўлиб чалар.

Хотспер

Ета қолайлик, Кет. Бу сенга тегишли. Кел, бошимни
тизсанга қўяй.

Леди Перси

Мана сенга, мана сенга, бетавфиқ!

Глендаур уэльсчалаб бир нималар дейди.
Музика янграйди.

Хотспер

Шайтон ҳам уэльсча тушунишига энди сира шубҳам йўқ. Кейин, шайтонларнинг намунча бебош бўлишлариға ҳам ақлим етиб қолди. Эшитяпсанми, нақадар дилрабо бу шайтоний оҳанглар?

Леди Перси

Агар бебошлик оҳангдорликка замин бўлолсайди, сен шубҳасиз даҳо бўлардинг, негаким бошдан-оёқ ўжарлик ва жинниликинг қуиб қўйган ўзисан. Тинч ёт, бебошвоқ, йўқса, ҳеч нарса эшитолмаймиз. Ҳозир леди уэльсчалаб куйлаб беради.

Хотспер

Менинг исковуч «ледим» ирландчалаб увлаб бергандা, жон деб эшитардим.

Леди Перси

Бошингга бир туширайми?

Хотспер

Йўқ.

Леди Перси

Бўлмаса, ҳап ёт.

Хотспер

Бу хотинлик иллати.

Леди Перси

Худо хайрингни берсин!

Хотспер

Нимага, Уэльс хонимнинг тўшагига кириб олишдами?

Леди Перси

Тагин нима?

Хотспер

Жим. У куйляялти.

Леди Мортимер уэльсчалаб қўшиқ айтади.

Энди сенинг куйлашингни истардим, Кет.

Леди Перси

Хо, ёқмай ўлсин. Сираям-да.

Хотспер

Хо, ёқмай ўлсин, сираям-да! Сўзларингни эшитиб, новвойнинг хотинимикан, дейди киши. «Ёқмай ўлсин», «танти туриб бер», «мени худогина урсин», «кўзларим кўр бўла қолсин».

Умр бўйи онт ичасан, кўрмагандайсан

Финсбери деворидан нари томонни.

Сўзни қасам билан тасдиқ этмоқчи бўлсанг,

Қасамингга шафе келтир еру осмонни.

Занжавилнинг ҳиди анқиб-уфуриб турган

Қасамларни ошиқ-маъшуқ сайронларга қўй,
Ясанишиб олган гули хандонларга қўй,
Кел, куйлаб бер, азизам.

Леди Перси

Йўқ, мен куйламайман.

Хотспер

Ҳа, майли, ихтиёриңг. Қўшиқ айтиш тикувчилару овчиларга ярашади. Ҳўш, битим тайёрми? Унда мен икки соатдан сўнг йўлга тушаман. Истасанг, ёнимга кел.

(*Кетади.*)

Глендаур

Қани, кетдик, Мортимер. Ҳа, мунча карахтсиз, Перси худди ёниб туар, қизғин, бечидам. Битим тайёр шекилли. Ҳўш, имзо чекайлик, Кейин йўлга тушаверинг.

Мортимер

Шодман юракдан.

Кетадилар.

ИККИНЧИ САҲНА

Лондон. Саройда қабулхона.

Қирол ўлтирибди. Атрофика — шаҳзода Генрих, шаҳзода Жон Ланкастер, граф Уэстморленд, сэр Уолтер Блент ва бошқалар, Соқчилар ва ҳос маҳрамлар.

Қирол

Бизни холи қўйинг. Мен ва шаҳзода ёлғиз Бир гаплациб олмоқчимиз ҳозир, жаноблар.

Аммо лекин тез орада бўларсиз зарур.

Ҳа, узоққа кетманг.

Қирол ва шаҳзодадан бўлак ҳамма чиқади.

Эвоҳ, мен билолмадим,
Тангри ғазабига нечун бўлибман дучор.
Қи журмимнинг жазосига — ўз жигарбандим,
Ўз ўғлимни айлар жумла халойиқа хор.
Ҳар қадаминг ила ўзинг тасдиқ этасан,
Қи манглайим шўри, менга тифи парронсан.
Бўлмаса-чи, бу нимадир, ўзинг жавоб бер,
Бундоқ юриш-туришинг, бу айшу-ишратинг?
Паст-баландни билмай, бирдек кўриш одатинг?
Қани, айт-чи, булар қандоқ келишар экан
Қиролзода деган наслу насабинг билан?

Шаҳзода

Ҳукмдорим, қаршингизда тамом бегубор,
Мусаффоман, деб айтишга бормайди тилим.
Бироқ баъзи таъналарга эътироz этгум.
Фақат илтимосим, менинг шаънимда юрган
Уйдирмалар чок-чокидан сўкилар экан,
Ёшлик билан қилган неча бебошлигимни
Инобатга олмагайсиз, тутгайсиз маъзур,
Мен уларни тан оламан, афсус чекаман.

Қирол

Тангри сени маъзур тутгай. Аммо не қилай,
Сенинг машғулотларингга ҳайронман, Гарри.
Боболаринг салобати ўзгача эди.
Сен кенгашига қатнашишини этмайсан хаёл,
Унда ўлтириби сенинг ўрнингда ининг.
Саройга ва аъёнларга ёт бўлиб қолдинг.

Бир кун тузаларсан, деган умидимиз пуч,
 Ҳамма сенинг ҳалокатинг башорат қилар.
 Агар мен ҳам худди сенек шаҳзода маҳал
 Шундоқ майдалашсам, шундоқ назардан қолсам,
 Бугунгидек соҳиби тахт бўлармишим ҳеч.
 Мардум авто билур эди қари қиронни,
 Мен эсам нақ эътиборга нолойиқ бир жон,
 Ҳаттоки бир из қолдирмай бўлардим пинҳон...
 Йўқ, эл аро бир нодири даврон эдим мен,
 Юлдуз бўлиб нигоҳларни қамаштирадим.
 Кўриб шивирлашар эди: «Болинброк бу»,
 Ва сўрашар эди: «Қани, қани? Кўрсатинг».
 Мен зангори само каби дилтортар эдим,
 Ҳалойиқни ҳар гал асир этар эдим, рост.
 Мени кўриб, севинчларга тўларди мардум,
 Тирик подшо туриб, мени айларди эъзоз.
 Қўйматимни билар эдим, элнинг кўзига
 Черков қуббасилик аён эмасдим ҳар дам.
 Кўп чиқмасдим, чиқар эдим гоҳи-гоҳида,
 Ҳар чиқишим одамларга бўларди байрам.
 Ҳамма жойда ҳозир эди чирмовиқ-қирол,
 Гала масхаравоз мудом ёнида пайдо.
 Эрмак излар эди, эрмак топарди алҳол,
 Кулгу — мазах қилишса ҳам этмасди парво.
 Кўча-кўйда ҳар учраган олмасдан ҳадик
 Орқасидан гап отиши муқаррар эди.
 Мен ҳаммага суюкли деб ўйларди шўрлик,
 Мен ҳаммага баробар деб баҳтиёр эди.
 Такрор-такрор пиширилган таомдан баттар
 Уша асал меъдаларга тегди-ку қаттиқ.
 Таом мўътадил бўлмаса, кўнгил айнитар,
 Меъеридан сал ошгани — бари бир ортиқ.
 Эшитмаслар, эшитганда парво этмаслар
 Қанча ёниб сайрамасин баҳорда какку.
 Билсанг, ўша қирол билан учрашиб ҳар гал
 Уни зарра назар-писанд қилмас эдилар,

Боққанда ҳам боқишарди, шунчаки қараб,
Нақ қуёшга боққан каби ҳайрат биланмас,
Балки унга қовоқ уйиб боқишарди, бас,
Бемаҳалда йўқлаб келган меҳмондек санаб.
Сен ҳам шундоқ йўл танладинг ўзингга, Гарри
Ва рутбайи олийингни айладинг қурбон.
Барча безор бўлиб саёқ улфатларингдан,
Сендан ранжи—хотир бўлиб, юз бурган тамом.
Фақат мен боқаман сенга, узмасдан назар,
Нетай, кўз ёшларим оқиб, нигоҳим тўсар.

Шаҳзода

Бу сўзларни эшитиш кўп оғир, подшоҳим,
Мен ўзимни тузатишга ваъда бераман.

Кирол

Ўғлим, баъзида-чи худди ҳали айтганим,
Ўша ландовур Ричардга ўхшаб кетасан.
Перси — менинг ўзим, менга жудаям монанд,
Чамамда, тож кийиш унга ярашар чунон,
Гарчи қонун юзасидан ворис ўзингсан.
Сенинг қонунингни сўраб ўлтирамиди
Майдонларда жавлон уриб юрган қаҳрамон?
Уни чўчитолмас ҳатто ўкириб арслон.
Ўзи сендек йигитчадир, аммо назар сол,
Не-не епископлар, не-не кекса лордларни
Жангга йўллаётир бугун юритиб фармон.
У Дугласни абгор этиб, довруқ таратди,
Юришларда йўлбоцчиди ягона бўлган,
Яшинворий ҳамлаларда афсона бўлган,
Дунё бўйлаб донг таратган ўша Дугласни!
Ҳа, Ҳотспер уни уч бор этди тору мор,
Ҳали янги чақалоқ Марс, бола баҳодир,
Э, тору мор нима, уни айлади асир
Ва озод ҳам қўйиб; битим — шартнома тузди,

Шундоқ биргалашиб, улар давронимизни,
 Тожу тахтимизни бузиб-йикмоқчи энди,
 Эшийтдингми, граф Нортумберленд ва Перси,
 Ҳам Йорк епископи ҳамда, Дуглас, Мортимер
 Тил битишиб, бош кўтармиш бизларга қарши.
 Кимга айтяпман буни — душманимсан-ку!
 Менга қарши иш тутасан — ишончим комил.
 Гаройиб бир шум кирдикор кўрсатмоқ учун
 Ёки қўрққанингдан — улар томонга ўтиб,
 Худди итдек думингни ҳам ликиллатарсан,
 Башарангни унда буткул аён этарсан.

Шаҳзода

Иўқ, иўқ, бундоқ бўлмас, ана кўрасиз ҳали.
 Эвоҳ, парвардигор, сизни қанчалар қайраб,
 Қаршингизда қанча айбдор этмишлар мени!
 Гуноҳимни Перси боши билан оқлайман.
 Ва муқаррар саодатли зафар айёми
 Ўғлингиз деб аталишга оламан ҳуқуқ.
 Бошдан-оёқ қонга ботиб худди ўша кун
 Номусимни қонлар билан юварман бутун.
 Ҳа, ўша кун солишади яккама-якка:
 Бир тарафда — ўша баҳтли, баҳодир Ҳотспер,
 Бир тарафда — сизнинг шўрлик, хокисор ўғил —
 Қилич сирмаб, майдон аро тузиб маърака.
 У ўн карра дубулгасин дол қилиб қўйиб,
 Мен ўн карра ҳақоратга дучор бўлсан ҳам,
 Биз жойларни алмашамиз, у менинг айбим,
 Мен унинг шон-шавкатини тортиб оламан.
 Ҳа, у менинг мардикорим, шунчалар жайлаб,
 Шавкатларни беражакдир менга бир йўла.
 Ҳаммасини беради у, агар бермаса,
 Мен уларни юрагидан юлиб оламан.

(Тиз чўкади.)

Худди шундоқ қиласман, деб ваъда бераман
Худойим ёр эса, худди шундоқ қиласман.
Ота, шунда майдон аро мен қучган зафар
Юракдаги ярангизга шифо бағишилар.
Агар толе чеҳрасини очмаса кушод,
Улим бизни бурчимииздан айлагай озод.
Мен майдонда юз минг карра ўларман, аммо
Сизга ичган қасамимни бузмасман асло.

Қирол

Фитначилар юз минг карра ўлишар ҳали.

(Шаҳзода яқинлашиб, уни турғизади ва құчоқладаб, бағрига босади.)

Үрлим, тайин этгум сени қўмондон қилиб.

Сэр Уолтер Блент кирәди.

Хўш, нима гап, Блент? Ташвиш-ҳаяжондасан.

Блент

Ташвишли бир хабар ила келганман зотан.
Лорд Мортимер Шотланд махфий хабар айлади,
Ун бешинчи куни тамом қўшилишибди
Дуглас билан Англия исёнчилари —
Шрусбери этагида. Улар кўп эмиш.
Ваъда берганларнинг бари қўшилар бўлса,
Исён чиндан даҳшатли тус олади, демиш.

Қирол

Бугун йўлга тушди граф Уэстморленд.
Жон Ланкастер борар унга қордама-қора.
Кўп кечикиб келди ушбу хабаринг... Гарри,

Чоршанба кун сен йўлга чиқ, мен—пайшанбада.
 Биз учрашув тайинлаймиз Брижнорсада.
 Глостершир орқали юр. Мен аминманки,
 Учрашамиз чамаси ўгу икки ҳафтада.
 Қани, ишга. Ҳаяллашга қўймасман ортиқ,
 Ҳаялласак, душманга қўл келици аниқ.

Кетишади.

УЧИНЧИ САҲНА

Истчил. «Тўнғиз бош» майхонасида бир хона.
 Фальстаф билан Бардольф киради.

Фальстаф

Шу сўнгги гал йўлга чиққанимдан буён роса озиб-тўзидим, Бардольф! Ҳа, адойи тамом бўляпман. Тери-ларим олимақом бир кампирнинг эгнидаги кўйлакка ўхшаб шалвираб-осилиб қолди. Қўрга қўмилган олмадек қовжирадим. Куч-мадорим борида тавба қилмасам, ҳадемай, тилим ғўлдираб қолади. Агар бутхона ичининг қандайлигини унумтмаган бўлсам, майли, қалампирнинг уруғими ёки пивопазнинг қирчангиси бўла қолай. Бутхона, ичи! Ё парвардигор, ёмонлар билан юриб, не кунларга қолдим!

Бардольф

Сэр Жон, кайфингиз жудаям учик. Афтидан, узок-қа бормайсиз.

Фальстаф

Ҳамма гап шунда-да. Эй, менга қара, маза-матрасиз бирор нарса куйлаб бер. Ғамимни тарқат. Бир пайтлар ахлоқ-одобда нодиру ягона эдим... Ҳа, ахлоқи

комил бир зот әдим. Меъёрида сўкинардим. Ҳафтада кўпи билан етти марта қимор ўйнардим. Ҳалиги ёмон жойларга фақат пайшанба кунлари ҳар чорак соатда бир кириб чиқардим. Уч-тўрт карра қарзимни ҳам қайтариб берганим бор. Турмушим ақл-идрок доирасида кечарди. Хўш, энди-чи?

Бардольф

Бундай семизликда ақл-идрок доирасидан чиқмай бўладими, сэр Жон? Доира чизиқлари ҳам ўчиб кетган.

Фальстраф

Сен аввал башарангни тўзатиб ол, кейин қандай яшаш ҳақида менга ақл ўргатасан. Сен бизга адмиралсан, дарға чироғинг бурнингда шундоқ ловуллаб туради. Сен бизда лампачилар орденининг кавалерисан.

Бардольф

Қўймадингиз, қўймадингиз-да, сэр Жон. Башарам сизга нима қилди?

Фальстраф

Ёмонлик қилмаган. Аксинча. Мен ундан тарбиявий мақсадларда бош чаноғими ёки ажал нишонаси сифатида фойдаланаман. Сенга қарадимми, бас, дарҳол жаҳаннам ҳақида ўйлаб кетаман ва ўша ривоятдаги қип-қизил либос кийиб, алангада ёнган бой-бадавлат киши эсимга тушаверади. Агар сенда олижанобликдан асар бўлганда, башарангни ўртага қўйиб қасам ичардим. «Шу оташин шамшир билан қасамёд қила-ман»,— дердим. Бироқ сен адойи тамом бўлган бир

бандасан, юзингда ёришиб турган озгина жойни ҳисобга олмаганда, бошдан-оёқ қоронги зулматсан. Биз босқин қилган кеча изимдан югурсайдинг, сени узокдаги хира чироқми ёки кўкдан тушган думалоқ чақмоқми, деб ўйлаган бўлардим, ёлғон айтсам, пулни севмайсан, деб юзимга солавер. Сен бизга — гулханлари гуриллаб, мушаклари ловуллаб турган 'абадий байрамсан, сен менгә кечалари у майхонадан бу майхонага кўчиб юрганимизда машъал ёқишга кетадиган етти юз фунт-стерлинг ақчамни асраб қолдинг. Дарвоҳе, шу муносабат билан иккимиз ичган мусалласнинг пулига Европада аломат бир шам заводи курса бўларди. Ҳа, худо шоҳид, йигирма уч йилдирким, шу ўчақнинг ўтини ўчирмайман, пуфлаганим-пуфлаган.

Бардор

Намунча башарамга ёпишиб олдингиз, илойим у томогингизга тиқилсин.

Фальстраф

Худо арасин, есам ичим куйиб, ўламан-ку.

Майхона бекаси киради.

О, товуқчамизга саломлар! Хўш, чўнтакларимни ким қоқлаб кетганини аниқладингизми?

Бека

Инсоф қилинг, сэр Жон! Менинг уйимда ўғрилар нима қиласди! Ақлга сирадиган гапми шу? Биз, эрим икковимиз ҳаммани бир-бир титкилаб чиқдик, биттаям малай, биттаям чўри қолмади. Шу чоққача менинг уйимда тук ҳам йўқолмаган.

Ф альст а ф

Ёлғон. Бардольф боягина шу ерда соқол қириб, талай тук йўқотди. Ахир чўнтакларимни сизнинг уйингизда ағдаришган-ку! Узингизни фаришта қилиб кўрсатаверманг. Кимлигингиз менга маълум. Не қилса ҳам, хотинсиз.

Б ека

Ким, менми? Шу гапни айтишга қандоқ тилингиз борди? Ё худойим! Мени ўз уйимда ҳеч ким шу қадар ҳақорат этмаган.

Ф альст а ф

Қўйсангиз-чи! Мен сизни яхши биламан.

Б ека

Иўқ, сёрг Жон, сиз мени билмайсиз. Аммо лекин мен сизни яхши биламан, сёрг Жон, қарзни тўламаслик учун атай жанжал чиқармоқчи бўласиз. Мен сизга бир эмас, бир неча кўйлак сотиб олиб берганман.

Ф альст а ф

Ҳа, ҳа, қоп-қанор тикиладиган қандирдан. Мен уларни элак ўрнида ишлатарсан, деб новвойга топширдим.

Б ека

Бекорларни айтибсиз. Ҳар гази саккиз шиллинг турадиган голланд матосидан эди, ёлғон айтсам, турган еримда тил тортмай ўлай! Қейин, бунинг ус-

тига, қарз ҳам олдингиз, қарзга овқатландингиз, турли найранг-усуллар билан йигирма фунтга шароб ҳам ичдингиз.

Ф а л ь с т а ф

(Бардольфни кўрсатиб.)

Менга қўшилишиб манави ҳам ичган. Тўласин энди.

Б е к а

Нималар деяпсиз, сэр Жон? Шундоқ камбағал-а?
Нима ҳам олардим ундан?

Ф а л ь с т а ф

Юзида шундай зарбхонаси бор киши камбағал эмишми? Хўш, бу сизга бойлик бўлмай, нима? Унинг бурни ва ёноқларидан тилло тангалар зарб этиш керак. Мен ҳеч нарса тўламайман. Нима, мен бугун келибманми? Бу меҳмонхонада мизғиб ҳам бўлмайди, дарров шилиб кетишади. Бобомдан қолган қирқ сўмлиқ муҳрли узугим ҳам гумдон бўлибди.

Б е к а

Ё парвардигор, бу қип-қизил ёлғон! Узугинг мисдан деб шаҳзода айтганини неча марталаб ўзим эшигганман.

Ф а л ь с т а ф

Овсар ва гирт нодон ўша шаҳзоданг. Ҳозир шу ерда бўлганида-чи, ўша айтгани учун итдек савалардим.

Енгил қурол-аслача тақинган шаҳзода ва Пойнс ҳарбийчасига қадам ташлаб киришади.
Фальстаф уларни қаршилаб, ҳассасини сурнай қилиб чалади.

Нима гап, ошна? Шамол чиндан ҳам бу ёққа эс-яптими? Бу ердан жилишимизга тўғри келадими?

Бардоръф

Ҳа, Ньюгэт турмасидагидек, иккитадан бўлиб, бараварига қадам тащлаб.

Бека

Милорд, менга қаранг...

Шаҳзода

Хўш, мистрис Күикли? Эрингиз қалай? У менга ёқади. У — яхши инсон.

Бека

Шафқатли милорд, мени эшитинг...

Фальстаф

Тупур унга. Яхиси, менга қулоқ сол.

Шаҳзода

Ҳа, Жек,

Фальстаф

Кейинги гал бу ерда парда ортида ухлаганимда чўнтакларимни супуриб кетишибди. Бу ер — ўғрихона. Аямай шилишади.

Шаҳзода

Ниманг йўқолибди, Жек?

Фальстаф

Айтсан, ишонмайсан, Гарри. Уч ёки тўрттacha
қирқ сўмлик ақчам билан бобомдан қолган муҳрли
узўгим.

Шаҳзода

Э, анави саккиз чаقا турадиган узукми?

Бека

Ана, айтмадимми? Милорд, мен ҳам унга худди
шундоқ дедим. Шаҳзода ҳам шундоқ фикрдалар, де-
дим. У бўлса, сизни оғзига олиб бўлмайдиган сўзлар
билан ҳақорат қилди. «Мен уни калтаклайман», деди.

Шаҳзода

Наҳотки? Янглиш эшитмадимми?

Бека

Ёлғон айтсан, менда имон ҳам, виждон ҳам,xo-
тинлик номуси ҳам бўлмасин.

Фальстаф

Улар сенда нима қиласи. Имон дегани сенда қора
олхўри мураббосидек бир гап, виждонинг тутун қўй-
вориб, инидан ҳайдаб чиқазилган тулкининг виждони-
дан ортиқмас. Хотинлик нөмусига келсак, ҳар ҳолда,

хотинлик нишонаси полиция нозирида қанча бўлса, сенда ҳам шунча. Йўқол бу ердан, қорангни ўчир, анақа махлуқ!

Бека

Қанақа — анақа махлуқ? А? Ҳозироқ айт, қанақа?

Фальстад

Анақа, худо кўрсатмасин, қанақа.

Бека

Ёлғон, мен худо кўрсатмагур анақа эмасмаи, қонуний никоҳдаги номусли хотинман. Аммо сен рицарь ва аслзода бўлганинг билан менинг шаънимга шундоқ гаплар айтганинг учун ярамас, тубансан.

Фальстад

Сен эса майхона бекаси бўла туриб, мен билан ҳадеб айтишганинг учун — ҳайвонсан.

Бека

Қанақасига ҳайвонман? А? Ҳозироқ айт, қанақа ҳайвон?

Фальстад

Қанақа ҳайвон? Сувсарсан — мана, қанақасан.

Шаҳзода

Сувсар дедингизми, сэр Жон? Нега энди сувсар бўларкан?

Ф альст а ф

Негаки, у эт ҳам эмас, балиқ ҳам. Эркак зоти унга қай томондан ёндашишни ҳам билмайди.

Б ека

Бекорларни айтибсан, муттаҳам, илойим турган ерингда қотиб ўл! Сен ҳам, бошқа эркаклар ҳам менга қай томондан ёндашишни яхши билищади.

Ш аҳз о да

Тўғри айтасан, бекам. У сени бегуноҳдан-бегуноҳ ҳақорат қиляпти.

Б ека

У сизни ҳам шундоқ ҳақорат қилди, милорд. Сиз ундан минг сўм қарздор эмишсиз.

Ш аҳз о да

Нима — мей сендан минг сўм қарздорманми, туллак?

Ф альст а ф

Нега энди минг сўм бўларкан, Гарри — миллион сўм! Сенинг муҳаббатинг миллион сўмдан ҳам ортиқ, сен мени севишинг керак.

Б ека

У сизни овсар ва нодон деб айтди, сизни калтақ-лайман, деди.

Ф альст аф

Мен шундоқ дедимми, Бардольф?

Б ард оль ф

Худди шундоқ дедингиз, сэр Жон.

Ф альст аф

Ха, агар шаҳзода узугимни мисдан ясалган, деса, шундоқ қиласман, дедим.

Ш аҳ з о да

Узугинг мисдан, деб ҳозир ҳам айтаман. Хўш, кучингни кўрсат энди.

Ф альст аф

Узинг биласан-ку, бир одам сифатида сенга кучими кўрсатардим. Аммо шаҳзода сифатида сендан, шерваччанинг наърасидан қўрққандек, қўрқаман.

Ш аҳ з о да

Нега энди шернинг наъраси эмас?

Ф альст аф

Мен шердан қўрққандек, подшо ҳазратларидан қўрқишим керак. Наҳотки, мени ўзингдан отангдан қўрққандек қўрқади, деб ўйласанг? Сенларни баравар қўйсам, белим чўрт узилсин.

Ш аҳ з о да

Ушанда қорнинг «шалоп» этиб, тиззангга тушиши ни тасаввур қиласман! Аммо фирт ҳайвонсан! Зигирча

ҳам номусинг йўқ. Туриш-турмушинг — ошқозон, ичакчавоқ. Ҳалол бир хотинни, чўнтағимга қўл солдинг, деб мазаммат қилиб ўтирибсан-а! Хўш, итвачча, безбет, бўрдоқи тўнғиз, ўша чўнтақларингда ошхонанинг ҳисоб-китоб қоғозларию ўғрихоналардан келган мактублар, нафас қисгандан ичиладиган бир чақалик доридан бўлак нима бор эди? Балки, айтганларим ёлғондир? Лекин сен бари бир ўжарлик қилиб тураверасан, бўйнингга олмайсан. Хўш, уят эмасми?

Ф альст а ф

Менга қулоқ сол, Гарри. Одам Ато маъсумлик салтанатида гуноҳга йўл қўйган. Шўрлик Жек Фальстаф сенларнинг шу бузуқи замонангда нима қилсин? Кўриб турибсанки, менинг устимда бошқаларга нисбатан эт-юким кўп, демак шайтон васвасасига учишим ҳам кўпроқ бўлади. Хуллас, киссавурлик қилганингга ўзинг иқрорсан?

Ш аҳ з о да

Ҳа, шундоқ шекилли.

Ф альст а ф

Бекам, мен сени маъзур тутаман. Бориб нонушта ҳозирла. Эрингни сев—қадрла, хизматкорларингдан кўзузма, меҳмонларни иззат-эҳтиром қил. Кўриб турибсан, зарур бўлганда мен далилларга бош эгаман! Тинчлик яна барқарор. Ийе, ҳали ҳам шундамисан? Қани бор, марҳамат қилиб, бора қол энди.

Бека, кетади.

Хўш, Гарри, саройда не гаплар? Бизнинг ишимизга қандоқ қарашяпти?

Шаҳзода

Оҳ, сен, димлама эт, нуқул жонингга ора кираман-а. Ақчалар эгаларига қайтарилди.

Фальстад

Шу қайтариб беришларни жиним севмайди — ўлганни устига тепгандай бир гап.

Шаҳзода

Мен отам билан ярашдим, у бутун инон-ихтиёрни ўзимга қўйди.

Фальстад

Унда биласанми, нима: давлат хазинасини ўмар, шундоқ қилки, сих ҳам куймасин, кабоб ҳам.

Бардорф

Ҳа, шундоқ қила қолинг, милорд.

Шаҳзода

Жек, мен сен учун пиёда қўшиндан битта жой сўраб олдим.

Фальстад

Суворий қўшинда бўла қолсин. Марҳамат қилиб, ўғриликка қўли эпчил бирортасини менга адъютант қилиб бер. Ёши йигирма иккиларда бўлсин. Бўлмаса, уриш-суришда мени ким боқади? Хайриятки, тангриятоло бизга анави исёнчиларни етказди. Улар ҳалол

одамлардан бўлак ҳеч кимга зиён қилишмайди. Қанди-
ни урсин азаматлар, мен уларни оқлайман.

Шаҳзода

Бардольф!

Бардольф

Амрингизга ҳозирман, милорд!

Шаҳзода

Мана бу мактубни укам милорд Жон Ланкастер-
га, манавини эса милорд Уэстморлендга етказ.

Бардольф кетади.

Хўш, Пойнс, энди отларга минайлийк! Биз сен билай
бугун тушгача ўттиз чақирим йўл босишимиз ке-
рак. Жек, сен эртага соат иккida Темпль-Холлга ме-
нинг олдимга бор.

Унда ҳамма гапни ўзинг билиб оласан
Ва оларсан ёлловчилик унвони билан
Аскарларга тегищ зарур пул — маблағни ҳам.
Юрт ёнмоқда, Перси тахтга интилар алҳол,
Еки унга, ёки менга етишгай завол.

(Кетади.)

Фальстаф

Бекам, нонуштани келтир! Муқим бир хона
Бўлса яхши эмасмиди менга — майхона.

(Кетади.)

Парда

ТҮРТИНЧИ ПАРДА

БИРИНЧИ САҲНА

Шрусбери яқинида исёңчилар қароргоҳи.
Хотспер, Вустер ва Дуглас сирадилар.

Хотспер

Сиз ҳақдирсиз, менинг шонли шотланд ботирим.
Ҳақиқатни хушомад деб билурлар бизда.
Бўлмаса-чи, мен Дугласни таърифлар эдим,
Унинг иоми эътиборга ноил ақчадек,
Ҳамма жойда эъзозли бир муомалада.
Менга хушомад бегона, лутф дегани ёт,
Аммо сиздан бўлак ҳеч ким менинг қалбимдан
Шунчалар жой ололмаган, ярқираб кушод.
Мен амалда буни ҳали исбот этаман.

Дуглас

Сиз — ор-номус тимсолисиз. Ҷаҳонда бирор
Рақиб мени чўчитолмас сизчалик зинҳор.

Хотспер

Ташаккур.

Чопар кириб, бир неча мактуб топширади.
Хўш, айтинг-чи, бу мактублар кимдан?

Чопар

Отангиздан, милорд.

Хотспер

Ажаб, отамиз бугун
Бизга мактуб йўллаб, ўзи, келмамиш нечун?

Чопар

У юришни кечиктирди. У ётиб қолди.

Хотспер

Аммо ётиб қолишининг зап пайтини топмиш!
Унинг қўшинини бизга бошлаб келар ким?

Чопар

Билолмадим, Битилгандир мактубда балким.

Вустер

У ҳали ҳам тўшакдами?

Чопар

Шундоқ, тўшакда.
Менинг йўлга тушганимдан уч кунча олдин
Ётмиш эди, оғир эди аҳволи лекин.

Вустер

Умид улким, ўтгай фурсат мобайнида ул
Хасталикдан халос бўлиб, тузалмиш буткул.
Бу биз учун билсанг ҳозир нақадар зарур.

Ҳотспер

Хасталанмиш! Етиб қолмиш! Ахир бу айём
 Унинг хасталиги бизга — ҳалокат тамом!
 У ёзибди менга — ички касаллик билан
 Огриб қолмиш — ахир ҳозир мавридимикан?
 Менга ёзибди у, дўсти-қадрдонларни
 Бу аҳволдан воқиф, оғоҳ этолмадим, деб.
 Асроримни чопарларга айттолмадим, деб.
 Аммо бизга, шу бир ҳовуч фидойиларга
 Дадил туриб иш тутишни кенгаши беради.
 Синаб кўрингиз, дер — толе-иқбол юлдузи
 Сизга чеҳра очиб, нечук таратар ёғду,
 Яна ёзибдиким, қирол бу ишдан бешак
 Хабардордир, шунинг учун ошиқмоқ керак.
 Хўш, бу ҳодисага нечук берурсиз баҳо?

Вустер

Биз графсиз қўл-оёғи шолмиз мутлақо.

Ҳотспер

Ҳа, дарвоқе, мен ҳам шундоқ совудим-қолдим,
 Аммо лекин биласизми? Графнинг иши
 Бизга у қадарлик зиён—йўқотиш эмас.
 Биз тамом қўшинни, неки измимизда бор,
 Бир йўласи шайлаб, жангга солмоқчи эдик,
 Ишни бир зарб ила осон қилмоқчи эдик,
 Лекин бундоқ қилиш, буңдоқ соддалик билан
 Таваккалга умид боғлашт авомликасми?
 Орқамизда кўнгил тўки қўшин бўлмаса,
 Душман бизни балоларга дучор этмасми?

Дуглас

Ха, бу ҳақ гап. Энди тўла таъкидлаш мумкин:
Орқамизда суюнчиқ ҳам, умид ҳам тайин.

Хотспер

Биринчи қадамда шайтон оёқдан чалса,
Яна қайта йигилмоққа маконимиз шай.

Вустер

Отанг бунда ҳозир бўлса, яхши бўларди.
Якка, тарқоқ иш тутишнинг охири чатоқ.
Биласанми, ўйлашади одамлар не деб —
Имиллаяптими, демак, бордир бир гапи.
Демак, бизнинг қўзғолонни қувватламас у,
Ўз бурчига садоқати ва соғлом ақли
Отангизни бир чеккада тутиб туради.
Бизни кўплаб ёр-дўстлардан айиради бу!
Биз тиккаси ҳужум қилиб борамиз. Аниқ,
Ўй ўйлашга вақтимиз йўқ. Муҳокамага
Идрокимиз эшиклари тақа-тақ ёпиқ.
Отангизнинг келмагани иожўядир кўп,
Бу бизнинг сир пардамизни очар бир қадар.
Билмаганлар буни шундоқ таъбир этарлар,
Демак ишга ишончлари камроқ экан деб.

Хотспер

Сиз ҳаддидан оширдингиз тусмол-гумонни.
Графнинг йўқлиги худди қўл келар бизга.
Бас, унингсиз ҳадик олмай, қўрқув билмасдан,
Тортишар эканмиз бутун мамлакат билан,
Дейишарки, сафимизда граф бўлганда

Ҳаммасини остин-устин этаоламиз.
Иўқ, ҳозирча ишларимиз бари жойида,

Д у г л а с

Орзу этганимиздан ҳам яхшидир бари,
«Қўрқув» сўзин билишмайди Шотландияда.

Сэр Ричард Вернон киради.

Ҳ о т с п е р

О, азизм Вернон, қани, марҳамат айла.

В е р н о н

Билмадим, шод этармикин хабарим сизни?
Ҳозир граф Уэстморленд ва шаҳзода Жон
Нақ етти минг қўшин билан келур бу томон.

Ҳ о т с п е р

Нима қинти, келаверсин. Хўш, тағин нима?

В е р н о н

Тағин шуки, маҳсус қўцин йигиб қирол ҳам
Яқинлашиб келмоқдадир бу ёққа илдам.

Ҳ о т с п е р

Майли, у ҳам келсин. Аммо бошқа зурёди,
Яъни Уэльс шаҳзодаси қайдা бу замон?
Кетган эди бебошларга ўзи бош бўлиб,
Уларнинг устида ташвишидан қўл узиб тамом.

В е р н о н

Улар билан биргадир у. Майдонда кўрдим,
Ҳашаматли дубулғаю яроқ-аслаҳа
Устларида ёниб-ярқирап эди,

Бургутлардек тизилишиб келар бир сафда.
 Олтин совутлари чақнаб, кўзни оларди
 Ривоятдаги самовий қўшинилар мисол.
 Бари май ойидек дуркун, навқирон, яна
 Ёз ўртаси — саратондек қайноқ, баркамол.
 Танларида куч-ҳарорат қайнаб тошарди
 Югуришиб буқачалар, қўчқорлар каби.
 Бошдан-оёқ пўлат кийган эди шаҳзода,
 Ҳавас билан қараб турдим қадди-бастига
 Бир маҳал бир сакраб, ўзни әгарга олди,
 Жилов силтаб, отини минг мақомга солди.
 Тулпор гоҳ пишқириб, гоҳи сапчиди баланд,
 Назарингда адил қомат шаҳзода эмас,
 От машқини олаётган қай бир худованд.

Хотспер

Бас қил! Истайсанки, сенинг сўзларинг тинглаб,
 Худди аёзда қолгандек, дир-дир титрасам?
 Улар йўлда дегин? Яхши, жуда соз! Бари —
 Ҳалокатга маҳкум, найза — насибалари.
 Барин қурбон қилиб уруш илоҳасига
 Мурдаларин ёргитамиз Mars меҳробига.
 Енаяпман! Тугаб борар бардошим буткул
 Улжа яқин, аммо ҳали бизникимас ул.
 Қани, отни келтиринглар, худди ўқ бўлиб
 Уэльс шаҳзодаси сари учай шу замон.
 Олишармиз майдон аро худди ўт бўлиб
 От билан от, Гарри билан Гарри беомон.
 Ва биримиз ерга қулаб тушмагунча то
 Олишамиз, майдонни тарқ этмаймиз асло.
 О, қанийди Глендаур бўлслайди бунда!

Верон

Ҳа, менга айтишди Вустер графлигида
 Қўшин йигаман, деб иши чўзилмиш роят.

Дуглас

Мана бу шум хабар бизга оғир бағоят.

Вустер

Эшитдиму совуқ қотиб, жунжикиб кетдим.

Хотспер

Қалай, қирол қўшинида аскарлар кўпми?

Вервон

Уттиз мингча бордир.

Хотспер

Майли, қирқ мингта бўлсин.
 Майли, Глендаур билан отам келмасин,
 Биз кучлимиз, бир зарб ила тепар юраклар.
 Бурғу чалиб, сафланамиз ишончга тўлиб,
 Улар бўлсақ, бош қўямиз мардона бўлиб.

Дуглас

Улим сўзи дафнгача қатаен. Чунки
 Битишганимиз, бир йилгача танимас мени.

Кетишади.

ИККИНЧИ САҲНА

Ковентрига олиб борадиган катта йўл. Саҳна ортида ногоралар
 ва сурнайлар чалинади. Нари-бери қурол-яроқ таққан Фаль-
 стаф билан Бардольф кирадилар.

Фальстраф

Бардольф, сен Ковентрига бор. Менга бир шиша
 мусаллас келтир. Биз аскарлар билан шаҳар атрофини

айланиб турамиз. Кечаси Сеттон-Кольфильдга етиб боришимиз шарт.

Бардольф

Пул бермайсизми, капитан?

Фальстад

Хозирча ўзингникини харжлайвер. Ҳа, лейтенант Петога айт, шаҳар дарвозасида менга пешвуз чиқсин.

Бардольф

Хўп, бўлади, капитан. (Кетади.)

Фальстад

(қўли билан узоқларни кўрсатиб, кула-кула.)

Агар аскарларимни кўрганда ўзим уятдан ерга кириб кетмасам, майли, мени сиркага солинган шўрбалиқ, деб атай қолишин. Мен офицерлик, ваколатимдан, билмадим, қандай истифода этдим. Ёллашим зарур бўлган бир юз эллик нафар аскар ўрнига нақд уч юз фунт-стерлинг ақча йигиб олдим. Аскар йигиш ҳақидаги фармонни нуқул бадавлат қишлоқиларга, янги куёвтўраларга, кейин худди шайтондан қўрқандек ноғора гумбуридан чўчидиган, милтиқ овозини эшишибоқ, ўқ теккан ўрдакдек шалпайиб тушадиган нозикниҳолларга рўкач қилдим. Мен нуқул шунаقا қаланги-қасангиларни жуфтёқа қилавердим, табиийки, уларнинг ҳаммаси товон тўлаб, жонини қутқазиб қолди. Энди менинг ротам, ўзининг бутун прапоршчиклари, капраллари, лейтенантлари билан ўша, расмдә чизилган, ярасини итлар ялаб турган Лазарга ўхшаш жулдуровқилардан иборат. Улар ҳеч қачон аскар бўлиш-

маган. Улар қўним топмаган хизматкорлар, меросдан маҳрум меросхўрлар, мусофирихонанинг қочоқ малайлари, синиб қолган майхона эгалари, хуллас, тинчлик замонининг лойқа-луйқалари, эски полк байроғидан ҳам баттар титифи чиққан оломон. Уларни кўриб, кечагина чўчқа боқиб, сарқит, ювинди билан қун кўриб юрган бир юз эллик бебош ўғил гўё қайтиб келибди, деб ўйлайсан. Йўлда бир жинни учраб, шунча мурданни қайси дордан ўмардинг, деб сўраб қолса-я. Дунё дунё бўлиб, бунақа бедаволарни кўрмаган. Худо кўрсатмасин, шу аҳволда Қовентрига кириб борсам, роса шарманда бўламан. Шунинг учун уни айланиб ўтишга тўғри келади. Бунинг устига аскарга ўхшаб юришни билишса ҳам гўрга эди, шундоқ қадам босишадики, худди оёқлари тахтакачлаб қўйилгандек. Нафсилаамрни айтганда, уларнинг кўпчилиги турмалардан териб олинган тасқаралар. Бутун бошлиқ ротага ичкийим бор-йўғи бир яримта кўйлак, яримта деганим бу — жуфтлаштириб, даккам-дуккам қилиб тикилган иккита сочиқ, жарчининг нимчасидек қилиб елкаға ташлаб қўйилади. Анави битта бутун кўйлакни эса, билмадим, Сент — Олбанидаги мусофирихона ҳовлисиданми ёки Дентри қовоқхонасининг шолғом бурун эгасиданми, ҳар қалай, бир гўрдан ўғирлаб олишган. Э, бари бир эмасми. Ичкийим дегани истаган тахта деворда истаганча топилади.

Шаҳзода Генрих билан Уэстморленд киради.

Шаҳзода

Ҳа, шишимақул Жек. Ишлар қалай, хўжагумбаз?

Фальстаф

Ё худойим, Гарри! Қаёқдан пайдо бўла қолдинг, эси паст? Қайси шайтон сени Уорикширга учирди?

Маъзур тутасиз, милорд Уэстморленд, мен сизни пай-қамабман. Мен жанобларини аллақачон Шрусберида деб ўйлагандим.

Уэстморленд

Сўзларингиз айни ҳақиқат, сэр Жон. Аллақачон Шрусберига етиб олишимиз керак эди, биз ҳам, сиз ҳам. Аммо менинг қўшинларим етиб боришиди. Қирол йўлимизга кўз тутиб турибди. Эрталабгача ухламай, йўл босишга тўғри келади.

Фальстраф

Мендан кўнглингиз тўқ бўлсин. Бирор жойда ялагудек қаймоқ топилса, бас, мушукка ўхшаб кўз юммайман.

Шахзода

Ҳа, ялагудек қаймоқ топилса, бас. Қаймоқ ялайвериб, бир тепа сариёққа айланибсан-қолибсан. Хўш, менга айт-чи, анави орқада судралиб келаётган рўдалолар кимнинг қисмидан?

Фальстраф

Менинг қисмимдан Гарри, менинг асқарларим.

Шахзода

Бунақа бедаво оломонни сира учратмаганман.

Фальстраф

Секинроқ, намунча бақирасан. Нима бўларди, наизаларга нишон, замбаракларга ем, ҳа, замбараклар-

га ем. Қабрларни бошқалардан ёмон тўлдиришмайди. Инсоф билан гапир, азизим. Улар ҳам одамлар, худонинг бандалари, азизим, худонинг бандалари.

Уэстморленд

Ҳмм.., лекин, сэр Жон, нега уларнинг кўринишлари шу қадар абгор-афтода? Булар — кўча-кўйдаги фақиргадолар.

Фальстраф

Фақирликни қайдан илаштиришган, билмадим. Аммо ориқликни мендан юқтиришмаган.

Шаҳзода

Уч энли қалинликдаги мой ориқлик санаалмас экан, айтганларнинг ҳақиқат. Аммо жин ургур, қадамни жадаллат. Перси қўшинларини жангга шайлаижоқда.

Фальстраф

Кирол қароргоҳ тутиб бўлдими?

Уэстморленд

Ҳа, сэр Жон, биз кечикмасак гўрга эди.

Шаҳзода Генрих билан Уэстморленд кетади.

Фальстраф

Майли, базми жамшидларга ошиқсанг ошиқ, Аммо жангга ошиқмоқлик сенга не лойиқ.

(Кетади.)

Саҳна ортида яна боягидек ногоралар ва сурнайлар садоси.

УЧИНЧИ САҲНА

Шрусбери яқинида исёничилар қароргоҳи,
Хотспер, Вустер, Дуглас. Вернон, офицер-
лар ва аскарлар киришади.

Хотспер

Улар билан жанг қиласиз тунда.

Вустер

Ошиқма.

Дуглас

Ҳаялласак уларга қўл келади.

Вернон

Асло.

Хотспер

Улар мадад келишини кутмоқда.

Вернон

Биздек.

Хотспер

Уларнинг режаси пишиқ, бизники — думбул.

Вустер

Дўстим, сенга маслаҳатим: бир оз кутиб тур.

Вернон

Бугун жанг бошламанг, сизга маслаҳатим шу.

Дуглас

Бу яхши маслаҳат эмас. Қўрқоғлик, холос.

Вернон

Менга бундоқ гапингизни гапирманг, Дуглас.
 Бурчим чиндан буюаркан, эътиборимдан
 Тамом четда қолиб кетар ҳадик, эҳтиёт
 Ва қўрқувни унутаман сиз каби мен ҳам,
 Сизга ўхшаб мен ҳам шотланд эрурман, милорд,
 Эртанги жанг кўрсатади майдон аро чин —
 Ким қўрқоқ.

Дуглас

Йўқ, бугунгиси.

Вернон

Бўпти, розиман.

Хотспер

Бугунгиси.

Вернон

Сизга қараб, ҳайрон қоламан,

Шундоқ саркардаларсизу наҳотки, наҳот,
 Кутиб туриш заруратин кўрмайсиз кушод?
 Акам отлиқлари билан етиб келмаган.
 Вустер боягина келди қўшини билан,
 Ҳансирайди отлари ҳам, одамлари ҳам.
 Жоизмикан жаҳду жадал айласак талаб,
 Аскарлари чала жондек ётишар ухлаб.

Ҳотспер

Шундоқ аҳволдадир душман отлиқлари ҳам.
 Улар роса толиқишиган йўл босиб анча,
 Бизда дам олганлар эса топилар пича,

Вустер

Уларнинг сони кўп. Перси, худо ҳаққи, сен
 То бошқалар келмагунча, күтиб тургайсан.

Карнайлар чалиниб, элчилар келишганидан ҳабар беради. Сэр
 Уолтер Бленд, унинг изидақ оқ бафроқ кўтариб оғи-
 церлар ва аскарлар киришади.

Блент

Мен элчиман, истасангиз, эшитинг сўзим,
 Мен қиролдан келдим сизга таклифлар билан.

Ҳотспер

Сэр Уолтер Блент, қани, келинг, азизим,
 Бизнинг одаммассиз, шунга афсус чекаман.
 Ҳамма ерда сиз баробар севгига ноил,
 Ҳаттоки энг яқин дўсти — аҳбобингиз ҳам
 Бегоналар билан кўриб, юракдан хижил.
 Биз ҳам қаршингизда бугун дўст эмас, душман.

Б л е н т

Худо шоҳид, мен ҳам сизни шундоқ атайман,
Сиз қонунни поймол этиб, подшо билан то
Муноқаша этаркансиз, шу бўлур баҳо.
Хуллас, мени қошингизга қирол йўллаган,
Нималардан норозисиз, нима сабабдан
Гражданлик битимиши буздингиз бундоқ,
Фитна қўзғаб, халойиққа солдингиз нифоқ?
Подшо сўрайдирким, агар хизматингизни
Етарлича этолмаган бўлса у эъзоз —
Уларни у жуда юксак баҳолайди, рост,—
Айтинг, нимадир ўтилақ-истакларингиз.
Қирол барисини дарҳол бажо келтирас,
Кейин ушбу можарога бош қўшган барча
Шерикларингизга авфи-умумий берар.

Ҳ о т с е р

Қирол мурувватли! Қачон ваъдалар бериб,
Қачон бажо келтиришни яхши билади.
Отам билан амакимга буни кўрсатди.
Салтанатни олди бизнинг қўлимиз билан.
Унда мўйлови чиқмаган ўспирин эди.
У хориждан, сургунлардан ёлғиз, бенаво
Қиёфада ватанига қочиб келаркан,
Қучоқ очиб кимсасиз бир соҳилда таҳдо
Менинг отам эди уни қаршилаб олган.
Шунда орзу-аъмолини сўзламиш қочоқ,
Мен Ланкастер графлиги — ўз мөросимни
Олмоқчиман, дегач, отам олдида шундоқ
Аҳду паймон қилиб, роса кўз ёши тўккан,
Отам ўнга ишонган ҳам ваъдалар берган,
Кейин ўша ваъдасига айлаган вафо.
Граф Нортумберленд унга тарафдор, дея
Кулогига чалингандан аъён амалдор

Кела берган ҳар тарафдан бел боғлаб қатор,
 Кела берган ҳар тарафдан ёшу қария.
 Далаларда, қишлоқларда, шаҳру кентларда
 Эъзоз айлаб, этишарди иззат-икромлар.
 Чиқишарди кўприкларда, йўлларда пешвоз,
 Таъзим этиб, тутишарди совға-саломлар.
 Хизматига ҳар тарафдан йиғилиб бисёр,
 Халқ хизматга берди унга ўвлонларини.
 Халойиқминг муҳаббати менга барқарор,—
 Дея бузди у аҳд ила паймонларини.
 У Ревенспер соҳилида отамга берган
 Ваъдаларни эсламади, тамом унуди.
 У кўпчилик фуқарога юқ бўлиб тушган
 Қонунларни ўзгартириш йўлини тутди.
 У ҳар турли иллатларни қарғади роса,
 Юртнинг аҳволини айтиб, хўрсинди оғир.
 Ниятига етди ҳийла, айёллик ила
 Ва оқибат, юракларни айлади асир.
 Яна янги қадам қўйди: бояқиши Ричард
 Жанг қиласкан Ирландия ерида дадил,
 Унинг бунда қолган барча одамларини
 Тутиб олиб, битта-битта айлади қатл.

Б л е н т

Мен буларни эшитмоққа келган эмасман.

Ҳ о т с п е р

Мана, асл муддаога ўтамиз энди
 У Ричардни таҳтдан йиқиб, жонини олди.
 Бутун мамлакатга оғир солиқлар солди.
 Шуидоқ зулм-қабоҳатлар оҳирида у
 Мортимердан юз ўғирди. Ахир, Мортимер —
 Ундан кўра подшоликка муносиб бир эр.
 Қирол уни асирикда чириб кетсин, дер,

Шу йўл билан ундан халос бўлмоқни истар.
 Менга муомаласи-чи, баттардан баттар.
 Жангда ғолиб чиқдим, аммо иэимдан нуқул
 Унинг фармойиши билан изғир жосуслар,
 Мени бир балога дучор этмоқчи бўлар.
 Амакимни ҳақоратлаб, мажлисдан қувди
 Ва отамни саройдан ҳам айлади ихрож.
 Бизга берган ваъдасини ҳамиша бузди,
 Бизга ҳамиша етказди ранж ила озор,
 Бизни оёққа қалқишига мажбур қилди у.
 Подшо бўлиб, умидимиз оқламади у.

Блент

Бу — қиролга берган расмий жавобингизми?

Хотспер

Иўқ-йўқ, Блент. Жавобни биз ўйлаб кўрамиз.
 Сиз унгача айтинг, қирол элчиларимнинг
 Даҳлизлигини тўла таъмин айласин,
 Эрта тонгда жавобимни элтар амаким.

Блент

Сизни яраштиришни мен истардим жуда.

Хотспер

Эҳтимолки ярашармиз.

Блент

Баҳақи худо!

Карнайлар ва ногоралар. Ҳамма тарқалади: Блент ўз киши-
 дари билан бир томонга, Хотспер — бошқа томонга.

ТУРТИНЧИ САҲНА

Йорк, Архиепископ саройида бир хона,
Архиепископ ва сэр Майкл кирадилар.

Архиепископ

Тезроқ бўлинг. Мана бу лорд—маршалга мактуб,
Бу — укамга, Скрупга, Майкл, азизим,
Бошқаларни адресидан ўқиб оласиз.
Биласизми, бу бағоят, бағоят муҳим!
Ҳа, шошилинг.

Сэр Майкл

Хатни қўлга олишим билан —
Муҳимлигини мен дарров пайқаб оламан.

Архиепископ

Ҳа, пайқаш қийинмас. Эрта бўлажак саваш
Кўплар учун жуда оғир имтиҳон бўлар.
Менга хабар беришдиким, кўп қўшин билан
Шрусбери этагида ҳозирдир қирол.
У лорд Перси билан унда қаттиқ солишар.
Мен Персининг куч-қўввати оз, деб қўрқаман.
Бирламчиси, Нортумберленд тўшакда бетоб,
Биз учун бу жуда катта зиёндириш шу тоб.
Иккиламчи, Глендаур ёрдам ҳақида
Ваъда бериб, ваъдасига вафо қилмади.
Балки ёмон оқибатдан чўчиб қолди у.

Сэр Майкл

Бари яхши бўлур. Унда Мортимер, Дуглас.

Архиепископ

Мортимер йўқ унда.

Сэр Майл

Буниинг зиёни бўлмас.
Унда Вернон, Вустер, яна сара ва афзал
Неча баҳодирлар, неча аслзодалар.

Архиепископ

Аммо юртнинг гулларини йиғмиш қирол ҳам.
Унда Жон Лайнкастер, Уэльс шаҳзодаси ва —
Шонли Уэстморленд билан баҳодир Блент,
Бари асл қаҳрамонлар, шавкатли, донгдор,
Ҳаммасининг жанг-жадалда тажрибаси бор.

Сэр Майл

Бизникилар устун келур майдонда бешак.

Архиепископ

Ҳа, менинг ҳам яратгандан тилагим шудир.
Лекин эҳтиёт ҳам зиён айламас, илло,
Мен офатни радди бадал айламоқ учун
Чорасини кўряпман. Мабодо Перси
Мағлуб бўлиб қолса, унда музaffer қирол
Исёнга бош қўшганимдан хабардор бўлиб,
От бошини бу томонга буради дарҳол.
Ўз вақтида қуролланиб тўришим зарур.
Менинг қуролларим ушбу мактублардадир.
Сиз буларни элтинг. Мен-чи, ҳозироқ бориб,
Яна янгисини ёзай. Азизим, хайр.

Кетадилар.

Парда

БЕШИНЧИ ПАРДА

БИРИНЧИ САҲНА

Шрусбери яқинида қирол қароргоҳи.
 Қирол Генрих, шаҳзода Генрих, шаҳзода
 Жон Ланкастер, сэр Уолтер Блент ва сэр
 Жон Фальстад кирадилар.

Қирол

Бадқовоқ тонг қирмизи қон тусли шафақни
 Тепаларга ёйди. Қаранг, субҳидам хомуш,
 Қора кунни пайқагандек.

Шаҳзода

Карнайчи шамол
 Үрмонзорни айқаш-уйқаш чайқатиб бу дам,
 Хабар берар бўрондан ва қайгули кундан.

Қирол

Шамол мағлубларга томон эсмоқда, ана.
 Фолиб билмас: қайғу нима, хавотир нима.

Карнайлар чалиниб, элчилар келганидан хабар беради. Вустер, Вернон, оқ байроқ кўтарган офицер киради.

Э, сизмисиз? Лорд Вустер, бу яхши эмас-ку,
 Биз учрашиб турсак бунда шундоқ алфозда.

Сизга ишонгандик. Аммо сиз алдадингиз,
 Енгил түнни ечиб, қари баданга оғир —
 Совет кийишимга яна мажбур этдингиз.
 Такрор айтаманки, Милорд, бу яхши эмас!
 Менга қаранг, қани, менга айтингиз ошкор:
 Тайёрмисиз жангу жадал дамини қесиб,
 Уз қонуний ўрнингизга ўтмоққа такрор?
 Шарофатли юлдуз каби шуъла сочинг сиз,
 Қоңираган, даҳшатли бир метеор каби
 Авлодларга таҳдид солиш айтинг, не даркор?

Вустер

Подшоҳим, мен ўзим-чун жавоб бераман.
 Менга қолса, ўз умримни осойиниц ичра
 Фарогатда ўтказишни аъло кўрадим.
 Мен бу можарони сира истамаганман.

Қирол

Сиз бу можарони сира истамагансиз?
 Бўлмаса, у қандоқ қилиб рўй бера қолди?

Фальстраф

Ҳа, у истамаган. Аммо исён унинг оёғи остидан чиқиб
 қолган. У эгилгану шартта олиб, қўлтиққа уриб қўя
 қолган.

Шаҳзода

Тек тур, олашақشاқ.

Вустер

Сиз ўзингиз юз бурдингиз, подшоҳим, биздан,

Бизнинг хонадонимиздан, ахир бир замон
 Бизда эди сизнинг асл дўсти-қадрдан.
 Мен сизни деб ўша Ричард айёмидаёқ
 Хизматни тарк этдим, мансаб—амални қўйдим.
 Сизнинг қўлингизни ўпиш иштиёқида
 Кун демадим, тун демадим, югурдим-елдим.
 Гарчи баланд эди унда нуфузим менинг,
 Соқчи бўлиб уйингизда кузатиб қўйган
 Биз эдик-ку, ахир — ўзим, жияним, акам.
 Олий салтанатни сира этмасман ҳавас,
 Гонтнинг ўлимидан кейин эгасиз қолган
 Шу Ланкастер герцоглиги бўлса менга бас,—
 Дея Лонкастерда бизга ичгансиз қасам,
 Мададкормиз, дея қасам ичгансиз биз ҳам.
 Омад келаверди сизга омад кетидан.
 Сизнинг фойдангизга бари ҳал бўлди тамом.
 Қирол узоқдайди. Тоғдек суюнчиқ бўлиб,
 Мададкорлик қилдик. Пишиб етилди исён.
 Бегуноҳ бир қурбон, деган номингиз чунон
 Довруқ ёйганидан-ёйди. Тескари шамол
 Эсиб, узоқ қолиб кетди денгизда қирол,
 Уни ўлган санадилар Англияда.
 Сиз фурсатни фанимат деб билдингиз алҳол.
 Дўстлар тож кийишини сизга таклиф этдилар.
 Сиз рози бўлдингиз, аҳду паймонни бузиб.
 Хуллас, шундоқ қилиб, бизнинг хонадон учун
 Чумчук уясига кирган какку бўлдингиз.
 Бизнинг иону тузимизнинг шарофатидан
 Тез орада даҳшатли бир кучга тўлдингиз,
 Ки яқинлаб бўлмай қолди, яқинлашган жон
 Ютиларди, комингизда топарди макон.
 Қўзингиздан нари қочиш ва ўзимизни
 Мудофаа қилиш бўлди бизга қолгани.
 Сиз ўзингиз қўлимизга бердингиз қурол
 Қасамхўрлик билан, балки нонкўрлик билан,
 Муомала чоғи бизга сўз айтиб қўпол.

Қирол

Сиз шуларни айладингиз әлга овоза,
 Айюқаннос солиб бозор, бутхоналарда
 Ва исённи ҳақ, деб нидо солдингиз тоза,
 Үр-йиқитга ташна бўлган жонлар олдида?
 Улар умри ўтар ахир тўполон кутиб,
 Юрганда ҳам, турганда ҳам бир-бирин туртиб,
 Исён деганлари биэда озмас ҳар қалай,
 Исён учун баҳона ҳам, боис ҳам талай.

Шаҳзода

Ҳар иккала томонга ҳам ёғилар ажал,
 Агарда шу жапжални деб бўлса жанг-жадал.
 Сиз марҳамат қилиб айтинг жияннингизга:
 Уэльс шаҳзодаси бутун дунёга ўхшаб,
 Гарри Перси мухлисидир. Агарда унинг
 Шу исёнга иштирокин этсак мустасно,
 У нодири даврон эрур мардоналика,
 Асл жўмардликда, асл фарзоналика,
 Олижанобликда бизнинг асрда танҳо.
 Мен хижолат ичра шуни этаман иқрор,
 Ки менда на ботирлик, на баҳодирлик бор,
 Буни Перси юзимга шарт солиши мумкин.
 Шунга қарамасдан қатъий айтаман лекин
 Шу соҳиби ҳукмдорим, отам олдида:
 Перси устун, шу важдан ҳам ушбу таклифни
 Менга қулай эрур баён айласам тикка.
 Беҳуда қон тўкилмасин қўшинлар аро,
 Биз майдонда олишайлик яккама-якка.

Қирол

(ўрнидан қўзғолиб)

Биз берамиз оталик оқ фотиҳамизни,

Гарчи бундан фойда эмас, зиён келса ҳам...
 Иўқ, Вустер, биз қадрлаймиз фуқаромизни.
 Биз севамиз ҳатто йўлдан адашиб аввал,
 Сўнг тўғри йўл топиб, бизга келганларни ҳам.
 Шунинг учун сизга шундоқ таклиф этаман:
 Урушмайлик, келингиз, сиз, жиянингиз, мен
 Хуллас, ҳамма дўстлашмайлик яна қайтадан.
 Сиз бу сўзимизни бориб Персига айтинг.
 Унинг қарорини бизга етказинг зинҳор.
 Билиб қўйинг, агарда у ўжарлик қилса,
 Қасос олиш учун бизнинг қудратимиз бор.
 Биз ишга соламиз ўша қудратни. Оқ йўл!
 Йўқ-иўқ, жавоб бериш учун оғиз жуфтламанг.
 Биз қўл узатмадик сизга эрмакка лекин.
 Аввал ўйлаб кўринг. Жавоб берасиз кейин.

Вустер, Вернон ва оқ байроқ кўтарган офицерлар кетишади.

Шаҳзода

Улар таклифларимизни қабул этмаслар,
 Ахир Дуглас, Хотсперга замин-замона
 Қилич суғурмоқлик учун тайёр баҳона.

Кирол

Яна яхши. Саркардалар, шай бўлиб туринг!
 Сўзга кўнишмаса, жангга кирамиз дарҳол,
 Биз ҳақ учун курашамиз. Тангри мададкор!

Кирол шаҳзода Жон, офицерлар ва аскарлар кетишади.

Фальстадф

(шаҳзодани тўхтатиб.)

Гарри, мабодо ерда ётганимни кўрсанг, гавданг билан мени тўсиб тур. Бу — дўстлик бурчи.

Шаҳзода

Бунинг учун дев бўлиш керак. Таңгрига тавба қилу мазза қилиб ётавер.

Фальстадф

Оҳ, қандоқ яхши ҳаммаёқ тинч-осойишта бўлса, мазза қилиб ётиб ухласанг!

Шаҳзода

Бир кун эмас, бир кун жонни жабборга бериш—ҳам фарз, ҳам қарз.

(Кетади.)

Фальстадф

Тўлов муддати ҳали етмаган бўлса-чи! Қарзингни тўла, деб қистамаётган экан, шошиб қаёққа бораман! Хўп, яхши, балки менга буни номус иши, дейишлар ва ўша номус дегани мени оёққа турғизар. Оёққа турсам-у, бошимдан ажрасам, нима бўлади? Номус менга янги оёқ ясаб бера оладими? Иўқ. Қўл-чи? Қўлидан келмайди. Ярамни тузатармикан? Яна йўқ. Демак, номус табиб эмас экан-да? Ҷалли. Бўлмаса, нима у? Сўз. Ичида нимаси бор? Ҳаво. Үргилдим унақа хазина-

дан! Хўш, у кимга аталған ўзи? Чоршанбада уни деб ҳалок бўлган кимса пайшанбада унга ноил бўлади. Хўш, буни унинг ўзи сезармикин? Иўқ. Балки эшитар? Иўқ. Эҳтимол номус дегани тирикларга аталгандир? Иўқ, асло. Нега Фийбат-бўҳтон уни майдалаб, кулини кўкка совуради. Бас, мен уни истамайман. Номус — қабр тошига ёзиладиган ёзувнинг бир тури. Мана, менинг таълимотим. (*Кетади.*)

ИККИНЧИ САҲНА

Исёнчилар қароргоҳи.
Вустер ва Вернон киради.

Вустер

Иўқ-йўқ, Вернон, билмаслиги керак жияним
Сулҳу салоҳ ҳақидаги қирол таклифин.

Вернон

Иўқ, менимча, буни унга билдиromoқ зарур.

Вустер

Унда ҳаммамизга завол етди, деявер.
Қирол ҳозир бизга берган ваъдаларига
Содик қолади, деб ўйлаш — ақлдан йироқ.
Қирол энди аввалгидек ишонмас бизга.
У ҳеч қачон унутмас бу исёнимизни,
Таъна қилиб, юзимизга солади ҳар чоқ.
Ортишимиздан кузатишар кейин умрбод.
Хоинга ким ишонарди, хоин нақ тулки,

Уни қанча боқма, меҳринг айлама аён,
 Ииртқич табиати лекін бўлур намоён,
 Кулсанг ёки йигъласанг ҳам бари бир энди,
 Емонликка йўйишади — насибамиз шу,
 Қанча яхши яшамагин, туарсан мудом
 Қушхонада турган молдек ўлимга яқин.
 Эҳтимолки, жиянимни тутарлар маъзур.
 Ешилик — қизиққонлик, дея этарлар талқин.
 Хўш, нимага, десанг, унинг эл орасида
 «Бебош, олов-оташ» деган лақаби тайин.
 Персини деб биз балога қолармиз лекин:
 «Отаси ва амакиси ўргатмиш унга»,
 Биз — баёнинг илдизимиз, демак, гуноҳкор.
 Мана шундоқ сабабларга кўра жияним
 Қиролнинг сулҳ таклифини билмасин зинҳор.

Вернон

Бўлмаса сиз, бир нималар тўқиб айтинг-да,
 Мен қувватлай уни. Мана ўзи ҳам шунда.

Хотспер билан Дуглас, уларнинг изидан офицерлар
 ва аскарлар киришади.

Хотспер

Амаким қайтибди. Демак Уэстморлендни
 Озод қўйиш мумкин. Қани, айтинг, не бўлди?

Вустер

Қирол жанг қилишга ҳозир шайдир биз билан.

Дуглас

Розилигимизни элтсн Уэстморленд.

Хотспер

Ҳа, Дуглас, бу вазифани Лордга топширинг.

Д у г л а с

Мен бу ишни бажону дил бажо этаман.

(Кетади.)

В у с т е р

Қирол бизни кечиришни истамас асло.

Ҳ о т с п е р

Сиз кечирим сўрдингизми ундан? Ё худо!

В у с т е р

Мен таъналар отдим унга, қасамхўрсан, деб.
 У рад этди, айтганига иқороп бўлмади.
 Қасамидан топиб, яна қасамлар ичди
 Ва қичқирди: «Сиз, хонилар, исёнчилар!» деб.
 Ҳаммангизни қиличга ем қиласман, деди.

Д у г л а с қайтиб киради.

Д у г л а с

Афандилар, қани бўлинг, қуролни шайланг!
 Мен қиролни даъват этдим майдонга зотан.
 Ҳозир етказади унга Уэстморленд.

В у с т е р

Уэльс шаҳзодаси сени ҳамма олдида
 Майдонга чақирди — жангга, яккама-якка.

Ҳ о т с п е р

Қанийди иш бита қолса иккимиз билан,
 Бошқаларни четлаб ўтса оғриқ ва алам!

Ҳа, айтинг-чи, жангга таклиф этаркан мени,
У ўзини қандоқ тутди? Нафратомузми?

Вернон

О, йўқ. Таклиф этди ғоят камтарлик билан —
Ука акасини таклиф этганга монанд.
Иzzатингиз бажо қилди туриб мардона,
Шундоқ мадҳ этдики, фазлу фазилатингиз
Солномачи каби бир-бир қайд этди яна.
Яна бир ҳолати кўзга ташланди аён,
Ки бир тортичоқлик ила ўзини сизга
Қиёс этганида буткул бўлди намоён.
Бирор айбми ё гуноҳга йўл қўйган шогирд
Ўзини ўз устозига қиёслар баъзан
Шундоқ ўкинч билан, балки ҳижолат билан.
Мен ҳаммага эшиттириб дадил айтаман,
Агарда у тирик қолса, саломат, омон,
Майлига, мишишилар қайнаб турибди, лекин,
Суврати ҳар соат айнаб турибди, лекин,
Англия истиқболи равшан, чарогон.

Хотспер

Чамамда, сиз, дўстим, унга меҳр қўйибсиз —
Унинг жунунинга, унинг маломатига.
Эшитмадим бебошлиқда бирор-бир кимса
Шу шаҳзодачалик элга овоза бўлса.
Майли, ким бўлмасин ўша, лекин ишонинг,
Уни шундоқ қудрат ила сиқарман, токим
Суяклари ўз, ўзидан қисирлаб кетсин.
Қани, қуролларингизни шайланг, жаноблар,
Оғаларим, ўртоқларим ва аскарларим!
Асл бурчингизни яхши биласиз зотан,
Сизга айтиб беролмасман уни сўз билан,
Сўзамолликка мен унча моҳир эмасман.

Ч о п а р киради.

Ч о п а р

Милорд, сизга мактуб.

Х о т с п е р

Ҳозир ўқишига вақт йўқ.
Дўстлар, ҳаётимиз ўзи жудаям қисқа.
Аммо ўша бир соатга етмаганда ҳам,
Уни майда-чўйда, бўлар-бўлмасга сарфлаб,
Шарафсиз яшасак, жонга тегарди роса.
Биз ҳаётда подшолардан қўрқмадик асло,
Жоиз эса, подшолардек ўламиз аммо.
Бизниг ниятимиз холис, эзгу, мўътабар
Қиличимиз дамини у ёритиб тураг.

Иккинчи ч о п а р киради.

Иккинчи ч о п а р

Фурсат етди, Милорд. Қирол яқинлаб қолди.

Х о т с п е р

Мен хурсандман, ажаб қилди, сўзимни бўлди.
Энди жим тураман. Сўзга моҳир эмасман.
Ҳар ким қўлдан келганини айласин бажо.
Қиличимни суғурдим мен. Уни бўяйман
Шу майдонда қимматбаҳо қирмиз қон билан.
Қани, карнайларни чалинг, довулни қоқинг,
Ҳаммангиз ҳайқирингиз: «Перси! Esperance!»—деб.
Келинг, сўнгги марта бир-бир қучоқлашайлик,
Балки баъзи бирорларга энди ҳеч қачон
Қучоқлашиб кўришмоққа бўлмагай имкон.

Карнайлар чалинади. Ҳамма қучоқлашади.
Кейин чиқадилар.

УЧИНЧИ САҲНА

Шрусбери*, яқинида жанг майдони,
Унда-мунда қиличлашмоқдалар. Узоқда ҳужумга ўтишга сигнал
берилади. Дуглас қирол кийимини кийиб олган сэр Уол-
тер Блент билан тӯқнашади.

Блент

Қайга борай, кўз ўнгимда бўласан пайдо,
Кимсан ўзинг? Нега мунча илашиб олдинг?

Дуглас

Мен — Дугласман. Жангда нуқул излайман сени,
Сабабки, айтишларича, қирол эмишсан.

Блент

Адашмадинг.

Дуглас

Хозир сенга ўхшагани-чун
Лорд Стеффорд этди менга жонини таслим.
Сен деб ўйлаб, уни жаҳаннамга жўнатдим.
Таслим бўл! То жаҳаннамни кўрсатай сенга,
Ўлажаксан, агар таслим бўлмасанг менга.

Блент

Мен ҳеч кимга бирор марта ён бермағанман
Ва Стеффорд учун сендан, такаббур шотланд,
Қасос олажакман.

Қиличлашадилар. Бленд қулайди.

Хотспер киради.

* Шрусбери — Фарбиј Англиядаги Шропшир графлигининг бош шаҳри. (Тарж.)

Ҳотспер

Гольмдонда жанг қилсайдинг шунчалар бардам,
Сендан устун чиқолмасдим унда сира ҳам.

Дуглас

Биз ғалаба қилдик... Жанг ҳам тугади алҳол.
Мана ерда ётар қонга беланиб қирол.

Ҳотспер

Қани?

Дуглас

Ана.

Ҳотспер

Манавими, Дуглас? Адашдинг.
Бу юз таниш менга, уни яхши биламан,
Ер тишлиб ётган бу Блент — баҳодир рицарь,
Кирол кийимини кийиб олган у, холос.

Дуглас

Вой, жин урсин! Шу ясама уивонинг учун
Ҳаётингни товоғ қилиб тўладинг бутуи.
Кирол сувратига бекор кирибсан, бекор.

Ҳотспер

Бундайлардан майдон аро ҳали бир талай,
Бари қирол кийимини кийиб олишган.

Д уг л а с

Мен уларни битта қўймай саваб чиқаман—
Навбат билан ва ҳақиқий қиролгача то,
Етмагунча, тиним нима, билмасман асло.

Ҳ о т сп е р

Куннинг бошланиши бизни умидвор этар.

Кетишади.

Узоқдан ҳужумга ўтганларнинг қичқириқлари эшитилади. Фальстраф киради.

Ф а л ь с т а ф

Бу ер сенга Лондон эмаски, ҳар балога чап бериб кетаверсанг, бу ерда пайсалга солиб ўтиришмайди, ҳаш-паш дегунча «пақ» этиб бошингга тушириб қолишиди. Аммо, шошма, секирроқ, ким бўлдийкин бу? Сэр Уолтер Блент! Сиз мардона жон бердингиз. Турмуши ташвишлари оромингизни энди бузолмагай. Вой, жин урсин, совутда терлайвериб, суюқ қўрошинга айланиб, тамом оғирлашиб қолдим. Ҳа, айтмоқчи, ё тангirim, қўрошинни менга раво кўрмагайсан! Шусиз ҳам ичакларимнинг оғирлиги ўзимга этиб ортади, яна юк орттириш нимаси. Шурлик рўдаполарим! Мен уларни худди жаҳаннамга солдим. Бир юз элликтасидан аранг учтаси қочиб қутулди, улар ҳам шундоқ дабдалаки, энди умр бўйи шаҳар дарвозаси олдида ўтириб, тиланчилик қилишидан бўлак чоралари йўқ. Тўхта, ким келяпти экан?

Шаҳзода Генрих киради.

Шаҳзода

Нега бунда қақайганча турибсан? Менга Қиличингни бериб тургин. Қара, бу замон—

Шаҳидларимизни душман топтар беомон,
Қасос олиш керак. Менга қиличингни бер.

Ф а л ь с т а ф

Гарри, тўхта, нафасимни ростлаб олай. Уша турк султони Григорий ҳам мен бир кунда қилган ишни умр бўйи қилолмаган. Перси билан орани очиқ қилдим. У энди зиён етказолмайди.

Ш а ҳ з о д а

Безиён демоқчимисан. У тирик, ўлдирмоқчи бўлиб сени излаб юрибди. Қиличингни бериб тур.

Ф а л ь с т а ф

У тирик экан, қилич ўзимга керак. Истасанг, тўп-пончами ола қол.

Ш а ҳ з о д а

Қани, бер. Ийе, тўппончанг ҳали гилофидами?

Ф а л ь с т а ф

Ҳа. Ҳушёр бўл, эт-бетингни куйдириб олма тағин. Силтанавериб, ўлгудек қизиб кетган. Бир шаҳарга этгулик мусалласи бор.

(Шаҳзода гилофдан бир шиша май олади.)

Ш а ҳ з о д а

Хозир майнавозчиликка бало борми?

Шишани Фальстафга иргитиб, ўзи кетади.

Ф а л ь с т а ф

Бўпти. Агар қиличимга рўпара келиб қолса борми, ўша Перси деганинг тирик қолмайди! Бордию нодонлик қилиб, ўзим унга рўпара келиб қолсам, майли, мени қиймали кабоб қилиб ея қолсин. Шу жин ургур, номус билан боғлиқ бўлган ҳазил-хузулларни жилла хушламайман, нега десангиз, оқибати — мана бунақа. Улик сэр Уолтерни бир томоша қилинг, тишларини қандай иржайтириб ётибди! Йўқ, менга ҳаёт ҳали кепрак. Бордию у номус билан боғлиқ бўлса, марҳамат, бўлаверсин, эътиrozим йўқ. Бордию у номусдан бегона бўлган тақдирдаям, бари бир, манави фахрли оқибатдан қочиб қутулиб бўлмайди, шундоқ экан, ташвиш чекишининг ҳам ҳожати йўқ.

Бургулар ҷалинади.
Ф а л ь с т а ф қочади.

ТЎРТИНЧИ САҲНА

Майдоннинг бошқа бир қисми.
Хужум қилаётгапларининг қичқириқлари. Үнда-бунда жанг қилмоқдалар.
Қирол Генрих, шаҳзода Генрих, шаҳзода
Жон Ланкастер ва Уэстморленд кирадилар.

Қ и р о л

Бошдан-оёқ қора қонга ботибсан, Гарри...
Жон, акангни тезда бундан олиб чиқ нари:

Ланкастер

Мен кетмайман, чунки ҳали ярадормасман.

Шаҳзода

Шу ондаёқ сиз қўшинга қайтиңг, ҳукмдор,
Иўқлигингиз кўриб, унда ҳайрон бўлишар.

Қирол

Сўзинг тўғри. Мен жўнайман. Уэстморленд,
Ўтинаман, сен чодирга бошлаб бор уни.

Уэстморленд

Шаҳзодам, мен олиб чиқай.

Шаҳзода

Кимни? Мени-я?

Мен ҳозирча ёрдамингга муҳтоҷ эмасман.
Худо кўрсатмасин; Уэльс шаҳзодаси то —
Эт-бети тирналиб, шунга қуруқдан-қуруқ
Ташлаб чиқиб кетармиди майдонни? Асло!
Юрт гуллари туёқлардан топталиб, пайҳон,
Майдон аро малъунларнинг байроғи баланд.

Ланкастер

Пича дамимизни олдик, Уэстморленд,
Майдон кутаётир бизни. Борайлик энди!

Шаҳзода Жон ва Уэстморленд кетишади.

Шаҳзода

О, Ланкастер, жуда боплаб алдадинг мени!
Сени шундоқ шиддаткор деб ўйламагандим.
Шу чоққача бир укам деб ардоқлар эдим,
Энди асл қаҳрамон, деб севарман сени.

Қир ол

У Персиинг зарбасига зарбалар берди,
Боя кўрдим. Аммо ўзи ўспирин ҳали!

Шаҳзода

О, бу бола ҳали роса довруқ солади!

Кетади.

Жанговар хитоблар. Дуглас киради.

Дуглас

Яна битта қирол! Худди аждаҳо монанд
Бир бошини кессанг, бири кўриниб қолар.
Кимсан? Мен — Дугласман, яъни сенларга ажал,
Қани, ўзинг айт-чи, соҳта қиролмасмисан?

Қирол

Мен ҳақиқий қиролдирман. Таассуф, Дуглас,
Уратибсан менмас, менинг сояларимни.
Менинг икки ўғлим ҳозир излайди сени,
Сени ва Персини қонли жанг майдонида.
Менга дучор бўлганингга хурсандман жуда.
Кел, бўлмаса, олишайлик. Қайтар зарбани.

Дуглас

Қўрқаманки, ҳақиқиймас соҳта қиролсан,
Гарчи хатти-ҳаракатинг қиролларга хос.
Майли, ким бўлмагин, менга ўлжасан, холос.

Қиличлашадилар. Қирол танг аҳволда. Шаҳзода Генрих
қайтиб киради.

Шаҳзода

Хой, нобакор шотланд, қани бир қайрилиб боқ,
 Нақ елкангга қилич тушиб, бўлурсан ҳалок!
 Мени арвоҳлар юборди, олажакман хун —
 Блент, Шерли, Стефффорд ва бошқалар учун.
 Мен — Уэльс шаҳзодаси. Қаршингда пайдо,
 Айтганимни шу ондаёқ этарман адo.

Киличлашадилар.. Дуглас чекиниб, яширинади.

Милорд, аҳволингиз қалай, ҳолингиз нечук?
 Сэр Никлос Гоузи биздан мадад сўрайди,
 Клифтонга шошяпман ёрдамлашай деб.

Кирол

Тўхта. Нафасингни ростла. Болам, сен чиндан
 Менинг ҳаётимни эъзоз этар экансан.
 Сен амалда буни ҳозир айладинг исбот.

Шаҳзода

Магар бунга гумонингиз бормиди? Ҳайҳот,
 Мени қандоқ булғамишлар бўғтонлар билан.
 Гўёки мен сизга ўлим — завол тилайман?
 Буни ростми-ёлғонлигин кўрдингиз кушод.
 Агар мен Дугласга жиндак бермасам халал,
 Бир нафасда тақдирингиз этар эди ҳал,
 Мен, ярамаё оппоқ бўлиб қолардим бунда.

Кирол

Кетайлик — сен Клифтонга, мен — Гоузига.

(Кетади.)

Хотспер киради.

Хотспер

Сен — Гарри Монмутсан, агар хато қилмасам.

Шаҳзода

Рад этмайман, ўзиман.

Хотспер

Мен — Гарри Персиман.

Шаҳзода

Демак, менинг рўпарамда ҳозир муқаррар
Жаҳондаги энг довюрак фитначи тўрар.

Мен — Уэльс шаҳзодаси. Билиб қўй, Перси,
Шон-шуҳратни биз иккига бўлмасмиз энди.

Бир чизиқда икки юлдуз этмагай парвоз.

Бундақ кейин шарофатли шу Англия

Бир йўла ҳам сеники, ҳам меники бўлмас.

Хотспер

Ҳа, шундоқ бўлмагай. Фурсат етишди мутлоқ.

Иккимиздан биримизнинг кетишимиз ҳақ.

Фақат, афсус, шон-шуҳратинг меникидан кам.

Шаҳзода

Бугун уни сеникига тенглаб олурман

Ва дубулғанг узра қўпдан ўстириб юрган

Гултоғинги қирқиш учун қилич солурман.

Хотспер

Мақтанишинг тингламоққа йўқ менда чидам.

Солишадилар. Фальстраф киради.

Фальстраф

Баракалла, Гарри. Ана шундоқ, бопла уни! Бу ер сенларга қўғирчоқбозлик эмас, деб айтмабмидим.

Дуглас қайтиб киради. у Фальстраф билан жанг қиласди. Фальстраф йиқилиб, ўзини ўлганга солади. Дуглас кетади.

Хотспер яраланиб йиқиласди.

Хотспер

Менинг ёшлигимни единг. Менга бу замон
Ҳаётдан айрилиш унча мاشаққат эмас.

Менинг шон-шуҳратим сенга ўтар бу нафас.

Мана шу андиша бағрим ёқар беомон.

Ва менинг жонимга ботар қиличдан баттар.

Аммо фикр — тафаккурга ҳаёт ҳукмрон,

Ҳаётни бир эрмак қилиб ўйнайди замон.

Замона ҳам эрмак қилиб ўйнайди зеро —

Неки муваққатдир бунда, неки бебақо.

О, мен ҳозир этмоқчийдим жиндек башорат,

Муздек совуқ қўли билан сиқиб шу қадар,

Зилдек оғир этмасайди тилимни ажал!

Перси, энди сен тупроқсан. Сен энди емиш...

Улади.

Шаҳзода

«Қўртлар учун», — демоқчийдинг шекилли? Хайр,
Хайр, жасоратли ўлон, баҳодир юрак!
Такаббурлик — ҳилвираган, омонат мато,

У ювилган латта каби киришар бешак.
 Бу баданда ҳаёт ҳали барҳаёт экан,
 Ҳаттоки бир подшолик ҳам унга кам эди.
 Лекин, мана, икки газ ер кифоя қилди.
 Сен бағрида ўлиб ётган бу мамлакатда
 Баҳодири йўқдир энди сенга баробар.
 Қулоғинг сўз эшитмайди, шунинг учун ҳам,
 Мен шаънингга айтяпман ҳамду санолар.
 Кел, юзингни ёпиб қўяй бўйинбоғ билан.
 Ажаб, менга туюлдики, бу хизматим-чун
 Ташакқур айтгандай бўлиб туюлдинг менга.
 Фолибият шуъласида самоларга уч,
 Мағлубият аламлари қолсин қабрда.
 У сенинг қабринг тошига ёзилмагай ҳеч.

Ерда ётган Фальстафни кўриб қолади.

Эвоҳ, қадрдоним! Шундоқ баҳайбат бир тан
 Ҳаёт учқунини асраб қололмадими?
 Хайр, бечора Жек, жойинг жанинатда бўлгай,
 Сендан неча карра яхши одамлар борки,
 Уларниңг ўлими шунча ўртамас мени.
 Шоду хандон кунларимга багишлардинг жон.
 Сенга ачинаман, сенга, мақтанчоқ, лаққи.
 Бугун шаҳид бўлганларнинг орасида сен
 Энг гаройиб махлуқдирсан, ғалати ҳайвон.
 Биз ичингни ёриб, мушки-анбар сурамиз,
 Аввал мўмиёлаб, кейин этамиз дафи.
 Сен ҳозирча ёта қолгин Ҳотспер билан.

Кетади.

Ф а л ь с т а ф

(ўрнидан қўзғалиб.)

«Ичинги ёрамиз!» Бугун ичакларимни ағдарсанг,
 эртага тузлаб, тановул қилишинг ҳам ҳеч гапмас. Вой,

жин ургур ўзимни зап вақтида ўликка солганим, бўлмаса-чи, анави шотланд мендан шотландча шўрбалиқ ясаши турган гап эди. Иёе, ўзимни ўликка солдимми? Сираям-да. Ҳа, сирам ўзимни ўликка солганим йўқ. Ўликлар асли ашаддий алдоқчилар бўлишади.

Улар одамликдан чиқиша ҳам, худди одамга ўхшаб ётишади. Тирик қолиш учун ўзингни ўликка солишинг — алдоқчиликмас, самимият. Ботирликнинг бир зийнати — камтаринлик. Ана шу зийнат мени қутқазиб қолди. Ё алҳазар! Ўлик бўлсаям шу қароқчи Персидан чўчийман. Мабодо у ҳам муғомбирлик қилиб ётгану тўсатдан ўрнидан туриб қолса-чи? Ёки муғомбирликни мендан ҳам бир парда ошириб ётган бўлса-я? Баҳарҳол унга яна бир-икки зарба бериш зиён қилмайди. Кейин, уни мен ўлдирдим, деб айтсам ҳам бўлаверади. Хўш, нима қипти? Уни уриб гангитишган, у йиқилиб ҳушидан кетган, кейин меңга ўхшаб тирилиб қўя қолган. Бас, айбга буюрмагайсиз, манавини оч биқинга қабул қилгайсиз (*қилич санчади*), энди товонини ҳам ола қолинг.

(Хотсперни ағдариб, чалқанча ётқизади.)

Шаҳзода Генрих, шаҳзода Жон Ланкастер қайтиб киришади. Тўртта аскар уларнинг изидан кириб, орқада туришади.

Шаҳзода

Илк жанговар қадам билан сени қутлайман!
Кўп аломат ишлар қилдинг шамиширинг билан.

Ланкастер

Менга қара. Ҳой, нима бу? Айтмабмидинг сен
Менинг бақалогим бугун ҳалок бўлди деб?

Шаҳзода

Ҳа, айтгандим. Унинг ўлиб, нафаси ўчиб,
Ерда ётганини, ахир, кўрганман ўзим.
Хой, сен тирикмисан? Арвоҳ бўлмагин тағин?
Эй, ростдакам ўзингмисан? Ишонтир ўзинг.

Фальстраф

Албатта ўзимман. Арвоҳ эмасман. Агар Жек Фальстраф бўлмасам, майли, Жек алламабало бўла қолай. Мана сизга — Персингиз. (*Жасадни ерга ташлайди.*) Отангиз мени мукофотласа — хўп. Мукофотламаса, бундан кейин Перси деганларни ўзи ўлдира қолсин. Мен энди камида граф ёки герцог бўлишим керак.

Шаҳзода

Бекорларни айтибсиз. Персини мен ўлдирдим, сенинг ўлиб ётганингният ўзим кўрганман.

Фальстраф

Ҳали шунақами? В худо, ё парвардигор! Одамлар нақадар айниб кетишибди. Тўғри, мен ҳам унга ўхшаб нафасим ўчиб ётвудим, бир пайт иккимиз ҳам баравар сакраб, оёққа турдик, Шрусбери минорасининг соати билан ҳисоблаганда роса бир соат жанг қилдик. Мени диёнатли десангиз, ишонинг, ишонмасангиз, ношукурлик уволи ҳимматига яраша мени мукофотлаши лозим бўлган зотнинг бўйнига тушади. Оч биқинига манави яранни мен солдим, бунинг исботи учун жонимни бернишга ҳам тайёрман. Тирик бўлганда-чи, буни ўзи ҳам инкор этолмасди, йўқса, қиличимни сопиға қадар яна боти-рардим.

Ланкастер

Бундай ғаройиботни ҳеч эшитмаганман.

Шаҳзода

Мен бунақа мақтандоқни сира кўрмадим.

Ҳа, анави юкинг билан, майли, фахрлан

Ёлғон деган матоҳ сенга суюнчиқ экан,

Уни рост ўрнида кўриб, тасдиқ этаман.

Карнайлар чалинади.

Жанг тугади. Зафар билан қутлайман сени!

Юр, анави тепаликдан қарайлик ҳар ён.

Қимлар биздан ҳалок бўлган, ким қолган бмон.

Шаҳзода Генрих ва шаҳзода Жон кетишади.

Фальстраф

Уларнинг изидан бораман. Ҳойнаҳой, мени мукофотлашса керак. Худойим, мени ярлақагани ўзинг ярлақа. Тепага кўтариладиган бўлсам, ёғни камайтишга тўгри келади. Даволанаман, ичишни ташлайман, тартиб-коида билан яшайман. Ҳа, орбў-эътиборли одам бўлиш фурсати етди.

Карнайлар чалинади. Фальстраф аскарларга Хотспер жасадини кўтаришга ишора қиласди, ўзи улар билан бирга чиқади.

БЕШИНЧИ САҲНА

Кирол Генрих чодири.

Карнайлар ва ногоралар чалинади. Кирол Генрих ўлтирибди, шаҳзода Генрих, шаҳзода Жон Ланкастер, Уэстморленд, офицерлар ва аскарлар тикка туришибди. Вустер ва Вероники олиб киришади.

Қ и р о л

Исён кўтарғанлар роса тазирин еди.
 Ҳой, нобакор Вустер, сени юбормадимми
 Мұҳаббату қулху салоҳ таклифи билан?
 Айтганларимизни бузиб талқин айладинг,
 Ёлғон айтиб, илинтирдинг домингга уни.
 Шаҳид бўлган уч ботир ва шавкатли граф,
 Яна қанча жонлар тирик бўлурди алҳол —
 Сен асл баҳодир, Исо умматига хос
 Диёнат-ла иш тутсайдинг, битишиб ҳалол.

В у с т е р

Мен фақат жонимни ўйлаб, шу ишни қилдим.
 Муносибдир жиноятга яраша жазо.
 Ҳаммасига бош эгаман.

Қ и р о л

Олиб чиқингиз,
 Вустерни ҳам, Вернонни ҳам қатл этингиз.
 Бошқа айборларни сўроқ қиласиз кейин.

Соқчилар Вустер ва Вернонни олиб чиқишиади.

Яна нечук хабарлар бор жанг майдонидан?

Ш а ҳ з о д а

Шотланд Дуглас жангда омад кетганин кўриб,
 Кўриб Перси ўлимни ќүшинларининг

Жон ҳолатда тумтарақай бўлиб қочганин,
 Үзи қочиб қолди отнинг бошини буриб.
 Оти ўқдек учар экан, қоқилиб тушди;
 Суворийси қулаб, бизга асирга тушди.
 Ҳозир менинг чодиримда ўлтирибди у,
 Уни мёнга беринг, сиздан илтимосим шу.

Қирол

Марҳамат.

Шаҳзода

Жон иним, ҳозир чодиримга бор,
 Савоб иш бу, адосини сен бўйнингга ол.
 Сен Дугласни асирликдан озод қил. Кетсин.
 Айтгил, товоғ-жаримаси менга керакмас.
 Бошимизга кўп зарбалар ёғдириш билан
 У ўргатди — биз қадрлай оламиз чиндан
 Душман жасоратини ҳам.

Ланкастер

Раҳмат сизга. Мен
 Буни мамнуният билан адо этаман.

Қирол

Иккига бўлурмиз энди қўшиналарни биз.
 Сен, Жон, сиз лорд Уэстморленд, яъни, иккингиз
 Йоркка* йўл оласиз, Нортумберленд ва Скруп

* Йорк — Шимолий Англиядаги Йоркшир графлигининг бош шаҳри. (Тарж.)

Тураг бизга қарши унда тараддуд кўриб,
Мен ва Гарри йўл оламиз Уэльс томон,
Марч ва Глендаур унда кўтармиш исён.
Энг сўнгги бир зарба ила бадкорларни биз
Узил-кесил парчалаймиз, яксон этамиз.
Фалабамиз буюк лекин тинмаймиз асло,
Ҳаммасининг таъзирини бермагунча то.

Қетадилар.